

नमो नमो निग्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः

१६

सूरपन्नत्ति-पंचमं उवंगसुत्तं

Proof correction is not done

मुनि दीपरत्नसागर

Date : / / 2012

Jain Aagam Online Series-16

पाहुडं	पाहुड-पाहुडं	सुत्तं	गाहा	अणुककम	पिडुंको
पढमं	८	१-२०	१-१५	१-३०	02
बीयं	३	२१-२३	-	३१-३३	11
तच्चं	-	२४-	-	३४-	15
चउत्थं	-	२५-	-	३५-	16
पंचमं	-	२६-	-	३६-	17
छडुं	-	२७-	-	३७-	18
सत्तमं	-	२८-	-	३८-	19
अडुमं	-	२९-	-	३९-	19
नवमं	-	३०-३१	-	४०-४१	21
दसमं	२२	३२-७०	१६-२९	४२-९७	24
एक्कारसमं	-	७१-	-	९८-	40
बारसमं	-	७२-७८	३०-	९९-१०६	41
तेरसमं	-	७९-८१	-	१०७-१०९३	45
चउद्धसमं	-	८२-	-	११०-	47
पन्नरसमं	-	८३-८६	-	१११-११४	48
सोलसमं	-	८७-	-	११५-	49
सत्तरसमं	-	८८-	-	११६-	49
अडुारसमं	-	८९-९९	३१-	११७-१२८	50
एगूणवीसडुमं	-	१००-१०१	३२-८८	१२९-१९३	53
वीसडुमं	-	१०२-१०७	८९-१०३	१९४-२१४	60
Proof correction is not done					

१६

सूरपन्नत्ति-पंचमं उवंगसुत्तं

◦ पढमं पाहुडं ◦

[] पढमं-पाहुडपाहुडं []

[१] नमो अरिहंताणं, तेणं कालेणं तेणं समएणं मिहिला नामं नयरी होत्था-रिद्धत्थिमिय-समिद्धा पमुइयजणजाणवया जाव पासादीया दरिसणिज्जा अभिरूवा पडिरूवा तीसे णं मिहिलाए नयरीए बहिया उत्तरपुरत्थमि दिसीभाए एत्थ णं माणिभद्वे नामं चेइए होत्था-वण्णओ तीसे णं मिहिलाए नयरीए जियसत्तू नामं राया धारिणी नामं देवी वण्णओ तेणं कालेणं तेणं समएणं तम्मि माणिभद्वे चेइए सामी समोसढे परिसा निग्गया धम्मो कहिओ जाव राया जामेव दिसं पाउब्भूए तामेव दिसं पडिगए ।

[२] तेणं कालेणं तेणं समएणं समणस्स भगवओ महावीरस्स जेढ्ढे अंतेवासी इंदभूती नामं अणगारे गोयमेगोत्तेणं सत्तुस्सेहे समचउरंससंठाणसंठिए० जाव एवं वयासी- ।

[३] कइ मंडलाइ वच्चइ तिरिच्छा कि वगच्छइ ।

ओभासइ केवइयं सेयाइ किं ते संठिई ।

[४] कहिं पडिहया लेसा कहं ते ओयसंठिती ।

के सूरियं वरयंति कहं ते उदयसंठिती ।

[५] कतिकद्धा पोरिसिच्छाया जोगे किं ते आहिए ।

के ते संवच्छराणादी कइ संवच्छराइ य ।

[६] कहं चंदमसो वुड्ढी कया ते दोसिणा बहू ।

के सिग्घगई वुत्ते कहं दोसिणलक्खणं ।

[७] चयणोववाते उच्चत्ते सूरिया कति आहिया ।

अनुभावे के व सेवुत्त एवमेयाइं वीसई ।

[८] वड्ढोवुड्ढी मुहत्ताणमद्धमंडलसंठिई ।

के ते चिण्णं परियरइ अंतरं किं चरंति य ।

[९] ओगाहइ केवइयं केवइयं च विकंपइ ।

मंडलाण य संठाणे विक्खंभो अड्ड पाहुडा ।

[१०] छप्पं च य सत्तेव य अड्ड य तिण्णि य हवंतिपडिवत्ती

।

पढमस्स पाहुडस्स उहवंति एयाओ पडिवत्ती ।

[११] पडिवत्तीओ उदए तह अत्थमणेसु य ।

भेयघाए कण्णकला मुहुत्ताण गईइ य ।

[१२] निक्खममाणे सिग्घगई पविसंते मंदगईइ य ।

[१३] उदयम्मि अड्ड भणिया भेयघाए दुवे य पडिवत्ती ।

चत्तारि मुहुत्तगईए हुंति तइयम्मि पडिवत्ती ।

[१४] आवलिय मुहुत्तग्गे एवंभागा य जोगासा ।

कुलाइं पुन्नमासी य सण्णिवाए य संठिई ।

[१५] तारगग्गं च नेया य चंदमग्गत्ति यावरे ।

देवताण य अज्झयणे मुहुत्ताण नामयाइ य ।

[१६] दिवसा राइ वुत्ता य तिहि गोत्ता भोयणाणि य

।

आइच्च-चार मासा य पंच संवच्छराइ य ।

[१७] जोइसस्स दाराइं नक्खत्तविजएवि य ।

दसमे पाहुडे एए बावीसं पाहुडपाहुडा ।

[१८] ता कहं ते वड्ढोवुड्ढी मुहुत्ताणं आहितेति वएज्जा ता अड्ड एगूणवीसे मुहुत्तसए सत्तावीसं च सट्ठिभागे मुहुत्तस्स आहितेति वएज्जा ।

[१९] ता जया णं सूरिए सव्वब्भंतराओ मंडलाओ सव्वबाहिरं मंडलं उवसंकमित्ता चारं चरइ सव्वबाहिराओ वा मंडलाओ सव्वब्भंतरं मंडलं उवसंकमित्ता चारं चरइ एस णं अद्धा केवइयं राइंदियग्गेणं आहितेति वएज्जा ता तिण्णि छावट्ठे राइंदियसए राइंदियग्गेणं आहितेति वएज्जा ।

[२०] ता एयाए णं अद्धाए सूरिए कइ मंडलाइं चरइ ता चुलसीयं मंडलसयं चरइ-बासीतं मंडलसयं दुक्खुत्तो चरइ तं जहा- निक्खममाणे चेव पविसमाणे चेव दुवे य खलु मंडलाइं सइं चरइ तं जहा- सव्वब्भंतरं चेव मंडलं सव्वबाहिरं चेव मंडलं ।

[२१] जइ खलु तस्सेव आदिच्चस्स संवच्छरस्स सइं अट्टारसमुहुत्ते दिवसे भवइ सइं अट्टारसमुहुत्ता राती भवति सइं दुवालसमुहुत्ते दिवसे भवइ सइंदुवासमुहुत्ता राती भवति पढमे छम्मसे अत्थि अट्टारसमुहुत्ताराती भवति नत्थि अट्टारसमुहुत्ते दिवसे अत्थि दुवालसमुहुत्ते दिवसे नत्थि दुवालसमुहुत्ता राती दोच्चे छम्मासे अत्थिअट्टारसमुहुत्ते दिवसे नत्थि अट्टारसमुहुत्ता राती अत्थि दुवालसमुहुत्ता राती नत्थि दुवालसमुहुत्ते दिवसे पढमे वा छम्मासे दोच्चे वा छम्मासे नत्थि पन्नरसमुहुत्ते दिवसे भवति नत्थि पन्नरसमुहुत्ता राती भवति तत्थ णं को हेतूति वएज्जा ता अयण्णं जंबुदीवे दीवे सव्वदीवसमुद्दाणं सव्वब्भंतराए जाव परिक्खेवेणं पन्नत्ते ता जया णं सूरिए सव्वब्भंतरमंडलं उवसंकमित्ता चारं चरइ तथा णं उत्तमकट्टपत्ते उक्कोसए अट्टारसमुहुत्तेदिवसे भवइ जहणिया दुवालसमुहुत्ता राती भवति से निक्खममाणे सूरिए नवं संवच्छरं अयमाणे पढमंसि अहोरत्तंसि अब्भित्तराणंतरं मंडलं उवसंकमित्ता चारं चरइ तथा णं अट्टारसमुहुत्ते दिवसे भवइ दोहिं एगट्ठिभागमुहुत्तेहिं ऊणे दुवालसमुहुत्ता राती भवति दोहिं एगट्ठिभाग-मुहुत्तेहिं अहिया से निक्खममाणे सूरिए दोच्चंसि अहोरत्तंसि अब्भित्तरं तच्चं मंडलं उवसंकमित्ता चारं चरइ ता जया णं सूरिए अब्भित्तरं तच्चं मंडलं उवसंकमित्ता चारं चरइ तथा णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं ऊणे दुवालसमुहुत्ता राती भवति चउहिं एगट्ठिभागमुहुत्तेहिं अहिया एवं खलु एएणं उवाएणं निक्खममाणे सूरिए तथाणंतराओ तथाणंतरं मंडलाओ

मंडलं संकममाणे संकममाणे दो-दो एगद्विभागे मुहुत्तस्स एगमेगे मंडले दिवसखेततस्स निवुड्डेमाणे-
निवुड्डेमाणे रयणिखेततस्स अभिवुड्डेमाणे-अभिवुड्डेमाणे सव्वबाहिरमंडलं उवसंकमित्ता चारं चरइ, ता
जया णं सूरिए सव्वब्भंतराओ मंडलाओ सव्व-
पाहुडं-१, पाहुडपाहुडं-१

बाहिरं मंडलं उवसंकमित्ता चारं चरइ तथा णं सव्वब्भंतरमंडलं पणिहाय एगेणं तेसीएणं राइंदियसएणं
तिणिण्णावट्टे एगद्विभागमुहुत्ते सए दिवसखेततस्स निवुड्डित्ता रयणिखेततस्स अभिवुड्डित्ता चारं चरइ
तथा णं उत्तमकड्डपत्ता उक्कोसिया अट्टारसमुहुत्ता राती भवति जहण्णए दुवालसमुहुत्ते दिवसे भवइ एस
णं पढमे छम्मासे एस णं पढमस्स छम्मासस्स पज्जवसाणे से पविसमाणे सूरिए दोच्चं छम्मासं अयमाणे
पढमंसि अहोरत्तंसि बाहिराणंतरं मंडलं उवसंकमित्ता चारं चरइ ता जया णं सूरिए बाहिराणंतरं मंडलं
उवसंकमित्ता चारं चरइ तथा णं अट्टारसमुहुत्ता राती भवति दोहिं एगद्विभागमुहुत्तेहिं ऊणा दुवाससमुहुत्ते
दिवसे भवइ दोहिं एगद्विभागमुहुत्तेहिं अहिए से पविसमाणे सूरिए दोच्चंसि अहोरत्तंसि बाहिरं तच्चं मंडलं
उवसंकमित्ता चारं चरइ ता जया णं सूरिए बाहिर तच्चं मंडलं उवसंकमित्ता चारं चरइ तथा णं अट्टार-
समुहुत्ता राती भवति चउहिं एगद्विभागमुहुत्तेहिं ऊणा दुवालस मुहुत्ते दिवसे भवइ चउहिं
एगद्विभागमुहुत्तेहिं अहिए एवं खलुएणुवाएणंपविसमाणे सूरिए तयाणंतराओ जाव मुहुत्ते एगमेगे मंडले
रयणिखेततस्स निवुड्डेमाणे-निवुड्डेमाणे दिवसखेततस्स अभिवुड्डेमाणे-अभिवुड्डेमाणे सव्वब्भंतरं मंडलं
उवसंकमित्ता चारं चरइ ता जया णं सूरिए सव्वबाहिराओ मंडलाओ सव्वब्भंतरं मंडलं उवसंकमित्ता चारं
चरइ तथा णं सव्वबाहिरं मंडलं पणिहाय एगेणं तेसीएणं राइंदियसएणं तिणिण्णावट्टे एगद्विभागमुहुत्ते सए
रयणि-खेततस्स निवुड्डित्ता दिवसखेततस्स अभिवुड्डित्ता चारं चरइ तथा णं उत्तमकड्डपत्ते उक्कोसए
अट्टारसमुहुत्ते दिवसे भवइ जहण्णिया दुवालसमुहुत्ता राती भवति एस णं दोच्चे छम्मासे एस णं
दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे
इति खलु तस्सेव आदिच्चस्स संवच्छरस्स सइं अट्टारसमुहुत्ते दिवसे भवइ सइं अट्टारसमुहुत्ता राती भवति
सइं दुवाल-समुहुत्ते दिवसे भवइ सइं दुवालसमुहुत्ता राती भवति पढमे छम्मासे अत्थि अट्टारसमुहुत्ता
राती नत्थि अट्टारसमुहुत्ते दिवसे अत्थि दुवालसमुहुत्ते दिवसे नत्थि दुवालसमुहुत्ता राती दोच्चे छम्मासे
अत्थि अट्टारसमुहुत्ते दिवसे नत्थि अट्टारसमुहुत्ता राती अत्थि दुवालसमुहुत्ता राती नत्थि दुवालसमुहुत्ते
दिवसे पढमे वा छम्मासे दोच्चे वा छम्मासे नत्थि पन्नरसमुहुत्ते दिवसे नत्थि पन्नरसमुहुत्ता राती
नन्नत्थ राइंदियाणं वड्ढोवुड्ढीए मुहुत्ताणं वा चयोवचएणं नन्नत्थ अणुवायईए गाहाओ भाणियव्वओ ।

◦ पढम पाहुडे पढमं पाहुड पाहुडं समत्तं ◦

□ बीयं पाहुडपाहुडं □

[२२] ता कहं ते अद्धमंडलसंठिती आहितेति वएज्जा तत्थ खलु इमे दुवे अद्धमंडलसंठिती
पन्नत्ता तं जहा- दाहिणा चएव अद्धमंडलसंठिती उत्तरा चएव अद्धमंडलसंठिती ता कहं ते दाहिणा० ता
अयण्णं जंबुद्धीवे दीवे सव्वदीवसमुद्दाणं सव्वब्भंतराए जाव परिकखेवेणं ता जया णं सूरिए सव्वब्भंतरं
दाहिणं अद्धमंडलसंठितिं उवसंकमित्ता चारं चरइ तथा णं उत्तमकड्डपत्ते उक्कोसए अट्टारसमुहुत्तेदिवसे
भवइ जहण्णिया दुवालसमुहुत्ता राती भवति से निक्खममाणे सूरिए नवं संवच्छरं आयमाणे पढमंसि
अहोरत्तंसि दाहिणाए अंतराए भागाए तस्सादिपदेसाए अब्भितराणंतरं उत्तरं अद्धमंडलसंठितिं उवसंकमित्ता

चारं चरइ जया णं सूरिए अब्भितराणंतरं उत्तरं अद्धमंडलसंठितिं उवसंकमित्ता चारं चरइ तथा णं अद्वारसमुहुत्ते दिवसे भवइ दोहिं एगद्धिभागमुहुत्तेहिं ऊणे दुवासलमुहुत्ता राती भवति दोहिं एगद्धिभागमुहुत्तेहिं अहिया से निक्खममाणे सूरिए दोच्चंसि अहोरत्तंसि उत्तराए अंतराए भागाए तस्सादिपदेसाए अब्भितरं तच्चं दाहिणं पाहुडं-१, पाहुडपाहुडं-२

अद्धमंडलसंठितिं उवसंकमित्ता चारं चरइ ता जया णं सूरिए अब्भितरं तच्चं दाहिणं अद्धमंडलसंठितिं उवसंकमित्ता चारं चरइ तथा णं अद्वारसमुहुत्ते दिवसे भवइ चउहिं एगद्धिभागमुहुत्तेहिं ऊणे दुवालसमुहुत्ता राती भवति चउहिं एगद्धिभागमुहुत्तेहिं अहिया एवं खलु एणं उवाएणं निक्खममाणे सूरिए तयाणंतराओ तयाणंतरं तंसि तंसि देसंसि तं तं अद्धमंडल संठिति संकममाणे संकममाणे दाहिणाएओ अंतराए भागाए तस्सादिपदेसाए सव्वबाहिरं उत्तरं अद्धमंडलसंठिति उवसंकमित्ता चारं चरइ ता जया णं सूरिए सव्वबाहिरं उत्तरं अद्धमंडलसंठितिं उवसंकमित्ता चारं चरइ ता जया णं सूरिए सव्वबाहिरं उत्तरं अद्धमंडलसंठितिं उवसंकमित्ता चारं चरइ तथा णं उत्तमकडुपत्ता उक्कोसिया अद्वारसमुहुत्ता राती भवति जहण्णाए दुवालसमुहुत्ते दिवसे भवइ एस णं पढमे छम्मासे एस णं पढमस्स छम्मासस्स पज्जवसाणे से पविसमाणे सूरिए दोच्चं छम्मासं अयमाणे पढमंसि अहोरत्तंसि उत्तराए अंतराए भागाए तस्सादिपदेसाए बाहिराणंतरं दाहिणं अद्धमंडलसंठितिं उवसंकमित्ता चारं चरइ ता जया णं सूरिए बाहिराणंतरं दाहिणं अद्धमंडलसंठितिं उवसंकमित्ता चारं चरइ तथा णं अद्वारसमुहुत्ता राती भवति दोहिं एगद्धिभागमुहुत्तेहिं ऊणा दुवालसमुहुत्ते दिवसे भवइ दोहिं एगद्धिभागमुहुत्तेहिं अहिए से पविसमाणे सूरिए दोच्चंसि अहोरत्तंसि दाहिणाए अंतराए भागाए तस्सादिपदेसाए बाहिरंतरं तच्चं उत्तरं अद्धमंडलसंठितिं उवसंकमित्ता चारं चरइ ता जया णं सूरिए बाहिरं तच्चं उत्तरं अद्धमंडलसंठितिं उवसंकमित्ता चारं चरइ तथा णं अद्वारसमुहुत्ता राती भवति चउहिं एगद्धिभागमुहुत्तेहिं ऊणा दुवालसमुहुत्ते दिवसे भवइ चउहिं एगद्धिभागमुहुत्तेहिं अहिए एवं खलु एणं उवाएणं पविसमाणे सूरिए तयाणंतराओ जाव संकममाणे उत्तराए अंतराए भागाए तस्सादिपदेसाए सव्वब्भंतरं दाहिणं अद्धमंडलसंठितिं उवसंकमित्ता चारं चरइ ता जया णं सूरिए सव्वब्भंतरं दाहिणं अद्धमंडलसंठितिं उवसंकमित्ता चारं चरइ तथा णं उत्तमकडुपत्ते उक्कोसेए अद्वारसमुहुत्तेदिवसे भवइ जहण्णिया दुवालसमुहुत्ता राती भवति एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे ।

[२३] ता कहं ते उत्तरा अद्धमंडलसंठिती आहितेति वएज्जा ता अयं णं जंबुद्धीवे दीवे सव्वदीवसमुद्दाणं सव्वब्भंतराए जाव परिकखेवेणं ता जया णं सूरिए सव्वब्भंतरं उत्तरं अद्धमंडलसंठितिं उवसंकमित्ता चारं चरइ तथा णं उत्तमकडुपत्ते उक्कोसेए अद्वारस मुहुत्ते दिवसे भवइ जहण्णिया दुवालसमुहुत्ता राती भवति जहा दाहिणा तथा चेव नवरं-उत्तरद्विओ अब्भितराणंतरं दाहिणं उवसंकमति दाहिणाओ अब्भितरं तच्चं उत्तरं उवसंकमति एवं खलु एणं उवाएणं जाव सव्वबाहिरं दाहिणं उवसंकमति सव्वबाहिरं दाहिणं उवसंकमित्ता दाहिणाओ बाहिराणंतरं उत्तरं उवसंकमति उत्तराओ बाहिरं तच्चं दाहिणं तच्चाओ दाहिणाओ संकममाणे-संकममाणे जाव सव्वब्भंतरं उवसंकमति तहेव एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे गाहाओ ।

◦ पढमे पाहुडे बीयं पाहुडपाहुडं समत्तं ◦

▣ तच्चं पाहुडपाहुडं ▣

[२४] ता के ते चिन्नं पडिचरइ आहितेति वएज्जातत्थ खलु इमे दुवे सूरियाभारहे चेव सूरिए एरवए चेव सूरिए ता एते णं दुवे सूरिया तीसाए तीसाए मुहुत्तेहिं एगमेगं अद्धमंडलं चरंति सद्धिए-पाहुडं-१, पाहुडपाहुडं-३

सद्धीए मुहुत्तेहिं एगमेगं मंडलं संघातेति ता निक्खममाणा खलु एते दुवे सूरिया नो अण्णमण्णस्स चिण्णं पडिचरंति पविसमाणा खलु एते दुवे सूरिया अण्णमण्णस्स चिण्णं पडिचरंति तं सतमेगं चोयालं तत्थ णं को हेतूति वएज्जा ता अयण्णं जंबुद्धीवे दीवे सव्वदीवसमुद्धानं सव्वभंतराए जाव परिकखेवेणं तत्थ णं अयं भारहए चेव सूरिए जंबुद्धीवस्स दीवस्स पाईणपडिणायताए उदीणदाहिणायताए जीवाए मंडलं चउवीसएणं सएणंछेत्ता दाहिणपुरत्थिमिल्लंसि चउभागमंडलंसि वाणउत्तिं सूरियगताइं चिण्णाइं पडिचरइ उत्तरपच्चत्थि मिल्लंसि चउभागमंडलंसि एककाणउत्तिं सूरियागताइं जाइं सूरिए अप्पाणं चेव चिण्णाइं पडिचरइ तत्थ अयं भारहे सूरिए एरवयस्स सूरियस्स जंबुद्धीवस्स दीवस्स पाईणपडीणायताए जाव छेत्ता उत्तरपुरत्थिमिल्लंसि चउभागमंडलंसि वाणउत्तिं सूरियगताइं जाइं सूरिए परस्स चिण्णाइं पडिचरइ दाहिणपच्चत्थिमिल्लंसि चउभागमंडलंसि एककाणउत्तिं सूरियगताइं जाइं सूरिए परस्स चेव चिण्णाइं पडिचरइ तत्थ अयं एरवए सूरिए जंबुद्धीवस्स दीवस्स पाईणपडीणायताए जाव छेत्ता उत्तरपुरत्थिमिल्लंसि चउभागमंडलंसि बाणउत्तिं सूरियगताइं जाइं सूरिए अप्पणा चेव चिण्णाइं पडिचरइ दाहिणपुरत्थिमिल्लंसि चउभागमंडलंसि एककाणउत्तिं सूरियगताइं जाइं सूरिए अप्पणा चेव चिण्णाइं पडिचरइ तत्थ अयं एरावतिए सूरिए भारहस्स सूरियस्स जंबुद्धीवस्स दीवस्स पाईणपडिणायताए जाव छेत्ता दाहिणपच्चत्थिमिल्लंसि चउभागमंडलंसि बाणउत्तिं सूरियगताइं सूरिए परस्स चिण्णाइं पडिचरइ उत्तरपुरत्थिमिल्लंसि चउभागमंडलंसि एककाणउत्तिं सूरियगताइं जाइं सूरिए परस्स चेव चिण्णाइं पडिचरइ ता निक्खममाणा खलु एते दुवे सूरिया नो अण्णमण्णस्स चिण्णं पडिचरंति पविसमाणा खलु एते दुवे सूरिया अण्णमण्णस्स चिण्णं पडिचरंति सतमेगं चोयालं गाहाओ ।

◦ पढमे पाहुडे तच्चं पाहुडपाहुडं समत्तं ◦

▣ चउत्थं पाहुडपाहुडं ▣

[२५] ता केवतियं एते दुवे सूरिया अण्णमण्णस्स अंतरं कट्टु चारं चरंति आहिताति वएज्जा तत्थ खलु इमाओ छ पडिवत्तीओ तत्थ एगे एवमाहंसु-ता एगं जोयणसहस्सं एगं च तेत्तीसं जोयणसत्तं अण्णमण्णस्स अंतरं कट्टु सूरिया चारं चरंति आहिताति वएज्जा-एगे एवमाहंसु एगे पुण एवमाहंसु-ता एगं जोयणसहस्सं एगं च चउतीसं जोयणसयं अण्णमण्णस्स अंतरं कट्टु सूरिया चारं चरंति आहिताति वएज्जा-एगे एवमाहंसु एगे पुण एवमाहंसु-ता एगं जोयणसहस्सं एगं च पणतीसं जोयणसयं अण्णमण्णस्स अंतरं कट्टु सूरिया चारं चरंति आहिताति वएज्जा-एगे एवमाहंसु एवं एगं दीवं एगं समुद्धं एगे पुण एवमाहंसु एगे पुण एवमाहंसु-ता तिण्णि दीवे तिण्णि समुद्धे अण्णमण्णस्स अंतरं कट्टु सूरिया चारं चरंति आहिताति वएज्जा-एगे एवमाहंसु, वयं पुण एवं वयामो-ता पंच पंच जोयणाइं पणतीसं च एगद्धिभागे जोणस्स एगमेगे मंडले अण्णमण्णस्स अंतरं अभिवड्ढेमाणा वा निवड्ढेमाणा वा सूरिया चारं चरंति आहिताति वएज्जा तत्थ

पं को हेतूति वएज्जा ता अयण्णं जंबुद्वीवे दीवे सव्वदीवसमुद्धानं सव्वब्भं-तराए जाव परिकखेवेणं पन्नत्ते ता जया पं एते दुवे सूरिया सव्वब्भंतरमंडलंउवसंकमित्ता चारं चरंति तया पं नवणउतिं जोयणसहस्साइं छत्त चत्ताले जोयणसए अण्णमण्णस्स अंतरं कट्टु चारं चरंति आहिताति वएज्जा तया पं उत्तमकट्टुपत्ते उक्कोसए अट्टारसमुहुत्ते दिवसे भवइ जहण्णिया दुवालसमुहुत्ता राती भवति ते निक्खममाणा सूरिया नवं संवच्छंर अयमाणा पढमंसि अहोरत्तंसि अब्भितराणंतरं मंडलं उवसंकमित्ता पाहुडं-१, पाहुडपाहुडं-४

चारं चरंति ता जया पं एते दुवे सूरिया अब्भितराणंतरं मंडल उवसंकमित्ता चारं चरंति तया पं नवणवतिं जोयणसहस्साइं छच्च पणयाले जोयणसए पणवीसं च एगट्ठिभागे जोयणस्स अण्णमण्णस्स अंतरं कट्टु चारं चरंति आहिताति वएज्जा तया पं अट्टारसमुहुत्ते दिवसे भवइ दोहिं एगट्ठिभागमुहुत्तेहिं ऊणे दुवाल-समुहुत्त राती भवति दोहिं एगट्ठिभागमुहुत्तेहिं अहिया ते निक्खममाणा सूरिया दोच्चंसि अहोरत्तंसि अब्भितरं तच्चं मंडलं उवसंकमित्ता चारं चरंति ता जया पं एते दुवे सूरिया अब्भितरं तच्चं मंडलं उवसंक-मित्ता चारं चरंति तया पं नवणवतिं जोयणसहस्साइं छच्च इक्कावण्णे जोयणसए नव य एगट्ठिभागे जोयणस्स अण्णमण्णस्स अंतरं कट्टु चारं चरंति आहिताति वएज्जा तया पं अट्टारसमुहुत्ते दिवसे भवइ-चउहिं एगट्ठिभागमुहुत्तेहिं ऊणे दुवालसमुहुत्ता राती भवति चउहिं एगट्ठिभागमुहुत्तेहिं अहिया एवं खलु एतेणुवाएणं निक्खममाणा एते दुवे सूरियातयाणंतराओ तयाणंतरं मंडलाओ मंडलं संकममाणा-संकममाणा पंच-पंच जोयणाइं पणतीसं च एगट्ठिभागे जोयणस्स एगमेगे मंडले अण्णमण्णस्स अंतरं अभिवड्ढेमाणा-अभिवड्ढेमाणा सव्वबाहिरं मंडलं उवसंकमित्ता चारं चरंति ता जया पं एते दुवे सूरिया सव्वबाहिरं मंडलं उवसंकमित्ता चारं चरंति तया पं एगं जोयणसयसहस्सं छच्च सट्ठे जोयणसए अण्णमण्णस्स अंतरं कट्टु चारं चरंति तया पं उत्तमकट्टुपत्ता उक्कोसिया अट्टारसमुहुत्ता राती भवति जहण्णए दुवालसमुहुत्ते दिवसे भवइ एस पं पढमे छम्मासे एस पं पढमस्स छम्मासस्स पज्जवसाणे, ते पविसमाणा सूरिया दोच्चं छम्मासं अयमाणा पढमंसि अहोरत्तंसि बाहिराणंतरं मंडलं उवसंकमित्ता चारं चरंति ता जया पं एते दुवे सूरिया बाहिराणंतरं मंडलं उवसंकमित्ता चारं चरंति तया पं एगं जोयणसयसहस्सं छच्च चउप्पण्णे जोयण-सए छव्वीसं च एगट्ठिभागे जोयणस्स अण्णमण्णस्स अंतरं कट्टु चारं चरंति आहिताति वएज्जा तया पं अट्टारसमुहुत्ता राती भवति दोहिं एगट्ठिभागमुहुत्तेहिं ऊणा दुवालसमुहुत्ते दिवसे भवइ दोहिं एगट्ठिभाग-मुहुत्तेहिं अहिए ते पविसमाणा सूरिया दोच्चंसि अहोरत्तंसि बाहिरं तच्चं मंडलं उवसंकमित्ता चारं चरंति वा जया पं एते दुवे सूरिया बाहिरं तच्चं मंडलं उवसंकमित्ता चारं चरंति तया पं एगं जोयणसय-सहस्सं छच्च अडयाले जोयणसए बावण्णं च एगट्ठिभागे जोयणस्स अण्णमण्णस्स अंतरं कट्टु चारं चरंति तया पं अट्टारसमुहुत्ता राती भवति चउहिं एगट्ठिभागमुहुत्तेहिं ऊणा दुवालसमुहुत्ते दिवसे भवइ चउहिं एगट्ठिभाग-मुहुत्तेहिं अहिए एवं खलु एतेणुवाएणं पविसमाणा एते दुवे सूरिया तयाणंतराओ जाव पणतीसे एगट्ठिभागे जोयणस्स एगमेगे मंडले अण्णमण्णस्स अंतरं निवुड्ढेमाणा-निवुड्ढेमाणा सव्वब्भंतरमंडलं उवसंकमित्ता चारं चरंति ता जया पं एते सूरिया सव्वब्भंतरं मंडलं उवसंकमित्ता चारं चरंति तया पं नवणउतिं जोयण-सहस्साइं छच्च चत्ताले जोयणसए अण्णमण्णस्स अंतरं कट्टु चारं चरंति तया पं उत्तमकट्टुपत्ते उक्कोसए अट्टारसमुहुत्ते दिवसे भवइ जहण्णिया दुवालसमुहुत्ता राती भवति एस पं दोच्चे छम्मासे एस पं दोच्चस्स छम्मासस्स पज्जवसाणे एस पं आदिच्चे संवच्छरे एस पं आदिच्चस्स संवच्छरस्स पज्जवसाणे ।

◦ पढमे पाहुडे चउत्थं पाहुडपाहुडं समत्तं ◦

◻ पंचमं पाहुडपाहुडं ◻

[२६] ता केवतियं ते दीवं समुद्धं वा ओगाहिक्ता सूरिए चारं चरइ आहितेति वएज्जा तत्थ खलु इमाओ पंच पडिवत्तीओ पन्नत्ताओ तत्थ एगे एवमाहंसु-ता एगं जोयणसहस्सं एगं च चेत्तीसं जोयण-सयं दीवं समुद्धं वा ओगाहिक्ता सूरिए चारं चरइ आहितेति वएज्जा-एगे एवमाहंसु, एगे पुण एवमाहंसु-ता

पाहुडं-१, पाहुडपाहुडं-५

एगं जोयणसहस्सं एगं च चउत्तीसं जोयणसयं दीवं समुद्धंवा ओगाहिक्तासूरिए चारं चरइ आहितेति वएज्जा-एगे एवमाहंसु, एगे पुणएवमाहंसु-ता एग जोयणसहस्सं एगं चपणतीसं जोयणसयं दीवं समुद्धं वा ओगा-हिक्ता सूरिए चारं चरइ आहितेति वएज्जा-एगे एवमाहंसु एगे पुण एवमाहंसु-ता अवड्ढं दीवं समुद्धं वा ओगाहिक्ता सूरिए चारं चरइ आहितेति वएज्जा-एगे एवमाहंसु एगे पुण एवमाहंसु-ता किंचि दीवं समुद्धंवा ओगाहिक्ता सूरिए चारं चरइ आहितेति वएज्जा-एगे एवमाहंसु तत्थ जेते एवमाहंसु-ता एगं जोयणसहस्सं एगं च तेत्तीसं जोयणसयं दीवं समुद्धं वा ओगाहिक्ता सूरिए चारं चरइ ते एवमाहंसु-ता जया णं सूरिए सव्व-ब्भंतरं मंडलं उवसंकमित्ता चारं चरइ तया णं जंबुद्धीवं दीवं एगं जोयणसहस्सं एगं च तेत्तीसं जोयणसयं ओगाहिक्तासूरिए चारं चरइ तया णं उत्तमकड्डपत्ते उक्कोसए अट्टारसमुहुत्ते दिवसे भवइ जहण्णिया दुवाल-समुहुत्ता राती भवति ता जया णं सूरिए सव्वबाहिरं मंडलं उवसंकमित्ता चारं चरइ तया णं लवणसमुद्धं एगं जोयणसहस्सं एगं च तेत्तीसं जोयणसयं ओगाहिक्ता चार चरइ तया णं उत्तमकड्डपत्ता उक्कोसिया अट्टार-समुहुत्ता राती भवति जहण्णए दुवालसमुहुत्ते दिवसे भवइ एवं चोत्तीसं जोयणसयं एवं पणतीस जोयणसयं तत्थ जेते एवमाहंसु-ता अवड्ढं दीवं समुद्धं वा ओगाहिक्ता सूरिए चारं चरइ ते एवमाहंसु-ता जया णं सूरिए सव्वब्भंतरं मंडलं उवसंकमित्ता चारं चरइ तया णं अवड्ढं जंबुद्धीवं दीवं ओगाहिक्ता चारं चरइ तया णं उत्तमकड्डपत्ते उक्कोसए अट्टारसमुहुत्ते दिवसे भवइ जहण्णिया दुवालसमुहुत्ता राती भवति एवं सव्वबाहिर-एवि नवरं-अवड्ढं लवणसमुद्धं तया णं राइंदियं तहेव तत्थ जेते एवमाहंसु-ता नो किंचि दीवं समुद्धं वा ओगाहिक्ता सूरिए चारं चरइ ते एवमाहंसु-ता जया णं सूरिए सव्वब्भंतरं मंडलं उवसंकमित्ता चारं चरइ तया णं नो किंचि दीवं समुद्धं वा ओगाहिक्ता सूरिए चारं चरइ तया णं उत्तमकड्डपत्ते उक्कोसेणं अट्टारसमुहुत्ते दिवसे भवइ तहेव एवं सव्वबाहिरए मंडले नवरं-नो किंचि लवणसमुद्धं ओगाहिक्ता चारं चरइ राइंदियं तहेव एगे एवमाहंसु ।

[२७] वयं पुण एवं वयामो-ता जया णं सूरिए सव्वब्भंतरं मंडलं उवसंकमित्ता चारं चरइ तया णं जंबुद्धीवं दीवं असीतं जोयणसतं ओगाहिक्ता चारं चरइ तया णं उत्तमकड्डपत्ते उक्कोसए अट्टारसमुहुत्ते दिवसे भवइ जहण्णिया दुवालसमुहुत्ता राती भवति एवं सव्वबाहिरेवि नवरंलवणसमुद्धं तिण्णि तीसे जोयणसए ओगाहिक्ता चारं चरइ तया णं उत्तमकड्डपत्ता उक्कोसिया अट्टारसमुहुत्ता राती भवति जहण्णए दुवालसमुहुत्ते दिवसे भवइ गाहाओ भाणियव्वाओ ।

◦ पढमे पाहुडे पंचमं पाहुडपाहुडं समत्तं ◦

◻ छड्डं पाहुडपाहुडं ◻

[२८] ता केवतियं ते एगमेगेणं राइंदिएणं विकंपइत्ता-विकंपइत्ता सूरिए चारं चरइ आहितेति वएज्जा तत्थ खलुइमाओ सत्त पडिवत्तीओ पन्नत्ताओ तत्थ एगे एवमाहंसु-ता दो जोयणाइं अद्धबायालीसं तेसीतिसतभागे जोयणस्स एगमेगेणं राइंदिएणं विकंपइत्ता-विकंपइत्ता सूरिए चारं चरइ आहितेति वएज्जा-एगे एवमाहंसु, एगे पुण एवमाहंसु-ता अइढाइज्जाइं जोयणाइं एगमेगेणं राइंदिएणं विकंपइत्ता० जाव एगे एवमाहंसु एगे पुण एवमाहंसु-ता तिभागूणाइं तिण्णि जोणाइं एगमेगेणं राइंदिएणं विकंपइत्ता जाव एग एवमाहंसु, एगे पुण एवमाहंसु-ता तिण्णि जोयणाइं अद्धसीतालीसं च तेसीतिसयभागे जोयणस्स एगमेगेणं राइंदिएणं विकंपइत्ता-विकंपइत्ता सूरिए चारं चरइ आहितेति वएज्जा-एगे एवमाहंसु एगे पुण एवमाहंसु-ता

पाहुडं-१, पाहुडपाहुडं-६

अद्धुवाइं जोयणाइं एगमेगेणं राइंदिएणं विकंपइत्ता जाव एगे एवमाहंसु एगे पुण एवमाहंसु-ता चउब्भा-गूणाइं चत्तारि जोयणाइं एगमेगेणं राइंदिएणं विकंपइत्ता जाव एगे एवमाहंसु एगे पुण एवमाहंसु-ता चत्तारि जोयणाइं अद्धबावण्णं च तेसीतिसयभागे जोयणस्स एगमेगेणं राइंदिएणं विकंपइत्ता चारं चरइ आहितेति वएज्जा-एगे एवमाहंसु, वयं पुण एवं वयामो-ता दो जोयणाइं अडतालीसं च एगद्धिभागे जोयणस्स एगमेगं मंडलं एगमेगेणं राइंदिएणं विकंपइत्ता-विकंपइत्ता सूरिए चारं चरइ तत्थ णं को हेतूति वएज्जा ता अयण्णं जंबुद्धीवे दीवे सव्वदीवमुद्दाणं सव्वब्भंतराए जाव परिकखेवेणं पन्नत्ते ता जया णं सूरिए सव्वब्भंतरं मंडलं उवसंकमित्ता चारं चरइ तया णं उत्तमकइपत्ते उक्कोसए अद्वारसमुहुत्ते दिवसे भवइ जहण्णिया दुवाल-समुहुत्ता राती भवति से निक्खममाणे सूरिए नवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमित्ता चारं चरइ ता जया णं सूरिए अब्भितराणंतरं मंडलं उवसंकमित्ता चारं चरइ तया णं दो जोयणाइं अडयालीसं च एगद्धिभागे जोयणस्स एगेणं राइंदिएणं विकंपइत्ता चारं चरइ तया णं अद्वार-समुहुत्ते दिवसे भवइ दोहिं एगद्धिभागमुहुत्तेहिं ऊणे दुवालसमुहुत्ता राती भवति दोहिं एगद्धिभागमुहुत्तेहिं अहिया से निक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमित्ता चारं चरइ ता जया णं सूरिए अब्भितरं तच्चं मंडलं उवसंकमित्ता चारं चरइ ता जया णं सूरिए अब्भितरं तच्चं मंडलं उवसंकमित्ता चारं चरइ तया णं पंच जोयणाइं पणतीसं एगद्धिभागे जोयणस्स दोहिं राइंदिएहिं विकंपइत्ता चारं चरइ तया णं अद्वारसमुहुत्ते दिवसे भवइ चउहिं एगद्धिभागमुहुत्तेहिं ऊणे दुवालसमुहुत्ता राती भवति चउहिं एगद्धिभागमुहुत्तेहिं अहिया एवं खलु एतेणं उवाएणं निक्खममाणे सूरिए तयाणंतराओ तयाणंतरं मंडलाओ मंडलं संकममाणेसंकममाणे दो-दो जोयणाइं अडतालीसं च एगद्धिभागे जोयणस्स एगमेगं अमंडलं एगमेगेणं राइंदिएणं विकंपमाणे-विकंपमाणे सव्वबाहिरं मंडलं उवसंकमित्ता चारं चरइ ता जया णं सूरिए सव्वब्भंतराओ मंडलाओ सव्वबाहिरं मंडलं उवसंकमित्ता चारं चरइ तया णं सव्वब्भंतरं मंडलं पणिहाय एगेणं तेसीतेणं राइंदियसतेणं पंचदसुत्तरजोयणसए विकंपइत्ता चारं चरइ तया णं उत्तमकइपत्ता उक्कोसिया अद्वारसमुहुत्ता राती भवति जहण्णए दुवालसमुहुत्ते दिवसे भवइ एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासंअयमाणे पढमंसि अहोरत्तंसि बाहि-राणंतरं मंडलं उवसंकमित्ता चारं चरइता जया णं सूरिए बाहिराणंतरं मंडलं उवसंकमित्ता चारं चरइ तया णं दो-दो जोयणिं अडतालीसं च एगद्धिभागे जोयणस्सएगेणं राइंदिएणं विकंपइत्ता चारं चरइ तया णं अद्वार-समुहुत्ता राती भवति दोहिं एगद्धिभागमुहुत्तेहिं ऊणा दुवालसमुहुत्ते दिवसे भवइ दोहिं एगद्धिभागमुहुत्तेहिं अहिए से

पविसमाणे सूरिएदोच्चंसि अहोरत्तंसि बाहिरतच्चं मंडलं उवसंकमिक्ता चारं चरइ तथा णं पंच जोयणाइं पणतीसं च एगद्धिभागे जोयणस्स दोहिं राइंदिएहिं विकंपइत्ता चारं चरइ राइंदिए तहेव एवं खलु एतेणुवाएणं पविसमाणे सूरिए तथाणंतराओ तथाणंतरं मंडलाओ मंडलं संकममाणे-संकममाणे दो-दो जोयणाइं अडयालीसं च एगद्धिभागे जोयणस्स एगमेगेणं राइंदिएणं विकंपमाणे-विकंपमाणे सव्वब्भंतरं मंडलं उवसंकमिक्ता चारं चरइ तथा णं सव्वबाहिरं मंडलं पणिहायं एगेणं तेसीतेणं राइंदियसतेणं पंचदसुत्तरे जोयणसते विकंपइत्ता चारं चरइ तथा णं उत्तमकट्टपत्ते उक्कोसए अद्वारसमुहुत्ते दिवसे भवइ जहणिया दुवालसमुहुत्ता राती भवति एस णं दोच्चे छम्मासे एस णं दोच्चस्स छम्मास्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे ।

◦ पढमे पाहुडे छड्डं पाहुडपाहुडं समत्तं ◦

पाहुडं-१, पाहुडपाहुडं-७

◻ सत्तमं पाहुडपाहुडं ◻

[२९] ता कहं ते मंडलसंठिती आहितेति वएज्जा तत्थ खलु इमाओ अट्ट पडिवत्तीओ पन्नत्ताओ तत्थ एगे एवमाहंसु-ता सव्वावि मंडलवता समचउरंससंठाणसंठिता पन्नत्ता-एगे एवमाहंसु, एगे पुण एवमाहंसु-ता सव्वावि मंडलवता विसमचउरंससंठाणसंठिता◦ एगे पुण एवमाहंसुता सव्वावि मंडलवता समचउक्कोणंसंठिता◦ एगे पुण एवमाहंसु-ता सव्ववि मंडलवता विसमचउक्कोणंसंठिता◦ एगे पुण एवमाहंसुता सव्वावि मंडलवता समचक्कवालसंठिता◦ एगे पुण एवमाहंसुता सव्वावि मंडलवता विसमचक्कवालसंठिता◦ एगे पुण एवमाहंसु-तासव्वावि मंडलवता चक्कद्धचक्कवालसंठिता◦ एगे पुण एवमाहंसुता सव्वावि मंडलवता छत्तागारसंठिता◦ तत्थ जेते एवमाहंसुता सव्वावि मंडलवता छत्तागारसंठिता पन्नत्ता एतेणं नएणं नायव्वं नो चेव णं इतरेहिं पाहुडगाहाओ भाणियव्वाओ ।

◦ पढमे पाहुडे सत्तमं पाहुडपाहुडं समत्तं ◦

◻ अट्टमं पाहुडपाहुडं ◻

[३०] ता सव्वावि णं मंडलवता केवतियं बाहल्लेणं केवतियं आयाम-विकखंभेणं केवतियं परिकखेवेणं अहिताति वएज्जा तत्थ खलु इमाओ तिण्णि पडिवत्तीओ पन्नत्ताओ तत्थ एगे एवमाहंसुता सव्वावि णं मंडलवता जोयणं बाहल्लेणं एगं जोयणसहस्सं एगं च तेत्तीसं जोयणसयं आयामविकखंभेणं तिण्णि जोयणसहस्साइं तिण्णि य नवणउए जोयणसए परिकखेवेणं पन्नत्ता-एगे एवमाहंसु, एगे पुण एवमाहंसु-ता सव्वावि णं मंडलवत्ता जोयण बाहल्लेणं एगं जोयणसहस्सं एगं च चउतीसं जोयणसयं आयामविकखंभेणं तिण्णि जोयणसहस्साइं चत्तारि बिउत्तरे जोयणसए परिकखेवेणं एगेपुण एवमाहंसु-ता सव्वावि णं मंडलवता जोयणं बाहल्लेणं एगं जोयणसहस्सं एगं च पणतीसं जोयणसयं आयाम-विकखंभेणं तिण्णि जोयणसहस्साइं चत्तारि य पंचुत्तरे जोयणसए परिकखेवेणं वयं पुण एवं वयामो तासव्वावि णं मंडलवता अडतालीसं एगद्धिभागे जोयणस्स बाहल्लेणं अणियता आयाम-विकखंभ-परिकखेवेणं अहिताति वएज्जा, तत्थ णं को हेतूति वएज्जा ता अयण्णं जंबुद्धीवे दीवे सव्वदीवसमुद्धानं सव्वब्भंतराए जाव परिकखेवेणं ता जया णं सूरिए सव्वब्भंतरं मंडलं उवसंकमिक्ता चारं चरइ तथा णं सा मंडलवता अडतालीसं एगद्धिभागे जोयणस्स बाहल्लेणं नवणउतिं जोयणसहस्साइं छच्च चताले जोयणसए

आयामविक्रंभेणं तिण्णि जोयणसयसहस्साइं पन्नरस य जोयणसहस्साइं एगूण्णिउतिं जोयणाइं किंचि विसेसाहिए परिकखेवेणं तथा णं उत्तमकडुपत्ते उक्कोसए अट्टारसमुहुत्ते दिवे भवइ जहण्णिया जहण्णिया दुवालसमुहुत्ता राती भवति से निक्खममाणे सूरिए नवं संवच्छरं अयमाणे पढमंसि अहोरत्तंसि अब्भितराणंतरं मंडलं उव-संकमित्ता चारं चरइ ता जया णं सूरिए अब्भितराणंतरं मंडलं उवसंकमित्ता चारं चरइ तथा णं सा मंडलता अडतालीसं एगड्ढिभागे जोयणस्स बाहल्लेणं नवणउतिंजोयणसहस्साइं छच्च पणयाले जोयणसए पणतीसं च एगड्ढिभागे जोयणस्स आयाम-विक्रंभेणं तिण्णि जोयणसयसहस्साइं पन्नरस य सहस्साइं एगं च सत्तुत्तरं जोयणसयं किंचिविसेसूणं परिकखेवेणं तथा णं दिवसराइप्पमाणं तहेव से निक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमित्ता चारं चरइ ता जया णं सूरिए अब्भितरं तच्चं मंडलं उवसंकमित्ता चारं चरइ तथा णं सा मंडलवता अडतालीसं एगड्ढिभागे जोयणस्स बाहल्लेणं नवणउतिं

पाहुडं-१, पाहुडपाहुडं-८

जोयणसहस्साइं छच्च एक्कावण्णे जोयणसए नव य एगड्ढिभागे जोयणस्स आयाम-विक्रंभेणं तिण्णि जोयणसयसहस्साइं पन्नरस य सहस्साइं एगं पणवीसं जोयणसयं परिकखेवेणं तथा णं दिवसराइं तहेव एवं खलु एतेणं उवाएणं निक्खममाणे सूरिए तथाणंतराओ तथाणंतरं मंडलाओ मंडलं संकममाणे-संकममाणे पंच-पंच जोयणाइं पणतीसं च एगड्ढिभागे जोयणस्स एगमेगे मंडले विक्रंभवुड्ढिं अभिवड्ढेमाणे-अभिवड्ढेमाणे अट्टारस-अट्टारस जोयणाइं परिरयवुड्ढिं अभिवड्ढेमाणे-अभिवड्ढेमाणे सव्वबाहिरं उवसं-कमित्ता चारं चरइ ता जया णं सूरिए सव्वबाहिरमंडलं उवसंकमित्ता चारं चरइ तथा णं सा मंडलवता अड-तालीसं एगड्ढिभागा जोयणस्स बाहल्लेणं एगं जोयणसयसहस्सं छच्च सट्ठे जोयणसए आयाम-विक्रंभेणं तिण्णि जोयणसयसहस्साइं अट्टारस सहस्साइं तिण्णि य पन्नरसुत्तरे जोयणसए परिकखेवेणं तथा णं उक्कोसिया अट्टारसमुहुत्ता राती भवति जहण्णए दुवालसमुहुत्ते दिवसे भवइ एस णं पढमे छम्मासे एस णं पढमस्स छम्मास्स पज्जवसाणे से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडल उवसंकमित्ता चारं चरइ ता जया णं सूरिए बाहिराणंतरं मंडलं उवसंकमित्ता चारं चरइ तथा णं सा मंडलवता अडतालीसं एगड्ढिभागे जोयणस्स बाहल्लेणं एगं जोयणसयसहस्सं छच्च चउप्पण्णे जोयणसए छव्वीसं च एगड्ढिभागे जोयणस्स आयाम-विक्रंभेणं तिण्णि जोयणसयसहस्साइं अट्टारस सहस्साइं दोण्णि य सत्ताणउए जोयणसए परिकखेवेणं तथा णं राइंदियं तहेव से पविसमाणे सूरिए दोच्चंसि अहोरत्तंसि बाहिरं तच्चं-मंडलं-उवसंकमित्ता चारं चरइ ता जया णं सूरिए बाहिरं तच्चं मंडलं उवसंकमित्ता चारं चरइ तथा णं सा मंडलवता अडतालीसं एगड्ढिभागे जोयणस्स बाहल्लेणं बाहल्लेणं नवणउतिं जोयण-सहस्साइं छच्च चत्ताले जोयणसए आयाम-विक्रंभेणं तिण्णि जोयणसयसहस्साइं पन्नरस य सहस्साइं अउणाउतिं च जोयणाइं किंचिविसेसाहियाइं परिकखेवेणं तथा णं उत्तमकडुपत्ते उक्कोसए अट्टारसमुहुत्ते दिवसे भवइ जहण्णिया दुवालसमुहुत्ता राती भवति एस णं दोच्चे छम्मासे एस णं दोच्चस्स छम्मास्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे ता सव्वावि णं मंडलवता अडतालीसं एगड्ढिभागे जोयणस्स बाहल्लेणं सव्वावि णं मंडलंतरिया दो जोयणाइं विक्रंभेणं एस णं अद्धा तेसीयसयपडुप्पण्णे पंचदसुत्तरे जोयणसए आहिताति वएज्जा ता अब्भितराओ मंडलवताओ बाहिरा मंडलवता बाहिराओ वा मंडलवताओ अब्भितरा मंडलवता एस णं अद्धा केवतियं आहितेति वएज्जा ता पंचदसुत्तरे जोयणसए अडतालीसं च एगड्ढिभागे जोयणस्स आहितेति वएज्जा ता अब्भितरओ मंडलवताओ

बाहिरा मंडलवता बाहिराओ वा मंडलवताओ अब्भंतरा मंडलवता एस णं अद्धा केवतियं आहितेति वएज्जा ता पंचणवुत्तरे जोयणसए तेरस य एगद्धिभागे जोयणस्स आहितेति वएज्जा ता अब्भितराए मंडलवताए बाहिरा मंडलवता बाहिराए वा मंडलवताए अब्भंतरा मंडलवता एस णं अद्धा केवतियं आहितेति वएज्जा ता पंचदसुत्तरे जोयणसए आहितेति वएज्जा।

◦ मुनि दीपरत्नसागरेण संशोधितः सम्पादित्तश्च पढमं पाहुडं समत्तं ◦

० बीयं पाहुडं ०

▣ पढमं पाहुडपाहुडं ▣

[३१] ता कहं ते तिरिच्छगती आहिताति वएज्जा तत्थ खलु इमाओ अद्ध पडिवत्तीओ पन्नत्ताओ तत्थ एगे एवमाहंसु-ता पुरत्थिमाओ लोयंताओ पादो मिरीची आगासंसि उत्तिद्धइ से णं इमं पाहुडं-२, पाहुडपाहुडं-१

तिरियं लोयं तिरियं करेइ करेत्ता पच्चत्थिमंसि लोयंतंसि सायं मिरीयं आगासंसि विद्धंसइ-एगे पुण एवमाहंसु-ता पुरत्थिमाओ लोयंताओ पादो सूरिए आगासंसि उत्तिद्धइ से णं इमं तिरियं लोयं तिरियं करेइ करेत्ता पच्चत्थिमंसि लोयंतंसि सायं सूरिए आगासंसि विद्धंसइ-एगे पुण एवमाहंसुता पुरत्थिमाओ लोयंताओ पादो सूरिए आगासंसि उत्तिद्धइ से णं इमं तिरियं लोयं तिरियं करेइ करेत्ता पच्चत्थिमंसि लोयंतंसि सायं सूरिए आगासं अनुपविसइ अनुपविसित्ता अहे पडियागच्छइ पडियागच्छित्ता पुनरवि अवरभूपुरत्थिमाओ लोयंताओ पादो सूरिए आगासंसि उत्तिद्धइ-एगे पुण एवमाहंसु-ता पुरत्थिमाओ लोयंताओ पाओ सूरिए पुढविकायंसि उत्तिद्धइ से णं इमं तिरियं लोयं तिरियं करेइ करेत्ता पच्चत्थिमिल्लंसि लोयंतंसि सायं सूरिए पुढविकायंसि विद्धंसइ-एगे पुण एवमाहंसु-ता पुरत्थिमाओ लोयंताओ पाओ सूरिए पुढविकायंसि उत्तिद्धइ से णं इमं तिरियं लोयं तिरियं करेइ करेत्ता पच्चत्थिमिल्लंसि लोयंतंसि सायं सूरिए पुढविकायंसि विद्धंसइ-एगे पुण एवमाहंसु-ता पुरत्थिमाओ लोयंताओ पाओ सूरिए पुढविकायंसि उत्तिद्धइ से णं इमं तिरियं लोयं तिरियं करेइ करेत्ता पच्चत्थिमिल्लंसि लोयंतंसि सायं सूरिए पुढविकायंसि उत्तिद्धइ-एगे पुण एवमाहंसु-ता पुरत्थिमिल्लाओ लोयंताओ पाओ सूरिए आउकायंसि उत्तिद्धइ से णं इमं तिरियं लोयं तिरियं करेइ करेत्ता पच्चत्थिमिल्लंसि लोयंतंसि पाओ सूरिए आउकायंसि विद्धंसइ-एगे पुण एवमाहंसु-ता पुरत्थिमाओ लोयंताओ पाओ सूरिए आउकायंसि उत्तिद्धइ से णं इमं तिरियं लोयं तिरियं करेइ करेत्ता पच्चत्थिमिल्लंसि लोयंतंसि सायं सूरिए आउकायंसि अनुपविसइ अनुपविसित्ता अहे पडियागच्छइ पडियागच्छित्ता पुनरवि अवरभूपुरत्थिमाओ लोयंताओ पाओ सूरिए आउकायंसि उत्तिद्धइ-एगे पुण एवमाहंसु-ता पुरत्थिमाओ लोयंताओ पाओ सूरिए आउकायंसि उत्तिद्धइ से णं इमं तिरियं लोयं तिरियं करेइ करेत्ता पच्चत्थिमिल्लंसि लोयंतंसि सायं सूरिए आउकायंसि अनुपविसइ अनुपविसित्ता अहे पडियागच्छइ पडियागच्छित्ता पुनरवि अवरभूपुरत्थिमाओ लोयंताओ पाओ सूरिए आउकायंसि उत्तिद्धइ-एगे पुण एवमाहंसु-ता पुरत्थिमाओ लोयंताओ बहूइं जोयणाइं बहूइं जोयणसयाइं बहूइं जोयणसहस्साइं उड्डं दूरं उप्पइत्ता एत्थ णं पाओ सूरिए आगासंसि उत्तिद्धइ से णं इमं दाहिणइडं लोयं तिरियं करेइ करेत्ता उत्तरइडलोयं तमेव राओ से णं इमं उत्तरइडलोयं तिरियं करेइ करेत्ता दाहिणइडलोयं तमेव राओ से णं इमाइं दाहिणुत्तरइड-लोयाइं तिरियं करेइ करेत्ता पुरत्थिमाओ लोयंताओ बहूइं जोयणाइं बहूइं जोयणसयाइं बहूइं जोयणसहस्साइं उड्डं दूरं उप्पइत्ता एत्थ णं पाओ सूरिए आगासंसि उत्तिद्धइ-वयं पुण एवं वयामो-ता जंबुद्धीवस्स दीवस्स पाईणव-डीणायताए उदीणदाहिणायताए जीवाए मंडलं चउव्वीसेणं सएणं छेत्ता दाहिणपुरत्थिमंसि उत्तरपच्चत्थिमंसि य चउव्वभागमंडलंसि इमीसे रयणप्पभाए पुढवीए बहुसमरमणिज्जाओ

भूमिभागाओ अद्द जोयणसयाइं उड्डं उप्पइत्ता एत्थ णं पाओ दुवे सूरिया उत्तिड्ढंति ते णं इमाइं दाहिणुत्तराइं जंबुद्वीवभागाइं तिरियं करंति करेत्ता पुरत्थिमपच्चत्थिमाइं जंबुद्वीवभागाइं तामेव राओ ते णं इमाइं पुरत्थिमपच्चत्थिमाइं जंबुद्वीवभागाइं तिरियं करंति करेत्ता दाहिणुत्तराइं जंबुद्वीवभागाइं तामेव राओ ते णं इमाइं दाहिणुत्तराइं पुरत्थिमपच्चत्थिमाणि य जंबुद्वीवभागाइं तिरियं करंति करेत्ता जंबुद्वीवस्स दीवस्स पाईणपडीणायताए जाव छेत्ता दाहिणपुरत्थिमिल्लंसि उत्तरपच्चत्थिमिल्लंसि य चउभागमंडलंसि इमीसे रयणप्पभाए बहुसमरमणि-ज्जाओ भूमिभागाओ अद्द जोयणसयाइं उड्डं उप्पइत्ता एत्थ णं पाओ दुवे सूरिया आगासंसि उत्तिड्ढंति ।

◦ बीए पाहुडे पढमं पाहुडपाहुडं समत्तं ◦

◻ बीयं पाहुडपाहुडं ◻

[३२] ता कहं ते मंडलाओ मंडलं संकममाणे सूरिए चारं चरति आहिताति वएज्जा तत्थ पाहुडं-२, पाहुडपाहुडं-२

खलु इमाओ दुवे पडिवत्तीओ पन्नत्ताओ तत्थेगे एवमाहंसु-ता मंडलाओ मंडलं संकममाणे सूरिए भेयघाएणं संकमति-एगे एवमाहंसु, एगे पुण एवमाहंसु-ता मंडलाओ मंडलं संकममाणे सूरिए कण्णकलं निव्वेढेति तत्थ जेते एवमाहंसु-ता मंडलाओ मंडलं संकममाणे सूरिए भेयघाएणं संकमति तेसि णं अयं दोसे ता जेणंतरेणं मंडलाओ मंडलं संकममाणे सूरिए भेयघाएणं संकमति एवतियं च णं अद्दं पुरतो न गच्छति पुरतो अगच्छमाणे मंडलकालं परिहवेति तेसि णं अयं दोसे तत्थ जेते एवमाहंसु-ता मंडलाओ मंडलं संकममाणे सूरिए कण्णकलं निव्वेढेति तेसि णं अयं विसेसे ता जेणंतरेणं मंडलाओ मंडलं संकममाणे सूरिए कण्णकलं निव्वेढेति एवतियं च णं अद्दं पुरतो गच्छति पुरतो गच्छमाणे मंडलकालं न परिहवेति तेसि णं अयं विसेसे तत्थ जेते एवमाहंसु-ता मंडलाओ मंडलं संकममाणे सूरिए कण्णकलं निव्वेढेइ एतेणं नएणं नेयव्वं नो चेव णं इतरेणं ।

◦ बीए पाहुडे बीयं पाहुडपाहुडं समत्तं ◦

◻ तच्चं पाहुडपाहुडं ◻

[३३] ता केवतियं ते खेत्तं सूरिए एगमेगेमं मुहुत्तेणं गच्छति आहितातिवएज्जा तत्थ खलु इमाओ चत्तारि पडिवत्तीओ पन्नत्ताओ तत्थ एगे एवमाहंसु-ता छ छ जोयणसहस्साइं सूरिए एगमेगेणं मुहुत्तेणं गच्छति-एगे पुण एवमाहंसु-ता पंच-पंच जोयणसहस्साइं सूरिए एगमेगेणं मुहुत्तेणं गच्छति-एगे पुण एवमाहंसु-ता चत्तारि-चत्तारि जोयणसहस्साइं सूरिए एगमेगेणं मुहुत्तेणं गच्छति-एगे पुण एवमाहंसु-ता छवि पंचवि चत्तारिवि जोयणसहस्साइं सूरिए एगमेगेमं मुहुत्तेणं गच्छति-तत्थ जेते एवमाहंसु-ता छ छ जोयणसहस्साइं सूरिए एगमेगेणं मुहुत्तेणं गच्छति ते एवमाहंसु-ता जया णं सूरिए सव्वब्भंतरं मंडलं उव-संकमित्ता चारं चरति तया णं उत्तमकड्डपत्ते उक्कोसे अट्टारसमुहुत्ते दिवसे भवइ जहणिया दुवालसमुहुत्ता राती भवति तंसि च णं दिवसंसि एगं जोयणसयसहस्सं अद्दं य जोयणसहस्साइं तावक्खेत्ते पन्नत्ते ता जया णं सूरिए सव्वबाहिरं मंडलं उवसंकमित्ता चारं चरति तया णं उत्तम-कड्डपत्ता उक्कोसिया अट्टार-समुहुत्ता राती भवति जहणए दुवालसमुहुत्ते दिवसे भवइ तंसि च णं दिवसंसि बावत्तरिं जोयणसहस्साइं तावक्खेत्ते पन्नत्ते◦ तत्थ जेते एवमाहंसु-ता पंच-पंच जोयणसहस्साइं सूरिए

एगमेगेणं मुहुत्तेणं गच्छति ते एवमाहंसु-ता जया णं सूरिए सव्वब्भंतरं मंडलं उवसंकमित्ता चारं चरति तहेव दिवसराइप्पमाणं तंसि च णं दिवसंसि नवतिं जोयणसहस्साइं तावक्खत्ते पन्नत्ते ता जया णं सूरिए सव्व-बाहिरं मंडलं उवसंकमित्ता चारं चरइ तथा णं तं चैव राइंदियप्पमाणं तंसि च णं दिवसंसि सद्धिं जोयण-सहस्साइं तावक्खत्ते पन्नत्ते० तत्थ णं जेते एवमाहंसुता चत्तारि-चत्तारि जोयणसहस्साइं सूरिए एगमेगेणं मुहुत्तेणं गच्छइ ते एवमाहंसु-ता जया णं सूरिएसव्वब्भंतरं मंडलं उवसंकमित्ता चारं चरति तथा णं दिवसराइं तहेव तंसि च णं दिवसंसि बावत्तरिं जोयणसहस्साइं तावक्खत्ते पन्नत्ते ता जया णं सूरिए सव्वबाहिरं मंडलं उवसंकमित्ता चारं चरति तथा णं राइंदियं तहेव तंसि च णं दिवसंसिअडतालीसंजोय-णसहस्साइं तावक्खत्ते पन्नत्ते [तया णं चत्तारि-चत्तारि जोयणसहस्साइं सूरिए एगमेगेणं मुहुत्तेणं गच्छति] तत्थ जेते एवमाहंसु-ता छविपंचविचत्तारिवि-जोयणसहस्साइं सूरिए एगमेगेणं मुहुत्तेणं गच्छति ते एवमाहंसु-ता सूरिए णं उग्गमणमुहुत्तंसि अत्थमण-मुहुत्तंसि य सिग्घगती भवति तथा णं छ-छ जोयणसहस्साइं एगमेगेणं मुहुत्तेणं गच्छति मज्झिमतावक्खत्तं समासादेमाणे-समासादेमाणे सूरिए मज्झिमगती भवति तथा णं पंच-पंच जोयणसहस्साइं एगमेगेणं मुहुत्तेणं पाहुडं-२, पाहुडपाहुडं-३

गच्छति मज्झिमं तावक्खत्तं संपत्ते सूरिए मंदगती भवति तथा णं चत्तारि चत्तारि जोयणसहस्साइं एगमेगेणं मुहुत्तेणं गच्छति तत्थ को हेतूति वएज्जा ता अयण्णं जंबुद्धीवे दीवे सव्वदीवसमुद्दाणं सव्वब्भंतराए जाव परिक्खेवेणं ता जया णं सूरिए सव्वब्भंतरं मंडलं उवसंकमित्ता चारं चरति तथा णं दिवसराइं तहेव तंसि च णं दिवसंसि एककाणउतिं जोयणसहस्साइं तावक्खत्ते पन्नत्ते ता जया णं सूरिए सव्वबाहिरं मंडलं उवसंकमित्ता चटारं चरति तथा णं राइंदियं तहेव तस्सिं च णं दिवसंसि एगद्धिजोयणसहस्साइं तावक्खत्ते पन्नत्ते तथा णंछवि पंचवि चत्तारिवि जोयणसहस्साइं सूरिए एगमेगेणं मुहुत्तेणं गच्छति-वयं पुण एवं वयामो-ता सातिरेगाइं पंच-पंचजोयणसहस्सिं सूरिए एगमेगेणं मुहुत्तेणं गच्छति तत्थ को हेतूति वएज्जा ता अयण्णं जंबुद्धीवे दीवे सव्वदीवसमुददणं सव्वब्भंतराए जाव परिक्खेवेणं ता जया णं सूरिए सव्वब्भंतरं मंडलं उवसंकमित्ता चारं चरति तथा णं पंच-पंच जोयणसहस्साइं दोण्णि य एककावण्णे जोयणसए एगूणतीसं च सद्धिभागे जोयणस्स एगमेगेणं मुहुत्तेणं गच्छति तथा णं इहगतस्स मणुस्सस्स सीतालीसाए जोयणसहस्सेहिं दोहि य तेवड्ढेहिं जोयणसएहिं एगवीसाए य सद्धिभागेहिं जोणस्स सूरिए चक्खुप्फासं हव्वमागच्छइ तथा णं दिवसे राइं तहेव ।

से निक्खममाणे सूरिए नवं संवच्छरं अयमाणे पढमंसि अहोरत्तंसि अब्भंतराणंतरं मंडलं उवसंकमित्ता चारं चरति ता जया णं सूरिए अब्भंतराणंतरं मंडलं उवसंकमित्ता चारं चरति तथा णं पंच-पंच जोयणसहस्साइं दोण्णि य एककावण्णे जोयणसए सीतालीसं च सद्धिभागे जोयणस्स एगमेगेणं मुहुत्तेणं गच्छति तथा णं इहगतस्स मणुसस्स सीतालीसाए जोयणसहस्सेहिं अउणासीते य जोयणसए सत्तावण्णाए सद्धिभागेहिं जोयणस्स सद्धिभागं च एगद्धिहा छेत्ता अउणावीसाए चुण्णियाभागेहिं सूरिएचक्खुप्फासं हव्वमागच्छति तथा णं दिवसराइं तहेव से निक्खममाणे सूरिए दोच्चंसि अहोरत्तंसि अब्भंतरतच्चं मंडलं उवसंकमित्ता चारं चरति जोयणसहस्साइं दोण्णि य बावण्णे जोयणसए पंच य सद्धिभागे जोयणस्स एगमेगेणं मुहुत्तेणं गच्छति तथा णं इहगतस्स मणुसस्स सीतालीसाए जोयणसहस्सेहिं छण्णउतीए य जोयणेहिं तेत्तीसाए य सद्धिभागेहिं जोयणस्स सद्धिभागं च एगद्धिहा छेत्ता दोहिं चुण्णियाभागेहिं सूरिए चक्खुप्फासं हव्वमागच्छति तथा णं दिवसराइं तहेव एवं खलु एतेणं उवाएणं

निक्खममाणे सूरिए तयाणंतराओ तयाणंतरं मंडलाओ मंडलं संकममाणे संकममाणे अद्वारस-अद्वारस सद्धिभागे जोयणस्स एगमेगे मंडले मुहुत्तगतिं अभिवुड्ढमाणे-अभिवुड्ढमाणे चुलसीतिं सीताइं जोयणाइं पुरिसच्छायं निवुड्ढमाणे-निवुड्ढमाणे सव्वबाहिरं मंडलं उवसंकमित्ता चारं चरति ता जया णं सूरिए सव्वबाहिरं मंडलं उवसंकमित्ता चारं चरति तया णं पंच-पंच जोयणसहस्साइं तिण्णिम य पंचुत्तरे जोयणसते पन्नरस य सद्धिभागे जोयणस्स एगमेगेणं मुहुत्तेणं गच्छति तया णं इहगतस्स मणूसस्स एककीसाए जोयणसहस्सेहिं अद्धिं एककीसेहिं जोयणसतेहिं तीसाए य सद्धिभागेहिं जोयणस्स सूरिए चक्खुप्फासं हव्वमागच्छति तया णं उत्तमकट्टपत्ता उक्कोसिया अद्वारसमुहुत्ता राती भवति जहण्णए दुवालसमुहुत्ते दिवसे भवइ एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमित्ता चारं चरति ता जया णं सूरिए बाहिराणंतरं मंडलं उवसंकमित्ता चारं चरति तया णं पंच-पंच जोयणसहस्साइं तिण्णि य चउरुत्तरे जोयणसते सत्तावण्णं च सद्धिभाए जोयणस्स एगमेगेणं मुहुत्तेणं गच्छइ तया णं इहगतस्स मणूसस्स एककीसाए जोयणसहस्सेहिं नवहि य सोलेहिं जोयणसतेहिं एगूणतालीसाए सद्धिभागेहिं जोयणस्स सद्धिभागं च एगद्धिहा छेत्ता सद्धिए पाहुडं-२, पाहुडपाहुडं-३

चुण्णियाभागे सूरिए चक्खुप्फासं हव्वमागच्छति तया णं राइंदियं तहेव से पविसमाणे सूरिए दोच्चंसि अहोरत्तंसि बाहिरतच्चं मंडलं उवसंकमित्ता चारं चरति ता जया णं सूरिए बाहिरतच्चं मंडलं उवसंकमित्ता चारं चरति तया णं पंच-पंच जोयणसहस्साइं तिण्णि य चउत्तरे जोयणसए ऊतालीसं च सद्धिभागे जोयणस्स एगमेगेणं मुहुत्तेणं गच्छति तया णं इहगतस्स मणूसस्स एगाहिगेहिं बत्तीसाए जोयणसहस्सेहिं एगूणपण्णाए य सद्धिभागेहिं जोयणस्स सद्धिभागं च एगद्धिहा छेत्ता तेवीसाए चुण्णियाभागेहिं सूरिए चक्खुप्फासं हव्वमागच्छति राइंदियं तहेव एवं खलु एतेणुवाएणं पविसमाणे सूरिए तयाणंतराओ तयाणंतरं मंडला मंडलं संकममाणे-संकममाणे अद्वारस-अद्वारस सद्धिभागे जोयणस्स एगमेगे मंडले मुहुत्तगतिं निवुड्ढमाणे-निवुड्ढमाणे सव्वब्भंतरे मंडलं उवसंकमित्ता चारं चरति ता जया णं सूरिए सव्वब्भंतरं मंडलं उवसंकमित्ता चारं चरति तया णं पंच-पंच जोयणसहस्साइं दोण्णि य एककावण्णे जोयणसए अउणतीसं च सद्धिभागे जोयणस्स एगमेगेणं मुहुत्तेणं गच्छति तया णं इहगतस्स मणूसस्स सीतालीसाए जोयणसहस्सेहिं दोहि य तेवडेहिं जोयणसतेहिं एककीसाए य सद्धिभागेहिं जोयणस्स सूरिए चक्खुप्फासं हव्वमागच्छति तया णं उत्तमकट्टपत्ते उक्कोसए अद्वारसमुहुत्ते दिवसे भवइ जहण्णिया दुवालसमुहुत्ता राती भवति एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे ।

◦ मुनि दीपरत्नसागरेण संशोधितः सम्पादित्तश्च दोच्चं पाहुडं समत्तं ◦

□ तच्चं पाहुडं □

[३४] ता केवतियं खेत्तं चंदिमसूरिया ओभासंति उज्जोर्वेति तवेति पगासेति आहिताति वएज्जा तत्थ खलु इमाओ वारस पडिवत्तीओ पन्नत्ताओ तत्थेगे एवमाहंसु-ता एगं दीवं एगं समुदं चंदिमसूरिया ओभासंति जाव पगासेति एगे पुम एवमाहंसुता तिण्णि दीवे तिण्णि समुद्रे चंदिमसूरिया ओभासंति जाव पगासेति-एगे पुण एवमाहंसु-ता अद्दुडे दीवे अद्दुडे समुद्रे चंदिमसूरिया ओभासंति जाव

पगासैति-एगे पुण एवमाहंसु-ता सत्त दीवे सत्त समुद्धे चंदिमसूरिया ओभासंति जाव पगासैति-एगे पुण एवमाहंसु-ता दस दीवे दस समुद्धे चंदिमसूरिया ओभासंति जाव पगासैति-एगे पुण एवमाहंसु-ता बारस दीवे बारस समुद्धे चंदिमसूरिया ओभासंति जाव पगासैति-एगे पुण एवमाहंसु-ता बायालीसं दीवे बायालीसं समुद्धे चंदिमसूरिया ओभासंति जाव पगासैति-एगे पुण एवमाहंसु-ता बावत्तरिं दीवे बावत्तरिं समुद्धे चंदिमसूरिया ओभासंति जाव पगासैति-एगे पुण एवमाहंसु-ता बायालीसं दीवसतं बायालं समुद्धसतं चंदिमसूरिया ओभासंति जाव पगासैति-एगे पुण एवमाहंसु-ता बावत्तरिं दीवसतं बावत्तरिं समुद्धसतं चंदिमसूरिया ओभासंति जाव पगासैति-एगे पुण एवमाहंसु-ता बायालीसं दीवसहस्सं बायालं समुद्धसहस्सं चंदिमसूरिया ओभासंति जाव पगासैति-एगे पुण एवमाहंसु-ता बावत्तरिं दीवसहस्सं बावत्तरिं समुद्धसहस्सं चंदिमसूरिया ओभासंति जाव पगासैति-वयं पुण एवं वयामो-ता अयण्णं जंबुद्धीवे दीवे सव्वदीवसमुद्धाणं सव्वब्भंतराए जाव परिक्खेवेणं पन्नत्ते से णं एगाए जगतीए सव्वओ समंता संपरिक्खित्ते सा णं जगती तहेव जहा जंबुद्धीवपन्नत्तीए जाव एवमामेव सपुव्वावरेणं जंबुद्धीवे दीवे चोद्धससलिलासयसहस्सा छप्पन्नं च सलिलासहस्सा भवंतीति मक्खाता जंबुद्धीवे णं दीवे पंचक्कभागसंठिते आहितेति वएज्जा ता कहं जंबुद्धीवे दीवे पंचक्कभागसंठिते आहितेति वएज्जा ता जया णं एते दुवे सूरिया सव्वब्भंतरं मंडलं उवसंकमिक्खा पाहुडं-३

चारं चरंति तया णं जंबुद्धीवस्स तिण्णि पंचक्कभागे ओभासंति उज्जोवेंति तवेंति पगासैति तं जहा- एगेवि एगं दिवड्ढं पंचक्कभागं ओभासति जाव पगासैति एगेवि एगं दिवड्ढं पंचक्कभागं ओभासति जाव पगासैति तया णं उत्तमकट्टपत्ते उक्कोसए अट्टारसमुहुत्ते दिवसे भवइ जहण्णिया दुवालसमुहुत्ता राती भवति ता जया णं एते दुवे सूरिया सव्वबाहिरं मंडलं उवसंकमिक्खा चारं चरंति तया णं जंबुद्धीवस्स दीवस्स दोण्णि चक्कभागे ओभासंति उज्जोवेंति तवेंति पगासैति तं जहा- एगेवि सूरिए एगं पंचक्कवालभागं ओभासति जाव पगासैति एगेवि एगं पंचक्कवालभागं ओभासति जाव पगासैति तया णं उत्तमकट्टपत्ता उक्कोसिया अट्टारसमुहुत्ता राती भवति जहण्णए दुवालसमुहुत्ते दिवसे भवइ ।

• मुनि दीपरत्नसागरेण संशोधितः सम्पादित्तश्च तच्चं पाहुडं समत्तं •

□ चउत्थं पाहुडं □

[३५] ता कहं ते सेयताए संठिती आहिताति वएज्जा तत्थ खलु इमा दुविधा संठिती पन्नत्ता तं जहा- चंदिमसूरियसंठिती य तावक्खेत्तसंठिती य ता कहं ते चंदिमसूरियसंठिती आहिताति वएज्जा तत्थ खलु इमाओ सोलस पडिवत्तीओ पन्नत्ताओ तत्थेगे एवमाहंसु-ता समचउरससंठिता चंदिम-सूरियसंठिती पन्नत्ता-एगे पुण एवमाहंसु-ता विसमचउरससंठिता चंदिमसूरियसंठिती पन्नत्ता-एवं समच-उक्कोणसंठिता विसमचउक्कोणसंठिता समचक्कवालसंठिता विसमचक्कवालसंठिता चक्कद्धचक्कवालसंठिता चंदिमसूरियसंठिती पन्नत्ता-एगे पुण एवमाहंसु-ता छत्तागारसंठिता चंदिमसूरियसंठिती पन्नत्ता-एवं गेह-संठिता गेहावणसंठिता पासादसंठिता गोपुरसंठिता पेच्छाघरसंठिता वलभीसंठिता हम्मियतलसंठिता एगे पुण एवमाहंसुता वालग्गपोतियासंठिता चंदिमसूरियसंठिती पन्नत्ता-तत्थ जेते एवमाहंसु-ता समचउरसंठिता चंदिमसूरियसंठिती पन्नत्ता एतेणं नएणं नेयव्वं नो चेव णं इतरेहिं, ता कहं ते तावक्खेत्तसंठिती आहिताति वएज्जा तत्थ खलु इमाओ सोलस पडिवत्तीओ पन्नत्ताओ तत्थेगे एवमाहंसु-ता गेहसंठिता तावक्खेत्तसंठिती पन्नत्ता एवं जाव वालग्गपोतियासंठिता तावक्खेत्त-संठिती पन्नत्ता-एगे पुणए वमाहंसु-

ता जस्संठिते जंबुद्वीवे दीवे तस्संठिता तावक्खे-त्तसंठिती पन्नत्ता-एगे पुण एवमाहंसु-ता जस्संठिते भारहे वासे तस्संठिता तावक्खे-त्तसंठिती पन्नत्ता-एवं उज्जाणसंठिता निज्जाणसंठिता एगतो निसहसंठिता दुहतो निसहसंठिता सेयणगसंठिता-एगे पुण एवमाहंसु-ता सेणगपट्टसंठिता तावक्खेत्तसंठिती पन्नत्ता-एगे एवमाहंसु वयं पुण एवं वदामो-ता उड्डीमुहकलंबुयापुप्फसंठिता तावक्खेत्तसंठिती पन्नत्ता-अंतो संकुया बाहिं वित्थडा अंतो वट्टा बाहिं पिहुला अंतो अंकमुहसंठिता बाहिं सत्थीमुहसंठिता उभओ पासेणं तीसे दुवे बाहाओ अणवट्टियाओ भवंति पणयालीसंपणयालीसं जोयणसहस्साइं आयामेणं दुवे य णं तीसे बाहाओ अणवट्टियाओ भवंति तं जहा- सव्वब्भंतरिया चेव बाहा सव्वबाहिरिया चेव बाहा तत्थ को हेतूति वेज्जा ता अयण्णं जंबुद्वीवे दीवे सव्वदीवसमुद्धानं सव्वब्भंतराए जाव परिक्खेवेणं ता जया णं सूरिए सव्वब्भंतरं मंडलं उवसंकमित्ता चारं चरइ तया णं उड्डीमुहकलंबुयापुप्फसंठिता तावक्खेत्तसंठिती आहिताति वएज्जा अंतो संकुया बाहिं वित्थडा अंतो वट्टा बाहिं पिहुला अंतो अंकमुहसंठिया बाहिं सत्थीमुहसंठिता उभओ पासेणं तीसे तहेव जाव सव्वबाहिरिया चेव बाहा तीसे णं सव्वब्भंतरिया बाहा मंदरपव्वयंतेणं नव जोयणसहस्साइं चत्तारि य छलसीए जोयमसए नव य दसभागे जोयणस्स परिक्खेवेणं आहिताति वएज्जा ता से णं परिक्खेवविसेसे कतो आहितेति वएज्जा ता जे णं मंदरस्स पव्वयस्स परिक्खेवे तं परिक्खेवं तिहिं गुणेत्ता दसहिं

छेत्ता
पाहुडं-४

दसहिं भागे हीरमाणे एस णं परिक्खेवविसेसे आहितेति वएज्जा तीसे णं सव्वबाहिरिया बाहा लवण-समुद्धंतेणं चउणउतिं जोयणसहस्साइं अट्ट य अट्टसट्टे जोयणसए चत्तारि य दसभागे जोयणसस्स परिक्खेवेणं आहिताति वएज्जा ता से णं परिक्खेवविसेसे कतो आहितेति वएज्जा ता जे णं जंबुद्वीवस्स दीवस्स परिक्खेवे तं परिक्खेवं तिहिं गुणेत्ता दसहिं छेत्ता दसहिं भागे हीरमाणे एस णं परिक्खेवविसेसे आहितेति वएज्जा ता से णं तावक्खेत्ते केवतियं आयामेणं आहितेति वएज्जा ता अट्टत्तरिं जोयणसहस्साइं तिण्णि य तेत्तीसे जोयणसए जोयणतिभागे य आयामेणं हितेति वएज्जा तया णं किसंठिया अंधयारसंठिती आहिताति वएज्जा ता उड्डीमुहकलंबुयापुप्फसंठिता तहेव जाव बाहिरिया उड्डीमुहकलंबुयापुप्फसंठिता आहिताति वएज्जा अंतो संकुया बाहिं वित्थडा तं चेव जाव दुवे य णं तीसे बाहाओ अणवट्टियओ भवंति तं जहा- सव्वब्भंतरिया चेव बाहा सव्व बाहिरिया चेव बाहा तीसे णं सव्वब्भंतरिया बाहा मंदरपव्वयंतेणं छज्जोयणसहस्साइं तिण्णि य चउवीसे जोयणसए छच्च दसभागे जोयणस्स परिक्खेवेणं आहितेति वएज्जा ती से णं परिक्खेवविसेसे कतो आहितेति वएज्जा ता जे णं मंदरस्स पव्वयस्स परिक्खेवे, तं परिक्खेवं दोहिं गुणेत्ता जाव तीसे णं सव्वबाहिरिया बाहा लवणसमुद्धं तेणं तेवट्टी जोयणसहस्साइं दोण्णि य पणयाले जोयणसए छच्च दसभागे जोयणस्स परिक्खेवेणं आहितेति वएज्जाता जे णं जंबुद्वीवस्स दीवस्स परिक्खेवे तं परिक्खेवं दोहिं गुणेत्ता सेसं तं चेव ता सेणं अंधयारे केवतियं आयामेणं आहितेति वेज्जा ता अट्टत्तरिं जोयणसहस्साइं तिण्णि य तेत्तीसे जोयणसए जोयणतिभागं च आयामेणं आहितेतिवएज्जा तया णं उत्तम-कट्टपत्ते अट्टारसमुहुत्ते दिवसे भवइ जहण्णिया दुवालसमुहुत्ता राती भवति ता जया णं सूरिए सव्वबाहिरं मंडलं उवसंकमित्ता चारं चरति तया णं किसंठिता तावक्खेत्तसंठिती आहिताति वएज्जा ता उड्डीमुहक-लंबुयापुप्फसंठिता तावक्खेत्तसंठिती आहिताति वएज्जा एवं जं अब्भित्तरमंडले अंधयारसंठितीए पमाणं तं बाहिरमंडले तावक्खेत्तसंठितीए जं तहिं तावक्खेत्तसंठितीए तं बाहिरमंडले अंधयार संठितीए भाणियव्वं जाव तया णं उत्तमकट्टपत्ता

उक्कोसिया अद्वारसमुहुत्ता राती भवति जहण्णए दुवालसमुहुत्ते दिवसे भवइ ता जंबुद्धीवे णं दीवे सूरिया एगं जोयणसयं उड्ढं तवयंति अद्वारस जोयणसयाइं अहे तवयंति सीयालीसं जोयणसहस्साइं दुण्णि य तेवढे जोयणसए एगवीसं च सद्धिभागे जोयणस्स तिरियं तवयंति ।

◦ मुनि दीपरत्नसागरेण संशोधितः सम्पादित्तश्च चउत्थं पाहुडं समत्तं ◦

□ पंचमं पाहुडं □

[३६] ता कस्सि णं सूरियस्स लेस्सा पडिहया आहिताति वएज्जा तत्थ खलु इमाओ वीसं पडिवत्तीओ पन्नत्ताओ तत्थेगे एवमाहंसु-ता मंदरंसि णं पव्वतंसि सूरियस्स लेस्सा पडिहया आहिताति वएज्जा-एगे पुवएण एवमाहंसु-ता मेरुं सि णं पव्वतंसि सूरियस्स लेस्सा पडिहया आहिताति वएज्जा-एवं एएणं अभिलावेणं भाणियव्वं-ता मणोरमंसि णं पव्वतंसि ता सुदंसणंसि णं पव्वतंसि ता सयंपभंसि णं पव्वतंसि ता गिरिरायंसि णं पव्वतंसि ता रयणुच्चयंसि णं पव्वतंसि ता सिलुच्चयंसि णं पव्वतंसि लोयमज्झंसि णं पव्वतंसि ता लोयणाभिंसि णं पव्वतंसि ता अच्चंसि णं पव्वतंसि ता सूरियावत्तंसि णं पव्वतंसि सूरियावरणंसि णं पव्वतंसि ता उत्तमंसि णं पव्वतंसि ता दिसादंसि णं पव्वतंसि ता अवतंसंसि णं पव्वतंसि ता धरणिखीलंसि णं पव्वतंसि ता धरणिसिगंसि णं पव्वतंसि ता पव्वतिदंसि णं पव्वतंसि ता पव्वयरायंसि णं पव्वतंसि सूरियस्स लेस्सा पडिहया आहिताति वएज्जा-वयं पुण एवं वदामो-ता मंदरेवि पाहुडं-५

पवुच्चइ जाव पव्वयरायावि पवुच्चइ ता जे णं पोग्गला सूरियस्स लेस्सं फुसंति ते णं पोग्गला सूरियस्स लेस्सं पडिहणंति अदिद्वावि णं पोग्गला सूरियस्स लेस्सं पडिहणंति चरिमलेस्संतरगतावि णं पोग्गला सूरियस्स लेस्सं पडिहणंति ।

◦ मुनि दीपरत्नसागरेण संशोधितः सम्पादित्तश्च पंचमं पाहुडं समत्तं ◦

□ छडं पाहुडं □

[३७] ता कहं ते ओयसंठिती आहिताति वएज्जा तत्थ खलु इमाओ पणवीसं पडिवत्तीओ पन्नत्ताओ तत्थेगे एवमाहंसु-ता अणुसमयमेव सूरियस्स ओया अण्णा उप्पज्जइ अण्णा वेअति-एगे पुण एवमाहंसु-ता अनुमुहुत्तमेव सूरियस्स ओया अण्णा उप्पज्जइ अण्णा वेअति-एवं एतेणं अभिलावेणं नेतव्वा-ता अनुराइंदियमेव ता अनुपक्खमेव ता अनुमासमेव ता अनुउडुमेव ता अनुअयणमेव ता अनुसंवच्छरमेव ता अनुजुगमेव ता अनुवाससयमेव ता अनुवाससहस्समेव ता अनुवाससयसहस्समेव ता अनुपुव्वमेव अनु-पुव्वसयमेव ता अनुपुव्वसहस्समेव ता अनुपुव्वसयसहस्समेव ता अनुपलिओवमेव ता अनुपलिओवमसयमेव ता अनुपलिओवमसहस्समेव ता अनुपलिओवमसयसहस्समेव ता अनुसागरोवममेव ता अनुसागरोवमसयमेव ता अनुसागरोवमसहस्समेव ता अनुसागरोवमसयसहस्समेव एगे पुण एवमाहंसु-ता अनुओसप्पिणिउस्स-प्पिणिमेव सूरियस्स ओया अण्णा उप्पज्जइ अण्णा वेअति-एगे एवमाहंसु वयं पुण एवं वदामो-ता तीसं-तीसं मुहुत्ते सूरियस्स ओया अवद्धिता भवइ तेणं परं सूरियस्स ओया अणवद्धिता भवइ छम्मासे सूरिए ओयं निवुड्ढे छम्मासे सूरिए ओयं अभिवुड्ढेइ निक्खममाणे सूरिए देसं निवुड्ढेइ पविसमाणे सूरिए देसं अभिवुड्ढेइ तत्थ को हेतूति वदेज्जा ता अयण्णं जंबुद्धीवे दीवे सव्वदीवसमुद्दाणं सव्वब्बंतराए जाव परिकखेवेणं ता जया णं सूरिए सव्वब्बंतरं मंडलं उवसंकमित्ता चारं चरइ तथा णं उत्तमकड्डपत्ते

उक्कोसए अद्वारसमुहुत्ते दिवसे भवइ जहणिया दुवालसमुहुत्ता राती भवति से निक्खममाणे सूरिए नवं संवच्छरं अयमाणे पढमंसि अहोरत्तंसि अब्भंतराणंतरं मंडलं उवसंकमिक्ता चारं चरइ ता जया णं सूरिए अब्भंत-राणंतरं मंडलं उवसंकमिक्ता चारं चरइ तथा णं एगेणं राइंदिणं एगं भागं ओयाए दिवसखेत्तस्स निवुड्ढित्ता रयणिखेत्तस्स अभिवड्ढित्ता चारं चरइ मंडलं अद्वारसहिं तीसेहिं सएहिं छेत्ता तथा णं अद्वार-समुहुत्ते दिवसे भवइ दोहिं एगड्ढिभागमुहुत्तेहिं ऊणे दुवालसमुहुत्ता राती भवति दोहिं एगड्ढिभागमुहुत्तेहिं अहिया से निक्खममाणे सूरिए दोच्चंसि अहोरत्तंसि अब्भंतरं तच्चं मंडलं उवसंकमिक्ता चारं चरइ ता जया णं सूरिए अब्भंतरं तच्चं मंडलं उवसंकमिक्ता चारं चरइ तथा णं दोहिं राइंदिणं दो भागे ओयाए दिवसखेत्तस्स निवुड्ढित्ता रयणिखेत्तस्स अभिवड्ढेत्ता चारं चरइ मंडलं अद्वारसहिं तीसएहिं सेहिं छेत्ता तथा णं अद्वार-समुहुत्ते दिवसे भवइ चउहिं एगड्ढिभागमुहुत्तेहिं ऊणे दुवालसमुहुत्ता राती भवति छउहिं एगड्ढिभागमुहुत्तेहिं अहिया एवं खलु एतेणुवाएणं निक्खममाणे सूरिए तयाणंतराओ तयाणंतरं मंडलाओ मंडलं संकममाणे-संकममाणे एगमेगे मंडले एगमेगेणं राइंदिणं एगमेगं भागं ओयाए दिवसखेत्तस्स निवुड्ढेमाणे-निवुड्ढेमाणे रयणिखेत्तस्स अभिवड्ढेमाणे-अभिवड्ढेमाणे सव्वबा-हिरं मंडलं उवसंकमिक्ता चारं चरइ ता जया णं सूरिए सव्वब्भंतराओ मंडलाओ सव्वबाहिरं मंडलं उवसंकमिक्ता चारं चरइ तथा णं सव्वब्भंतरं मंडलं पणिधाय एगेणं तेसीतेणं राइंदियसतेणं एगं तेसीतं भागसतं ओयाए दिवसखेत्तस्स निवुड्ढेत्ता रयणइखेत्तस्स अभिवड्ढेत्ता चारं चरइ मंडलं अद्वारसहिं तीसेहिं सएहिं छेत्ता तथा णं उत्तमकड्डपत्ता उक्कोसिया अद्वार-पाहुडं-६

समुहुत्ता राती भवति जहणणए दुवालसमुहुत्ते दिवसे भवइ एस णं पढमे छम्मासे एस णं पढमस्स छम्मसस्स पज्जवसाणे से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमिक्ता चारं चरइ ता जया णं सूरिए बाहिराणंतरं मंडलं उवसंकमिक्ता चारं चरइ तथा णं एगेणं राइंदिणं एगं भागं ओयाए रयणिक्खेत्तस्स निवुड्ढेत्ता दिवसखेत्तस्स अभिवड्ढेत्ता चारं चरइ मंडलं अद्वारसहिं तीसेहिं सएहिं छेत्ता तथा णं अद्वारसमुहुत्ता राती भवति दोहिं एगड्ढिभागमुहुत्तेहिं ऊणा दुवाल-समुहुत्ते दिवसे भवइ दोहिं एगड्ढिभागमुहुत्तेहिं अहिए से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिक्ता चारं चरइ ता जया णं सूरिए बाहिरं तच्चं मंडलं उवसंकमिक्ता चारं चरइ तथा णं दोहिं राइंदिणं दो भाए ओयाए रयणिखेत्तस्स निवुड्ढेत्ता दिवसखेत्तस्स अभिवड्ढेत्ता चारं चरइ मंडलं अद्वारसहिं तीसेहिं सएहिं छेत्ता तथा णं अद्वारसमुहुत्ता राती भवति चउहिं एगड्ढिभागमुहुत्तेहिं ऊणा दुवला-समुहुत्ते दिवसे भवइ चउहिं एगड्ढिभागमुहुत्तेहिं अहिए एवं खलु एतेणुवाएणं पविसमाणे सूरिए तयाणंतराए तयाणंतरं मंडलाओ जाव ओयाए रयणिखेत्तस्स निवुड्ढेमाणे-निवुड्ढेमाणे दिवसखेत्तस्स अभिवड्ढेमाणे-अभिवड्ढेमाणे सव्वब्भंतरं मंडलं उवसंकमिक्ता चारं चरइ ता जया णं सूरिए सव्वबाहिराओ मंडलाओ सव्वब्भंतरं मंडलं उवसंकमिक्ता चारं चरइ तथा णं सव्वबाहिरं मंडलं पणिधायं एगेणं तेसीतेणं राइंदियसतेणं एगं तेसीतं भागसतं ओयाए रयणिखेत्तस्स निवुड्ढेत्ता दिवसखेत्तस्स अभिवड्ढेत्ता चारं चरइ मंडलं अद्वारसहिं तीसेहिं सएहिं छेत्ता तथा णं उत्तमकड्डपत्ते उक्कोसए अद्वारसमुहुत्ते दिवसे भवइ जहणणिया दुवालसमुहुत्ता राती भवति एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स सेवच्छरस्स पज्जवसाणे ।

• मुनि दीपरत्नसागरेण संशोधितः सम्पादित्तश्च छद्मं पाहुडं समत्तं •

□ सत्तमं पाहुडं □

[३८] ता के ते सूरियं वरयति आहिताति वएज्जा तत्थ खलु इमाओ वीसं पडिवत्तीओ पन्नत्ताओ तत्थेगे एवमाहंसु-ता मंदरे णं पव्वए सूरियं वरयति आहितेति वएज्जा-एगे पुण एवमाहंसुता मेरु णं पव्वए सूरियं वरयति आहितेति वएज्जा-एवं एएणं अभिलावेणं नेयव्वं जाव पव्वयराए णं पव्वए सूरियं वरयति आहितेति वएज्जा-वयं पुणं एवं वदामो-ता मंदिरेवि पवुच्चइ तहेव जाव पव्वयराएवि पवुच्चइ ता जे णं पोग्गला सूरियस्स लेसं फुसंति ते णं पोग्गला सूरियं वरयंति अदिट्ठावि णं पोग्गला सूरियं वरयंति चरमलेसंतरगतावि णं पोग्गला सूरियं वरयंति ।

• मुनि दीपरत्नसागरेण संशोधितः सम्पादित्तश्च सत्तमं पाहुडं समत्तं •

□ अड्डमं पाहुडं □

[३९] ता कहं ते उदयसंठिती आहितेति वएज्जा तत्थ खलु इमाओ तिण्णि पडिवत्तीओ पण्णत्ताओ तत्थेगे एवमाहंसु-ता जया णं जंबुद्धीवे दीवे दाहिणइडे अट्टारसमुहुत्ते दिवसे भवइ तया णं उत्तरइडेवि अट्टारसमुहुत्ते दिवसे भवइ ता जया णं उत्तरइडे अट्टारसमुहुत्ते दिवसे भवइ तया णं दाहिणइडेवि अट्टारसमुहुत्ते दिवसे भवइ ता जया णं जंबुद्धीवे दीवे दाहिणइडे सत्तरसमुहुत्ते दिवसे भवइ तया णं उत्तरइडेवि सत्तरसमुहुत्ते दिवसे भवइ ता जया णं उत्तरइडे सत्तरसमुहुत्ते दिवसे भवइ तया णं दाहिणइडेवि

पाहुडं-८

सत्तरसमुहुत्ते दिवसे भवइ एवं परिहावेत्तव्वं-सोलसमुहुत्ते दिवसे पन्नरसमुहुत्ते दिवसे चउद्धसमुहुत्ते दिवसे तेरसमुहुत्ते दिवसे जाव ता जया णं जंबुद्धीवे दीवे दाहिणइडे बारसमुहुत्ते दिवसे भवइ तया णं उत्तरइडेवि बारसमुहुत्ते दिवसे भवइ ता जया णं उत्तरइडे बारसमुहुत्ते दिवसे भवइ तया णं दाहिणइडेवि बारसमुहुत्ते दिवसे भवइ ता जया णं दाहिणइडे बारसमुहुत्ते दिवसे भवइ तया णं जंबुद्धीवे दीवे मंदरस्स पव्वयस्स पुरत्थिमपच्चत्थिमे णं सदा पन्नरसमुहुत्ते दिवसे भवइ सदा पन्नरसमुहुत्ता राती भवति अवट्ठिया णं तत्थ राइंदिया पन्नत्ता समणाउसो एगे एवमाहंसु एगे पुण एवमाहंसु-ता जया णं जंबुद्धीवे दीवे दाहिणइडे अट्टार-समुहुत्ताणंतरे दिवसे भवइ तया णं उत्तरइडेवि अट्टारसमुहुत्ताणंतरे दिवसे भवइ ता जया णं उत्तरइडे अट्टारसमुहुत्ताणंतरे दिवसे भवइ तया णं दाहिणइडेवि अट्टारसमुहुत्ताणंतरे दिवसे भवइ एवं परिहावेत्तव्वं-सत्तरसमुहुत्ताणंतरे दिवसे भवइ सोलसमुहुत्ताणंतरे दिवसे भवइ पन्नरसमुहुत्ताणंतरे दिवसे भवइ चोद्धस-मुहुत्ताणंतरे दिवसे भवइ तेरसमुहुत्ताणंतरे दिवसे भवइ ता जया णं जंबुद्धीवे दीवे दाहिणइडे बारसमुहुत्ताणंतरे दिवसे भवइ तया णं उत्तरइडेवि बारसमुहुत्ताणंतरे दिवसे भवइ ता जया णं उत्तरइडे बारसमुहुत्ताणंतरे दिवसे भवइ तया णं दाहिणइडेवि बारसमुहुत्ताणंतरे दिवसे भवइ तया णं जंबुद्धीवे दीवे मंदरस्स पव्वयस्स पुरत्थिमपच्चत्थिमे णं नो सदा पन्नरसमुहुत्ते दिवसे भवइ नो सदा पन्नरसमुहुत्ता राती भवति अणवट्ठिता णं तत्थ राइंदिया पन्नत्ता समणाउसो एगे पुण एवमाहंसु-ता जया णं जंबुद्धीवे दीवे दाहिणइडे अट्टार-समुहुत्ते दिवसे भवइ तया णं उत्तरइडे दुवालसमुहुत्ता राती भवति ता जया णं उत्तरइडे अट्टारसमुहुत्ते दिवसे भवइ तया णं दाहिणइडे दुवालसमुहुत्ता राती भवति ता जया णं दाहिणइडे अट्टारसमुहुत्ताणंतरे दिवसे भवइ तया णं उत्तरइडे दुवालसमुहुत्ता राती भवति ता जया णं उत्तरइडे

अद्वारसमुहृत्ताणंतरे दिवसे भवइ तथा णं दाहिणइडे दुवालसमुहृत्ता राती भवति एवं नेतव्वं सगवेहिं य अनंतरेहिं य एक्केक्के दो दो आलावगा सव्वेहिं दुवालसमुहृत्ता राती भवति जाव ता जया णं जंबुद्धीवे दीवे दाहिणइडे बारसमुहृत्ताणंतरे दिवसे भवइ तथा णं उत्तरइडे दुवासमुहृत्ता राती भवति ता जया णं उत्तरइडे दुवासमुहृत्ताणंतरे दिवसे भवइ तथा णं दाहिणइडे दुवालसमुहृत्ता राति भवति तथा णं जंबुद्धीवे दीवे मंदरस्स पव्वयस्स पुरत्थिम-पच्चत्थिमेणं नेवत्थि पन्नरसमुहृत्ते दिवसे भवइ नेवत्थि पन्नरसमुहृत्ता राती भवति वोच्छण्णा णं तत्थ राइंदिया पन्नत्ता समणाउसो ।

वयं पुण एवं वदामो-ता जंबुद्धीवे दीवे सूरिया उदीम-पाईणमुग्गच्छ पाईण-दाहिणमागच्छंति पाईण-दाहिणमुग्गच्छ दाहिण-पडीणमगच्छंति दाहिण-पडीणमुग्गच्छ पडीणउदीणागच्छंति पडीण-उदीण-मुग्गच्छ उदीम-पाईण-मागच्छंति ता जया णं जंबुद्धीवे दीवे दाहिणइडे दिवसे भवइ तथा णं उत्तरइडेवि दिवसे भवइ जया णं उत्तरइडे दिवसे भवइ तथा णं जंबुद्धीवे दीवे मंदरस्स पव्वयस्स पुरत्थिमपच्चत्थिमे णं राती भवति ता जया णं जंबुद्धीवे दीवे मंदरस्स पव्वयस्स पुरत्थिमपच्चत्थिमे णं राती भवति ता जया णं जंबुद्धीवे दीवे मंदरस्स पव्वयस्स पुरत्थिमे णं दिवसे भवइ तथा णं पच्चत्थिमे नवि दिवसे भवइ ता जया णं पच्चत्थिमे णं दिवसे भवइ तथा णं जंबुद्धीवे दीवे मंदरस्स पव्वयस्स उत्तरदाहिणे णं राती भवति ता जया णं दाहिणइडे उक्कोसए अद्वारसमुहृत्ते दिवसे भवइ तथा णं उत्तरइडेवि उक्कोसए अद्वारसमुहृत्ते दिवसे भवइ ता जया णं उत्तरइडे उक्कोसए अद्वारसमुहृत्ते दिवसे भवइ तथा णं जंबुद्धीवे दीवे मंदरदस्स पव्वयस्स पुरत्थिमपच्चत्थेणं णं जहणिया दुवालसमुहृत्ता राती भवति ता जया णं जंबुद्धीवे दीवे मंदरस्स पव्वयस्स पुरत्थिमे णं उक्कोसए अद्वारसमुहृत्ते दिवसेभवइ तथा णं पच्चत्थिमे नवि उक्कोसए

अद्वार-

पाहुडं-८

समुहृत्ते दिवसे भवइ ता जया णं पच्चत्थिमे णं उक्कोसए अद्वारसमुहृत्ते दिवसे भवइ तथा णं जंबुद्धीवे दीवे मंदरस्स पव्वयस्स उत्तरदाहिणे णं जहणिया दुवालसमुहृत्ता राती भवति एवं एणं गमेणं नेत्तव्वंअद्वारसमुहृत्ताणंतरे दिवसे भवइ साइरेगदुवालसमुहृत्ता राती भवति सत्तरसमुहृत्ते दिवसे भवइ तेरसमुहृत्ता राती भवति सत्तरसमुहृत्ताणंतरे दिवसे भवइ साइरेगतेरसमुहृत्ता राती भवति सोलसमुहृत्ते दिवसे भवइ चोदसमुहृत्ता राती भवति सोलसमुहृत्ताणंतरे दिवसे भवइ साइरेगचोदसमुहृत्ता राती भवति पन्नरसमुहृत्ते दिवसे भवइ पन्नरसमुहृत्ता राती भवति पन्नरसमुहृत्ताणंतरे दिवसे भवइ साइरेगपन्नरसमुहृत्ता राती भवति चउदसमुहृत्ते दिवसे भवइ सोलसमुहृत्ता राती भवति चोदसमुहृत्ताणंतरे दिवसे भवइ साइरेगसोलसमुहृत्ता राति भवति तेरसमुहृत्ते दिवसे भवइ सत्तरसमुहृत्ता राति भवति तेरसमुहृत्ताणंतरे दिवसे भवइ साइरेगसत्तरसमुहृत्ता राति भवति जहणए दुवालसमुहृत्ते दिवसे भवइ उक्कोसिया अद्वारसमुहृत्ता राति भवति एवं भणितव्वं ता जया णं जंबुद्धीवे दीवे दाहिणइडे वासाणं पढमे समए पडिवज्जति तथा णं उत्तरइडेवि वासाणं पढमे समए पडिवज्जति जया णं उत्तरइडे वासाणं पढमे समए पडिवज्जति तथा णं जंबुद्धीवे दीवे मंदरस्स पव्वयस्स पुरत्थिमपच्चत्थिमे णं अनंतरपुरक्खडे कालसमयंसि वासाणं पढमे समए पडिवज्जति ता जया णं जंबुद्धीवे दीवे मंदरस्सपव्वयस्सपुरत्थिमे णं वासाणं पढमे समए पडिवज्जति तथा णं पच्चत्थिमे नवि वासाणं पढमे समए पडिवज्जति जया णं पच्चत्थिमे णं वासाणं पढमे समए पडिवज्जति तथा णं जंबुद्धीवे दीवे मंदरस्स पव्वतस्स उत्तरदाहिणे णं अनंतरपच्छाकडकालसमयंसि वासाणं पढमे समए पडिवण्णे भवइ जहा समओ एवं आवलिया आणापाण्

थोवे लवे मुहुत्ते अहोरत्ते पक्खे मासे उडू एते दस आलावगा जहा वासाणं एवं हेमंताणं गिम्हाणं च भाणियव्वा ता जया णं जंबुद्धीवे दीवे दाहिणइडे पढमे अयणे पडिवज्जति तथा णं उत्तरइडेवि पढमे अयणे पडिवज्जति ता जया णं उत्तरइडे पढमे अयणे पडिवज्जति तथा णं जंबुद्धीवे दीवे मंदरस्स पव्वयस्स पुरत्थिमपच्चत्थिमे णं अनंतरपुरक्खडे कालसमयंसि पढमे अयणे पडिवज्जति ता जया णं जंबुद्धीवे दीवे मंदरस्स पव्वयस्स पुरत्थिमे णं पढमे अयणे पडिवज्जति तथा णं पच्चत्थिमे नवि पढमे अयणे पडिवज्जति ता जया णं पच्चत्थिमे णं पढमे अयणे पडिवज्जति तथा णं जंबुद्धीवे दीवे मंदरस्स पव्वयस्स उत्तरदाहिणे णं अनंतरपच्छाकडकालसयंसि पढमे अयणे पडिवण्णे भवइ जहा अयणे तहा संवच्छरे जुगे वाससए वाससहस्से वाससयसहस्से पुव्वंगे पुव्वे एवं जाव सीसपहेलिया पलिओवमे सागरोवमे ता जया णं जंबुद्धीवे दीवे दाहिणइडे पढमा ओसप्पिणी पडिवज्जति तथा णं उत्तरइडेवि पढमा ओसप्पिणी पडिवज्जति ता जया णं उत्तरइडे पढमा ओसप्पिणी पडिवज्जति तथा णं जंबुद्धीवे दीवे मंदरस्स पव्वयस्स पुरत्थिमपच्चत्थिमे णं नेवत्थि ओसप्पिणी नेव अत्थि उस्सप्पिणी अवद्धिते णं तत्थ काले पन्नत्ते सममाउसो एवं उस्सप्पिणीवि ता लवणे णं समुद्धे सूरिया उदीण-पाईणमुग्गच्छ तहेव ता जया णं लवणे समुद्धे दाहिणइडे दिवसे भवइ तथा णं लवणसमुद्धे उत्तरइडेवि दिवसे भवइ ता जया णं उत्तरइडे दिवसे भवइ तथा णं लवणसमुद्धे पुरत्थिमपच्चत्थिमे णं राति भवति जहा जंबुद्धीवे दीवे तहेव जाव उस्सप्पिणी तहा धायइसंडे णं दीवे सूरिया उदीण-पाईणमुग्गच्छ तहेव ता जया धायइसंडे दीवे दाहिणइडे दिवसे भवइ तथा णं उत्तरइडेवि दिवसे भवइ जया णं उत्तरइडे दिवसे भवइ तथा णं धायइसंडे दीवे मंदराणं पव्वयाणं पुरत्थिमपच्चत्थिमे णं राति भवति एवं जंबुद्धीवे दीवे जहा तहेव जाव उस्सप्पिणी कालोए णं जहा लवणे समुद्धे तहेव ता अब्भंतरपुक्खरद्धे णं सूरिया उदीण-पाईण-मुग्गच्छ तहेव ता जया णं अब्भंतरपुक्खरद्धे णं दाहिणइडे दिवसे भवइ तथा णं उत्तरइडेवि दिवसे भवइ ता जया णं उत्तरइडे दिवसे पाहुडं-८

भवइ तथा णं अब्भंतरपुक्खरद्धे मंदराणं पव्वयाणं पुरत्थिम-पच्चत्थिमे णं राति भवति सेसं जहा जंबुद्धीवे दीवे तहेव जाव ओसप्पिणी-उस्सप्पिणीओ ।

◦ मुनि दीपरत्नसागरेण संशोधितः सम्पादित्तश्च अड्डमं पाहुडं समत्तं ◦

◻ नवमं पाहुडं ◻

[४०] ता कतिकडं ते सूरिए पोरिसिच्छायं निव्वत्तेति आहितेति वदेज्जा तत्थखलुइमाओ तिण्णि पडिवत्तीओ पन्नत्ताओ तत्थेगे एवमाहंसु-ता जे णं पोग्गला सूरियस्स लेसं फुसंति ते णं पोग्गला संतप्पंति तेणंपोग्गला संतप्पमाणा तदणंतराइं बाहिराइं पोग्गलाइं संतावेतीति एस णं से समिते तावक्खत्ते-एगे पुण एवमाहंसु-ता जे णं पोग्गला सूरियस्स लेसं फुसंति ते णं पोग्गला नो संतप्पंति ते णं पोग्गला असंतप्पमाणा तदणंतराइं बाहिराइं पोग्गलाइं नो संतावेतीति एस णं से समिते तावक्खत्ते-एगे पुण एवमाहंसु-ता जे णं पोग्गला सूरियस्स लेसं फुसंति ते णं पोग्गला अत्थेगतिया संतप्पंति अत्थेगतिया नो संतप्पंति तत्थ अत्थेगतिया संतप्पमाणा तदणंतराइं बाहिराइं पोग्गलाइं अत्थेगइयाइं संतावेति अत्थेग-इयाइं नो संतावेति एस णं से समिते तावक्खत्ते-वयं पुण एवं वदामो-ता जाओ इमाओ चंदिमसूरियाणं देवाणं विमाणेहितो लेसाओ बहिया अभिणिस्सढाओ पतावेति एतासि णं लेसाणं अंतरेसु अण्णतरीओ

छिण्णलेसाओ संमुच्छंति तए णं ताओ छिण्णलेस्साओ संमुच्छियाओ समाणीओ तदनंतराइं बाहिराइं पोग्गलाइं संतावेतीति एसं णं से समिते तावक्खेत्ते ।

[४१] ता कतिवद्दे ते सूरिए पोरिसिच्छायं निव्वत्तेति आहितेति वदेज्जा तत्थ खलु इमाओ पणवीसं पडिवत्तीओ पन्नत्ताओ तत्थेगे एवमाहंसु-ता अनुसमयमेव सूरिए पोरिसिच्छायं निव्वत्तेति आहितेति वदेज्जा-एगे पुण एवमाहंसु-ता अनुमुहुत्तमेव सूरिए पोरिसिच्छायं निव्वत्तेति आहितेति वएज्जा एवं एणं अभिलावेणं नेयव्वं ता जाओ चेव ओयसंठितीए पणवीसं पडिवत्तीओ ताओ चेव नेयव्वाओ जाव अणुओ-सप्पिणउस्सप्पिणिमेव सूरिए पोरिसिच्छायं निव्वत्तेति आहिताति वदेज्जावयं पुण एवं वयामो-ता सूरियस्स णं उच्चत्तं च लेसं च पडुच्च छाउद्देसे उच्चत्तं च छायां च पडुच्च लेसुद्देसे लेसं च छयं च पडुच्च उच्चत्तुद्देसे तत्थ खलु इमाओ दुवे पडिवत्तीओ पन्नत्ताओ-ता अत्थि णं से दिवसं जंसि णं दिवसंसि सूरिए चउपो-रिसिच्छायं निव्वत्तेति अत्थि णं से दिवसे जंसि णं दिवसंसि सूरिए दुपोरिसिच्छायं निव्वत्तेति-एगे पुण एवमाहंसु-ता अत्थि णं से दिवसे जंसि णं दिवसंसि सूरिए दुपोरिसिच्छायं निव्वत्तेति अत्थि णं से दिवसे जंसि णं दिवसंसि सूरिए नो किंचि पोरिसिच्छायं निव्वत्तेति तत्थ जेते एवमाहंसु-ता अत्थि णंसे दिवसे जंसि णं दिवसंसि सूरिए चउपोरिसिच्छायं निव्वत्तेति अत्थि णं से दिवसे जंसि णं दिवसंसि सूरिए दुपोरिसिच्छायं निव्वत्तेति ता जया णं सूरिए सव्वब्भंतरं मंडलं उवसंकमित्ता चारं चरइ तया णं उत्तम-कडुपत्ते उक्कोसए अट्टारसमुहुत्ते दिवसे भवइ जहण्णिया दुवालसमुहुत्ता राति भवति तंसि णं दिवसंसि सूरिए चउपोरिसियं छायां निव्वत्तेति तं जहा- उग्गमणमुहुत्तंसि य अत्थमणमुहुत्तंसि य लेसं अभिवड्ढेमाणे नो चेव णं निवुड्ढेमाणे ता जया णं सूरिए सव्वबाहिरं मंडलं उवसंकमित्ता चारं चरइ तया णं उत्तम-कडुपत्ता उक्कोसिया अट्टारसमुहुत्ता राति भवति जहण्णए दुवालसमुहुत्ते दिवसे भवइ तंसि णं दिवसंसि सूरिए दुपोरिसियं छायां निव्वत्तेति तं जहा- उग्गमणमुहुत्तंसि य अत्थमणमुहुत्तंसि य लेसं अभिवड्ढेमाणे नो चेव णं निवुड्ढेमाणे तत्थ णं जेते एवमाहंसु-ता अत्थि णं से दिवसे जंसि णं दिवसंसि सूरिए

दुपोरिसियं

पाहुडं-९

छायं निव्वत्तेति अत्थि णं से दिवसे जंसि णं दिवसंसि सूरिए नो किंचि पोरिसियं छायां निव्वत्तेति ते एवमाहंसु ता जया णं सूरिए सव्वब्भंतरं मंडलं उवसंकमित्ता चारं चरइ तया णं उत्तमकडुपत्ते उक्कोसए अट्टारसमुहुत्ते दिवसे भवइ जहण्णिया दुवालसमुहुत्ता राति भवति तंसि णं दिवसंसि सूरिए दुपोरिसियं छायां निव्वत्तेति तं जहा- उग्गमणमुहुत्तंसि य अत्थमणमुहुत्तंसि य लेसं अभिवड्ढेमाणे नो चेव णं निवुड्ढेमाणे ता जया णंसूरिए सव्वबाहिरं मंडलं उवसंकमित्ता चारं चरइ तया णं उत्तमकडुपत्ता उक्कोसिया अट्टार-समुहुत्ता राति भवति जहण्णए दुवालसमुहुत्ते दिवसे भव तंसि णं दिवसंसि सूरिए नो किंचि पोरिसियं छायां निव्वत्तदेइ तं जाउग्गमणमुहुत्तंसि य अत्थमणमुहुत्तंसि य नो चेव णं लेसं अभिवड्ढेमाणे वा निवुड्ढेमाणे वा कतिकडुं ते सूरिए पोरिसिच्छायं निव्वत्तेति आहिताति वएज्जा तत्थ खलु इमाओ छण्णउत्तिं पडिवत्तिओ पन्नत्ता तत्थेगे एवमाहंसु-ताअत्थि णं से देसे जंसि च णं देसंसि सूरिए एगपोरिसियं छायां निव्वत्तेति-एगे पुणं एवमाहंसु-ता अत्थि णं से देसे जंसि णं देसंसि सूरिए दुपोरिसियं छायां निव्वत्तेइ एवं एणं अभिलावेणं नेतव्वं जावछण्णउत्तिं पोरिसिच्छायं निव्वत्तेति तत्थजेते एवमाहंसु-ताअत्थि णं से देसेजंसिणं देसंसि सूरिए एगपोरिसियं छायां निव्वत्तेति ते एवमाहंसु-ता सूरियस्स णं सव्वहेट्ठिमाणो सूरियप्पडिहीओ बहियाअभिणिस्सढाहि लेसाहिं ताडिज्जमाणीहिंइमीसे रयणप्पभाए

पुढवीए बहुसमर-मणिज्जाओ भूमिभागाओ जावतियं सूरिए उड्डं उच्चत्तेणं एवतियाए एगाए अद्वाए एगेणं छाणुमाणप्प-माणेणं ओमाए एत्थ णं से सूरिए एगपोरिसियं छायां निव्वत्तेति तत्थ जेते एवमाहंसु-ता अत्थि णं से देसे जंसि णं देसंसि सूरिए दुपोरिसियं छायां निव्वत्तेति ते एवमाहंसु-ता सूरियस्स णं सव्वहेट्ठिमाओ सूरियप्प-डिहीओ बहिया अभिणिस्सिताहिं लेसाहिं ताडिज्जमाणीहिं इमीसे रयणप्पभाए पुढवीए बहुसमरमणिज्जाओ भूमिभागाओ जावतियं सूरिए उड्डं उच्चत्तेणं एवतियाहिं दोहिं अद्वाहिं दोहिं छायाणुमाणप्पमाणेहिं ओमाए एत्थ णं से सूरिए दुपोरिसियं छायां निव्वत्तेति एवं एक्केक्काए पडिवत्तीए नेयव्वं जाव छण्णउत्तिमा पडिवत्ति-वयं पुण एवं वदामो-ता सातिरेग-अउणद्विपोरिसीणं सूरिए पोरिसिच्छायं निव्वत्तेति ता अवड्डपोरिसी णं छाया दिवसस्स किं गते वा सेसे वा ता तिभागे गते वा सेसे वा ता पोरिसी णं छाया दिवसस्स किं गते वा सेसे वा ता चउब्भागेगते वा सेसे वा ता दिवड्डपोरिसी णं छाया दिवसस्स किं गते वा सेसे वा ता पंचमभागे गते वा सेसे वा एवं अद्दपोरिसिं छोदुं-छोदुं पुच्छा दिवसस्स भागं छोदुं-छोदुं वागरणं जाव ता अद्दअउणद्विपोरिसीणं छाया दिवसस्स किं गते वा सेसे वा ता एगूणवीससतभागे गते वा सेसे वा ता अउणद्विपोरिसीणं छाया दिवसस्स किं गते वा सेसे वा ता बावीससहस्सभागे गते वा सेसे वा ता सातिरेगअउणद्विपोरिसी णं छाया दिवसस्स किंगते वा सेसे वा ता नत्थि किंचि गते वा सेसे वा तत्थ खलु इमा पणवीसतिविधा छाया पन्नत्ता तं जहा- खंभच्छया रज्जुच्छया पागारच्छया पासादच्छया उवग्गच्छया उच्चत्तच्छया अनुलोमच्छया पडिलोमच्छया आरुभिता उवहिता समा पडिहत् खीलच्छया पक्खच्छया पुरओदग्गा पिद्वओउदग्गा पुरमकंठभाओवगता पच्छिमकंठभाओवगता छायाणुवादिणी कंठाणुवादिणी छाया छायाच्छया छायाविकंपे वेहासकडच्छया गोलच्छया तत्थ खलु इमा अद्विहा गोलच्छया पन्नत्ता तं जहा- गोलच्छया अवड्डगोलच्छया गोलगोलच्छया अवड्डगोलगोलच्छया गोलाव-लिच्छया अवड्डगोलावलिच्छया गोलपुंजच्छया अवड्डगोलपुंजच्छया ।

• मुनि दीपरत्नसागरेण संशोधितः सम्पादित्तश्च नवमं पाहुडं समत्तं •

पाहुडं-१०, पाहुडपाहुडं-१

० दसमं पाहुडं ०

▣ पढमं-पाहुडपाहुडं ▣

[४२] ता जोगेति वत्थुस्स आवलियाणिवाते आहितेति वदेज्जा-कहं० पुच्छा तत्थ खलु इमाओ पंच पडिवत्तीओ पन्नत्ताओ तत्थेगे एवमाहंसु-ता सव्वेसि णं नक्खत्ता कत्तियादिया भरणिपज्ज-वसाणा पन्नत्ता-एगे पुण एवमाहंसु-ता सव्वेवि णं नक्खत्ता महादिया अस्सेसपज्जवसाणा एगेपुण एवमाहंसु-ता सव्वेवि णं नक्खत्ता धणिद्वादिया सवणपज्जवसाणा एगे पुण एवमाहंसु-ता सव्वेवि णं नक्खत्ता अस्सिणीआदिया रेवइपज्जवसाणा एगे पुण एवमाहंसु-ता सव्वेवि णं नक्खत्ता भरणीआदिया अस्सिणीपज्जवसाणा वयं पुण एवं वदामो-ता सव्वेवि णं नक्खत्ता अभिईआदिया उत्तरासाढापज्जवसाणा पन्नत्ता तं जहा- अभिई सवणो जाव उत्तरासाढा ।

• दसमे पाहुडे पढमं पाहुडपाहुडं समत्तं •

▣ बीयं पाहुडपाहुडं ▣

[४३] ता कहं ते मुहुत्तग्गे आहितेति वदेज्जा ता एतेसि णं अट्ठावीसाए नक्खत्ताणं अत्थि नक्खत्ते जे णं नव मुहुत्ते सत्तावीसं च सत्तट्ठिभागे मुहुत्तस्स चंदेण सद्धिं जोयं जोएति अत्थि नक्खत्ता जे णं पन्नरस मुहुत्ते चंदेण सद्धिं जोयं जोएति अत्थि नक्खत्ता जे णं तीसं मुहुत्ते चंदेण सद्धिं जोयं जोएति अत्थि नक्खत्ता जे णं पणयालीसे मुहुत्ते चंदेण सद्धिं जोयं जोएति ता एतेसि णं अट्ठावीसाए नक्खत्ताणं कयरे नक्खत्ते जे णं नवमुहुत्ते सत्तावीसं च सत्तट्ठिभाए मुहुत्तस्स चंदेण सद्धिं जोयं जोएति कयरे नक्खत्ता जे णं पन्नरसमुहुत्ते चंदेण सद्धिं जोयं जोएति कयरे नक्खत्ता जे णं तीसं मुहुत्ते चंदेण सद्धिं जोयं जोएति कयरे नक्खत्ता जे णं पणयालीसं मुहुत्ते चंदेण सद्धिं जोयं जोएति ता एतेसि णं अट्ठावीसाए नक्खत्ताणंतत्थ जेसे नक्खत्ते जे णं नव मुहुत्ते सत्तावीसं च सत्तट्ठिभागे मुहुत्तस्स चंदेण सद्धिं जोयं जोएति से णं एगे अभीई तत्थ जेते नक्खत्ता जे णं पन्नरसमुहुत्ते चंदेण सद्धिं जोयं जोएति ते णं छ तं जहा- सतभिसया भरणी अट्ठा अस्सेसा साती जेट्ठा तत्थ जेते नक्खत्ता जे णं तीसं मुहुत्तं चंदेण सद्धिं जोयं जोएति ते णं पन्नरस तं जहा- सवणे धणिट्ठा पुच्चाभट्ठवया रेवती अस्सिणी कत्तिया मिगसिरं पुस्सो महा पुच्चाफग्गुणी हत्थो चित्ता अनुराहा मूलो पुच्चासाढा तत्थ जेते नक्खत्ता जे णं पणयालीसं मुहुत्ते चंदेण सद्धिं जोयं जोएति ते णं छ तंजहा-उत्तराभट्ठपदा रोहिणी पुण्व्वसू उत्तराफग्गुणी विसाहा उत्तरासाढा ।

[४४] ता एतेसि णं अट्ठावीसाए नक्खत्ताणं अत्थि नक्खत्ते जे णं चत्तारि अहोरत्ते छच्च मुहुत्ते सूरेंसद्धिंजोयं जोएति अत्थि नक्खत्ताजेणंछ अहोरत्ते एक्कवीसं च मुहुत्ते सूरें सद्धिं जोयं जोएति अत्थि नक्खत्ता जे णं तेरस अहोरत्ते दुवालस य मुहुत्ते सूरें सद्धिं जोयं जोएति अत्थिनक्खत्ता जे णं वीसं अहोरत्ते तिण्णि य मुहुत्ते सूरें सद्धिं० ता एतेसि णं अट्ठावीसाए नक्खत्ताणं कयरे नक्खत्ते जे णं चत्तारि अहोरत्ते छच्च मुहुत्ते सूरें सद्धिं जोयं जोएति कयरे नक्खत्ता जे णं छ अहोरत्ते एक्कवीसं मुहुत्ते सूरें सद्धिं जोयं जोएति कयरे नक्खत्ता जे णं तेरस अहोरत्ते बारस मुहुत्ते सूरें सद्धिं जोयं जोएति कयरे नक्खत्ता जे णं वीसं अहोरत्ते तिण्णि य मुहुत्ते सूरें सद्धिं जोयं जोएति ता एतेसि णं अट्ठावीसाए नक्खत्ताणं तत्थ जेसे नक्खत्ते जे णं चत्तारि अहोरत्ते छच्च मुहुत्ते सूरें सद्धिं जोयं जोएति से णं एगे अभीई तत्थ जेते पाहुडं-१०, पाहुडपाहुडं-२

नक्खत्ता जे णं छ अहोरत्ते एक्कवीसं च मुहुत्ते सूरें सद्धिं जोयं जोएति ते णं छ, सतभिसया भरणी अट्ठा अस्सेसा साती जेट्ठा तत्थ जेते नक्खत्ता जे णं तेरस अहोरत्ते दुवालस य मुहुत्ते सूरें सद्धिं जोयं जोएति ते णं पन्नरस सवणो धणिट्ठा पुच्चाभट्ठवया रेवती अस्सिणी कत्तिया मिगसिरं पूसो महा पुच्चाफग्गुणी हत्थो चित्ता अनुराहा मूलो पुच्चासाढा तत्थ जेतेनक्खत्ता जे णं वीसं अहोरत्ते तिण्णि य मुहुत्ते सूरें सद्धिं जोयं जोएति ते णं छ, उत्तराभट्ठवया रोहिणी पुण्व्वसू उत्तराफग्गुणी विसाहा उत्तरासाढा ।

० दसमे पाहुडे बीयं पाहुडपाहुडं समत्तं ०

॥ तच्चं पाहुडपाहुडं ॥

[४५] ता कहं ते एवंभागा आहिताति वदेज्जा ता एतेसि णं अट्ठावीसाए नक्खत्ताणं अत्थि नक्खत्ता पुच्चांभागा समक्खत्ता तीसइमुहुत्ता पन्नत्ता अत्थि नक्खत्ता पच्चंभागा समक्खत्ता

तीसइमुहुत्ता पन्नत्ता अत्थि नक्खत्ता नत्तंभागा अवड्ढक्खेत्ता पन्नरसमुहुत्ता पन्नत्ता अत्थि नक्खत्ता उभयंभागा दिवड्ढक्खेत्ता पणयालीसइमुहुत्ता पन्नत्ता ता एतेसि णं अट्ठावीसाए नक्खत्ताणं कयरे नक्खत्ता पुव्वंभागा समक्खेत्ता तीसइमुहुत्ता पन्नत्ता कयरे नक्खत्ता पच्छंभागा समक्खेत्ता तीसउमुहुत्ता पन्नत्ता कयरे नक्खत्ता नत्तंभागा अवड्ढक्खेत्ता पन्नरसमुहुत्ता पन्नत्ता कयरे नक्खत्ता उभयंभागा दिवड्ढक्खेत्ता पणयालीसइमुहुत्ता पन्नत्ता ताएतेसि णं अट्ठावीसाए नक्खत्ताणं तत्थ पुव्वंभागा समक्खेत्ता तीसइमुहुत्ता पन्नत्ता ते णं छ तं जहा- पुव्वापोट्टवया कत्तिया महा पुव्वाफग्गुणी मूलो पुव्वासाढा तत्थ जेते नक्खत्ता पच्छंभागा समक्खेत्ता तीसइमुहुत्ता पन्नत्ता ते णं दस तं जहा- अभीई सवणो धणिट्ठा रेवती अस्सिणी मिगसिर पूसो हत्थो चित्ता अनुराहा तत्थ जेते नक्खत्ता नत्तंभागा अवड्ढक्खेत्ता पन्नरसमुहुत्ता पन्नत्ता ते णं छ तं जहा- संतभिसया भरणी अट्ठा अस्सेसा साती जेट्ठा तत्थ जेते नक्खत्ता उभयंभागा दिवड्ढक्खेत्ता पणयालीसइ-मुहुत्ता पन्नत्ता ते णं छ तं जहा- उत्तराभट्टवया रोहिणी पुनव्वसू उत्तराफग्गुणी विसाहा उत्तरासाढा ।

◦ दसमे पाहुडे तच्चं पाहुडपाहुडं समत्तं ◦

▣ **चउत्थं पाहुडपाहुडं** ▣

[४६] ता कहं ते जोगस्स आदी आहितेति वदेज्जा ता अभीई-सवणा खलु दुवे नक्खत्ता पच्छंभागा समक्खेत्ता सातिरेगऊतालीसइमुहुत्ता तप्पढमयाए सायं चंदेणं सद्धिं जोयं जोएति ततो पच्छा नवरं सातिरेगं दिवसं-एवं खलु अभीई-सवणा दुवे नक्खत्ता एगं रातिं एगं च सातिरेगं दिवसं चंदेणं सद्धिं जोयं जोएति जोएत्ता जोयं अनुपरियट्ठंति अनुपरियट्ठित्ता सायं चंदं धणिट्ठाणं समप्पेति ता धणिट्ठा खलु नक्खत्ते पच्छंभागे समक्खेत्ते तीसइमुहुत्ते तप्पढमयाए सायं चंदेण सद्धिं जोयं जोएति जोएत्ता ततो पच्छा रातिं अवरं च दिवसं-एवं खलु धणिट्ठा नक्खत्ते एगं रातिं एगं च दिवसं चंदेण सद्धिं जोयं जोएति जोएत्ता जोयं अनुपरियट्ठंति अनुपरियट्ठित्ता सायं चंदं सतभिसयाणं समप्पेति ता सतभिसया खलु नक्खत्ते नत्तंभागे अवड्ढक्खेत्ते पन्नरसमुहुत्ते तप्पढमयाए सायं चंदेणं सद्धिं जोयं जोएति नो लभति अवरं दिवसं-एवं खलु सतभिसया नक्खत्ते एगं रातिं चंदेणं सद्धिं जोयं जोएति जोएत्ता जोयं अनुपरियट्ठंति अनुपरियट्ठित्ता पातो चंदं पुव्वाणं पोट्टवयाणं सप्पेति ता पुव्वापोट्टवया खलु नक्खत्ते पुव्वंभागे समक्खेत्ते तीसइमुहुत्ते तप्पढमयाए पातो चंदेणं सद्धिं जोयं जोएति तओ पच्छा अवरं रातिं-एवं खलु पुव्वापोट्टवया नक्खत्ते

एगं

पाहुडं-१०, पाहुडपाहुडं-४

दिवसं एगं च रातिं चंदेणं सद्धिं जोयं जोएति जोएत्ता जोयं अनुपरियट्ठंति अनुपरियट्ठित्ता पातो चंदं उत्तराणं पोट्टवयाणं समप्पेति ता उत्तरापोट्टवया खलु नक्खत्ते उभयंभागे दिवड्ढक्खेत्ते पणयालीसइमुहुत्ते तप्पढमयाए पातो चंदेण सद्धिं जोयं जोएति अवरं च रातिं ततो पच्छा अवरं दिवसं-एवं खलु उत्तरापोट्टवया नक्खत्ते दो दिवसे एगं च रातिं चंदेणं सद्धिं जोयं जोएति जोएत्ता जोयं अनुपरियट्ठंति अनुपरियट्ठित्ता सायं चंदं रेवतीणं समप्पेति ता रेवती खलु नक्खत्ते पच्छंभागे समक्खेत्ते तीसइमुहुत्ते तप्पढमयाए सायं चंदेण सद्धिं जोयं जोएति ततो पच्छा अरं दिवसं-एवं खलु रेवती नक्खत्ते एगं रातिं एगं च दिवसं चंदेणं सद्धिं जोयं जोएति जोएत्ता जोयं अनुपरियट्ठंति अनुपरियट्ठित्ता सायं चंदं अस्सिणीणं समप्पेति ता अस्सिणी खलु नक्खत्ते पच्छंभागे समक्खेत्ते तीसइमुहुत्ते तप्पढमयाए सायं चंदेण सद्धिं

जोयं जोएति ततो पच्छा अवरं दिवसं एवं खलु अस्सिणी नक्खत्ते एगं राति एगं च दिवसं चंदेणं सद्धिं जोय जोएति जोएत्ता जोयं अनुपरियट्ठति अनुपरियट्ठित्ता सायं चंदं भरमीणं सम्पपेति ता भरणी खलु नक्खत्ते नत्तंभागे अवड्ढक्खत्ते पन्नरसमुहुत्ते तप्पढमयाए सायं चंदेण सद्धिं जोयं जोएति नो लभति अवरं दिवसं-एवं खलु भरणी नक्खत्ते एगं रातिं चंदेण सद्धिं जोयं जोएति जोएत्ता जोयं अनुपरियट्ठति अनुपरियट्ठित्ता पातो चंदं कत्तियाणं सम्पपेति ता कत्तिया खलु नक्खत्ते पुव्वंभागे समक्खत्ते तीसइमुहुत्ते तप्पढमयाए पातो चंदेण सद्धिं जोयं जोएति ततो पच्छा रातिं-एवं खलु कत्तिया नक्खत्ते एगं दिवसं एगं च रातिं चंदेण सद्धिं जोयं जोएति जोएत्ता जोयं अनुपरियट्ठति अनुपरियट्ठित्ता पातो चंदं रोहिणीणं सम्पपेति रोहिणी जहा उत्तरभद्दवया मिगसिरं जहा धणिद्धा अद्दा जहा सतभिसया पुणव्वसू जहा उत्तरभद्दवया मिगसिरं जहा धणिद्धा अद्दा जहा सतभिसया पुणव्वसू जहा उत्तरभद्दवया पुस्सो जहा धणिद्धा अस्सेसा जहा सतभिसया मधा जहा पुव्वाफग्गुणी पुव्वाफग्गुणी जहा पुव्वाभद्दवया उत्तराफग्गुणी जहा उत्तरभद्दवया हत्थो चित्ता य जहा धणिद्धा साती जहा सतभिसया विसाहा जहा उत्तरभद्दवया अनुराहा जहा धणिद्धा जेद्दा जहा सतिभिसया मूलो पुव्वासाढा य जहा पुव्वभद्दवया उत्तरासाढा जहा उत्तरभद्दवया ।

◦ दसमे पाहुडे चउत्थं पाहुडपाहुडं समत्तं ◦

◻ पंचमं पाहुडपाहुडं ◻

[४७] ता कहं ते कुला आहिताति वदेज्जा तत्थ खलु इमे बारस कुला बारस उवकुला चत्तारि कुलोवकुला पन्नत्ता बारस कुला तं जहा- धणिद्धाकुलं उत्तराभद्दवया कुल अस्सिणी कुलं कत्तिया कुलं संठाणा कुलं पुस्सो कुलं महा कुलं उत्तराफग्गुणी कुलं चित्ता कुलं विसाहा कुलं मूलो कुलं उत्तरासाढा कुलं बारस उवकुला तं जहा- सवणो उवकुलं पुव्वभद्दवया उवकुलं रेवती उवकुलं भरणी उवकुल रोहिणी उवकुलं पुन्नवसू उवकुलं अस्सेसा उवकुलं पुव्वाफग्गुणी उवकुलं हत्थो उवकुलं साती उवकुलं जेटअठा उवकुलं पुव्वासाढा उवकुलं चत्तारि कुलोवकुला तं जहा- अभीई कुलोवकुलं सतभिसया कुलोवकुलं अद्दा कुलोवकुलं अनुराहा कुलोवकुलं ।

◦ दसमे पाहुडे पंचमं पाहुडपाहुडं समत्तं ◦

◻ छडं पाहुडपाहुडं ◻

[४८] ता कहं ते पुण्णिमासिणी आहितेति वदेज्जा तत्थ खलु इमाओ बारस पुण्णिमासिणीओ बारस अमावासाओ साविट्ठी पोड्ववली आसोई कत्तिया मग्गसिरी पोसी माही फग्गुणी पाहुडं-१०, पाहुडपाहुडं-६

चेत्त वइसाही जेद्दामूली आसाढी ता साविट्ठिणं पुण्णिमासिं कति नक्खत्ता जोएंति ता तिण्णि नक्खत्ता जोएंति तं जहा-अभीई सवणो धणिद्धा ता पोड्ववतिण्णं पुण्णिमं तिण्णि नक्खत्ता जोएंति सत्तभिसय पुव्वा पोड्ववया उत्तरा पोड्ववया ता आसोइण्णं पुण्णिमं दोण्णि नक्खत्ता जोएंति रेवती अस्सिणी य ता कत्तियण्णं पुण्णिमं दोण्णि नक्खत्ता जोएंति तं जहा- भरणी कत्तिया य ता मग्गसिरण्णं पुण्णिमं दोण्णि नक्खत्ता जोएंति तं जहा- रोहिणी मिगसिरो य ता पोसिण्णं पुण्णिमं तिण्णि नक्खत्ता जोएंति तं जहा- अद्दा पुण्णवसू पुरस्सो ता माहिण्णं पुण्णिमं दोण्णि नक्खत्ता जोएंति तं जहा- अस्सेसा महा य ता फग्गुणिण्णं पुण्णिमं दुण्णि नक्खत्ता जोएंति तं जहा- पुव्वाफग्गुणी उत्तराफग्गुणी य ता चेत्तिण्णं पुण्णिमं दोण्णि नक्खत्ता जोएंति तं जहा- हत्थो चित्ता य ता वइसाहिण्णं पुण्णिमं दोण्णि नक्खत्ता

जोएति तं जहा- साती विसाहा य ता जेडामलिण्णं पुण्णिमासिणिं तिण्णि नक्खत्ता ओएति तं जहा- अनुराहा जेडामूलो ता आसदिण्णं पुण्णिमं दो नक्खत्ता जोएति तं जहा- पुच्चासाढा उत्तरासाढा ।

[४९] ता साविट्ठिण्णं पुण्णिमासिणिं किं कुलं जोएति उवकुलं वा जोएति कुलोवकुलं वा जोएति ता कुलं वा जोएति उवकुलं वा जोएति कुलोवकुलं वा जोएति कुलं जोएमाणे धणिट्ठा नक्खत्ते जोएति उवकुलं जोएमाणे सवणे नक्खत्ते जोएति कुलोवकुलं जोएमाणे अभिई नक्खत्ते जोएति साविट्ठिण्णं पुण्णिमं कुलं वा जोएति उवकुलं वा जुत्ता कुलोवकुलेण वा जुत्ता साविट्ठी पुण्णिमा जुत्ताति वत्तव्वं सिया ता पोड्ढवतिण्णं पुण्णिमं कुलं वा जोएति उवकुलं वा जोएति कुलोवकुलं वा जोएति कुलं जोएमाणे उत्तरापोड्ढवया नक्खत्ते जोएति उवकुलं जोएमाणे पुच्चापोड्ढवया नक्खत्ते जोएति कुलोवकुलं जोएमाणे सतभिसया नक्खत्ते जोएति पोड्ढवतिण्णं पुण्णिमासिणिं कुलं वा जोएति उवकुलं वा जोएति कुलोवकुलं वा जोएति कुलेण वा जुत्ता उवकुलेण वा जुत्ता कुलोवकुलेण वा जुत्ता पोड्ढवती पुण्णिमा जुत्ताति वत्तव्वं सिया, ता आसोइण्णं पुण्णिमासिणिं कुलंपि जोएति उवकुलंपि जोएति नो लभति कुलोवकुलं कुलं जोएमाणे अस्सिणी नक्खत्ते जोएति उवकुलं जोएमाणे रेवती नक्खत्ते जोएति आसोइण्णं पुण्णिमं कुलं वा जोएति उवकुलं वा जोएति कुलेण वा जुत्ता उवकुलेण वा जुत्ता आसोई णं पुण्णिमा जुत्ताति वत्तव्वं सिया एवं नेयच्चाओ-पोसिं पुण्णिमं जेडामूलिं पुण्णिमं च कुलोवकुलंपि जोएति अवसेसासु नत्थि कुलोवकुलं जाव आसाढी पुण्णिमा जुत्ताति वत्तव्वं सिया, ता सविट्ठिण्णं अमावासं कति नक्खत्ता जोएति तादुण्णि नक्खत्ता जोएतितंजहा- अस्सेसा महा य एवं एतेणं अभिलावेणं नेतव्वं पोड्ढवति दो नक्खत्ता जोएति तं जहा- पुच्चाफग्गुणी उत्तराफग्गुणी अस्सोइं हत्थो चित्ता य कत्तियं साती विसाहा य मग्गसिरिं अनुराधा जेडामूलो पोसिं पुच्चासाढा उत्तरासाढा माहिं अभीई सवणो घणिट्ठा फग्गुणिं सतभिसया पुच्चापोड्ढवया चेत्तिं उत्तरापोड्ढवया रेवती अस्सिणी य विसाहिं भरणी कत्तिया य जेडामूलिं रोहिणी मिगसिरं च ता आसादिण्णं अमावासिं तिण्णि नक्खत्ता जोएति तं जहा- अद्दा पुनव्वसू पुस्सो ता साविट्ठिण्णं अमावासं कुलं वा जोएति उवकुलं वा जोएति नो लभति कुलोवकुलं कुलं जोएमाणे महा नक्खत्ते जोएति उवकुलं जोएमाणे अस्सेसा नक्खत्ते जोएति कुलेण वा जुत्ता उवकुलेण वा जुत्ता साविट्ठी अमावासा जुत्ताति वत्तव्वं सिया एवं नेतव्वं नवरं-मग्गसिरीए माहीए फग्गुणीए आसाढीए य अमावासाए कुलोवकुलंपिजोएति सेसेसु अत्थि ।

◦ दसमे पाहुडे छद्दं पाहुडपाहुडं समत्तं ◦

पाहुडं-१०, पाहुडपाहुडं-७

[] सत्तमं पाहुडपाहुडं []

[५०] ता कहं ते सण्णिवाते आहितेति वदेज्जा ता जया णं साविट्ठी पुण्णिमा भवति तथा णं माही अमावासा भवति जया णं माही पुण्णिमा भवइ तथा णं साविट्ठी अमावासा भवइ जया णं पोड्ढवती पुण्णिमा भवति तथा णं फग्गुणी अमावासा भवति जया णं फग्गुणी पुण्णिमा भवति तथा णं पोड्ढवती अमावासा भवति जया णं आसोई पुण्णिमा भवति तथा णं चेत्ती अमावासा भवति जया णं चेत्ती पुण्णिमा भवति तथा णं वइसाही अमावासा भवति जया णं वइसाही पुण्णिमा भवति तथा णं कत्तिई अमावासा भवति जया णं मग्गसिरी पुण्णिमा भवति तथा णं जेडामूली अमावासा भवति जया णं

जेडामूली पुष्णिमा तथा णं मग्गसिरी अमावासा जया णं पोसी पुष्णिमा तथा णं आसाढी अमावासा जया णं आसाढी पुष्णिमा भवति तथा णं पोसी अमावासा भवति ।

◦ दसमे पाहुडे सत्तमं पाहुडपाहुडं समत्तं ◦

◻ अड्डमं पाहुडपाहुडं ◻

[५१] ता कहं ते नक्खत्तसंठिती आहितेति वदेज्जा ता एतेसि णंअट्ठावीसाए नक्खत्ताणं अभीई नक्खत्ते किसंठिते पन्नत्ते ता गोसीसावलिसंठिते पन्नत्ते ता सवणे नक्खत्ते काहारसंठिते पन्नत्तेता धणिट्ठा नक्खत्तेसउणिपलीणगसंठिते पन्नत्ते ता सतभिसया नक्खत्ते पुप्फोवयारसंठिते पन्नत्ते ता पुव्वापोडवया नक्खत्ते अवड्ढवाविसंठिते पन्नत्ते एवं उत्तरावि ता रेवति नक्खत्ते नावासंठिते पन्नत्ते ता उस्सिणी नक्खत्ते आसक्खंधसंठिते पन्नत्ते ता भरणी नक्खत्तो भगसंठिते पन्नत्ते ता कत्तिया नक्खत्ते छुरघरगसंठिते पन्नत्ते ता रोहिणी नक्खत्ते सगडुद्धिसंठिते पन्नत्तेता मिगसिरा नक्खत्ते मगसीसावलिसंठिते पन्नत्ते ता अट्ठा नक्खत्ते रुहिरिबिंदुसंठिते पन्नत्ते ता पुणव्वसू नक्खत्ते तुलासंठिते पन्नत्ते ता पुस्से नक्खत्ते बद्धमाणगसंठिते पन्नत्तेता अस्सेसा नक्खत्ते पडागसंठिते पन्नत्ते ता महा नक्खत्ते पागारसंठिते पन्नत्ते ता पुव्वाफग्गुणी नक्खत्ते अट्ठपलियंकसंठिते पन्नत्ते एवं उत्तरावि ता हत्थे नक्खत्ते हत्थसंठिते पन्नत्ते ता चित्ता नक्खत्ते मुहफुल्लसंठिते पन्नत्ते ता साती नक्खत्ते खीलगसंठिते पन्नत्तेविसाहानक्खत्ते दामणिसंठिते पन्नत्ते ता अनुराधा नक्खत्ते एगावलिसंठिते पन्नत्ते ता जेड्डा नक्खत्ते गयदंतसंठिते पन्नत्ते ता मूले नक्खत्ते विच्छुयनंगोलसंठिते पन्नत्ते ता पुव्वासाढा नक्खत्ते गयविककमसंठिते पन्नत्ते ता उत्तरासाढा नक्खत्ते सीहानिसाइसंठिते पन्नत्ता ।

◦ दसमे पाहुडे अड्डमं पाहुडपाहुडं समत्तं ◦

◻ नवमं पाहुडपाहुडं ◻

[५२] ता कहं ते तारग्गे आहितेति वदेज्जा ता एतेसि णं अट्ठावीसाए नक्खत्ताणं अभीई नक्खत्ते तितारे पन्नत्ते ता सवणे नक्खत्ते तितारे पन्नत्ते ता धणिट्ठा नक्खत्ते पणतारे पन्नत्ते ता सतभिसया नक्खत्ते सततारे पन्नत्ते ता पुव्वापोडवत्ता नक्खत्ते दुतारे पन्नत्ते एवं उत्तरावि ता रेवती नक्खत्ते बत्तीसतितारे पन्नत्ते ता अस्सिणी नक्खत्ते तितारे पन्नत्ते एवं सव्वे पुच्छिज्जंति-भरणी तितारे पन्नत्ते अट्ठा एगतारे पन्नत्ते पुणव्वसू पंचतारे पन्नत्ते पुस्से तितारे पन्नत्ते अस्सेसा छतारे पन्नत्ते मघा सत्ततारे पन्नत्ते पुव्वाफग्गुणी दुतारे पन्नत्ते एवं उत्तरावि हत्थे पंचतारे पन्नत्ते चित्ता एगतारे पन्नत्ते साती एगतारे पन्नत्ते

पाहुडं-१०, पाहुडपाहुडं-९

विसाहा पंचतारे पन्नत्ते अनुराहा चउतारे पन्नत्ते जेड्डा तितारे पन्नत्ते मूले एगतारे पन्नत्ते पुव्वासाढा चउतारे पन्नत्ते उत्तरासाढा चउतारे पन्नत्ते ।

◦ दसमे पाहुडे नवमं पाहुडपाहुडं समत्तं ◦

◻ दसम पाहुडपाहुडं ◻

[५३] ता कहं ते नेता आहितेति वदेज्जा ता वासाणं पढमं मासं कति नक्खत्ता णैति ता चत्तारि नक्खत्ता णैति तं जहा- उत्तरासाढा अभिई सवणो धणिढ्वा उत्तरासाढा चोद्दस अहोरत्ते नेति अभिई सत्त अहोरत्ते नेति सवणे अद्द अहोरत्ते नेति धणिढ्वा एगं अहोरत्तं नेति तंसि च णं मासंसि चउरंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे दो पदाइं चत्तारि अंगुलाइं पोरिसी भवति, ता वासाणं दोच्चं मासं चत्तारि नक्खत्ता णैति तं जहा- धणिढ्वा सतभिसता पुव्वोपोड्ववया उत्तरपोड्ववया धणिढ्वा चोद्दस अहोरत्ते नेति सतभिसता सत्त अहोरत्ते नेति पुव्वोपोड्ववया अद्द अहोरत्ते नेति उत्तरपोड्ववया एगं अहोरत्तं नेति तंसि च णं मासंसि अद्दगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे दो पदाइं अद्द अंगुलाइं पोरिसी भवति, ता वासाणं ततियं मासं तिण्णि नक्खत्ता णैति तं जहा- उत्तरापोड्ववया रेवती अस्सिणी उत्तरापोड्ववया चोद्दस अहोरत्ते नेति रेवती पन्नरस अहोरत्ते नेति अस्सिणी एगं अहोरत्तं नेति तंसि च णं मासंसि दुवालसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे लेहद्दाइं तिण्णि पदाइं पोरिसी भवति, ता वासाणं चउत्थं मासं तिण्णि नक्खत्ता णैति तं जहा अस्सिणी भरणी कत्तिया अस्सिणी चउद्दस्स अहोरत्ते नेति भरणी पन्नरस अहोरत्ते नेति कत्तिया एगं अहोरत्तं नेति तंसि च णं मासंसि सोलसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे तिण्णि पदाइं चत्तारि अंगुलाइं पोरिसी भवति, ता हेमंताणं पढमं मासं तिण्णि नक्खत्ता णैति तं जहा- कत्तिया रोहिणी संठाणा कत्तिया चोद्दस अहोरत्ते नेति रोहिणी पन्नरस अहोरत्ते नेति संठाणा एगं अहोरत्तं नेति तंसि च णं मासंसि वीसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे तिण्णि पदाइं अद्द अंगुलाइं पोरिसी भवइ, ता हेमंताणं दोच्च मासं चत्तारि नक्खत्ता णैति तं जहा- संठाणं अद्दा पुणव्वसू पुस्सो संठाणा चोद्दस अहोरत्ते नेति अद्दा सत्त अहोरत्ते नेति पुणव्वसू अद्द अहोरत्ते नेति पुस्से एगं अहोरत्तं नेति तंसि च णं मासंसि चउवीसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे लेहद्दाइं चत्तारि पदाइं पोरिसी भवति, ता हेमंताणं ततियं मासं तिण्णि नक्खत्ता णैति तं जहा- पुस्से अस्सेस्सा महा पुस्से चोद्दस अहोरत्ते नेति अस्सेसा पंचदस अहोरत्ते नेति महा एगं अहोरत्तं नेति तंसि च णं मासंसि वीसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे तिण्णि पदाइं अद्दगुलाइं पोरिसी भवति, ता हेमंताणं चउत्थं मासं तिण्णि नक्खत्ता णैति तं जहा- महा पुव्वाफग्गुणी उत्तराफग्गुणी महा चोद्दस अहोरत्ते नेति पुव्वाफग्गुणी पन्नरस अहोरत्तेनेति उत्तराफग्गुणी एगं अहोरत्तं नेति तंसि च णं मासंसि सोलसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे तिण्णि पदाइं चत्तारि अंगुलाइं पोरिसी भवति, ता गिम्हाणं पढमं मासं तिण्णि नक्खत्ता णैति तं जहा- उत्तराफग्गुणी हत्थो चित्ता उत्तराफग्गुणी चोद्दस अहोरत्ते नेति हत्थो पन्नरस अहोरत्ते नेति चित्ता एगं अहोरत्तं नेति तंसि च णं मासंसि दुवालसंगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे लेहद्दाइं

पाहुडं-१०, पाहुडपाहुडं-१०

तिण्णि पदाइं पोरिसी भवति, ता गिम्हाणं बितियं मासं तिण्णिनक्खत्ता णैति तं जहा- चित्ता साती विसाहा चित्ता चोद्दस अहोरत्ते नेति साती पन्नरस अहोरत्ते नेति विसाहा एगं अहोरत्तं नेति तंसि च णं मासंसि अद्दगुलपोरिसीए छायाए सूरिए अनुपरियट्टति तस्स णं मासस्स चरिमे दिवसे दो पदाइं अद्द अंगुलाइं पोरिसी भवति, ता गिम्हाणं ततियं मासं चत्तारि नक्खत्ता णैति तं जहा- विसाहा अनुराहा जेद्दा

मूलो विसाहा चोदस अहोरत्ते नेति अनुराहा सत्तअहोरत्ते नेति जेद्वा अद्द अहोरत्ते नेति मूलो एगं अहोरत्तं नेति तंसि च णं मासंसि चउरंगुलपोरिसीए छायाए सूरिए अनुपरियद्वइ तस्स णं मासस्स चरिमे दिवसे दो पदाणि चत्तारि अंगुलाइं पोरिसी भवति, तागिम्हाणं चउत्थं मासं तिण्णि नक्खत्ता णेतितं जहा-मूलो पुव्वासाढा उत्तरासाढा मूलो चोदस अहोरत्ते नेति पुव्वासाढा पन्नरस अहोरत्ते नेति उत्तरासाढा एगं अहोरत्तं नेति तंसि च णं मासंसि वद्वाए समचउरंससंठिताए नग्गोहपरिमंडलाए सकायमणुरंगिणीए छायाए सूरिए अनुपरियद्वति तस्स णं मासस्स चरिमे दिवसे लेहद्वाइं दो पदाइं पोरिसी भवति ।

◦ दसमे पाहुडे दसमं पाहुडपाहुडं समत्तं ◦

◻ **एक्कारसमं पाहुडपाहुडं** ◻

[५४] ता कहं ते चंदमग्गा आहितेत वदेज्जा ता एतेसि णं अद्वावीसाए नक्खत्ताणं अत्थि नक्खत्ता जे णं सया चंदस्स दाहिणेणं जोयं जोएंति अत्थि नक्खत्ता जे णं सया चंदस्स उत्तरेणं जोयं जोएंति अत्थि नक्खत्ता जे णं चंदस्स दाहिणेणवि उत्तरेणवि पमद्वंपि जोयं जोएंति अत्थि नक्खत्ता जे णं चंदस्स दाहिणेणवि पमद्वंपि जोयं जोएंति अत्थि नक्खत्ते जे णं सया चंदस्स पमद्वं जोयं जोएति ता एतेसि णं अद्वावीसाए नक्खत्ताणं कयरे नक्खत्ता जे णं सया चंदस्स दाहिणेणं जोयं जोएंति तहेव जाव कयरे नक्खत्ते जे णं सया चंदस्स पमद्वं जोयं जोएति ताएतेसि णं अद्वावीसाए नक्खत्ताणं जे णं नक्खत्ता सया चंदस्स दाहिणेणं जोयं जोएंति ते णं छ तं जहा- संठाणा अद्वा पुस्सो अस्सेसा हत्थो मूलो तत्थ जेते नक्खत् जे णं सया चंदस्स उत्तरेणं जोयं जोएंति ते णं बारस तं जहा- अभिई सवणो धणिट्ठा सतभिसया पुव्वाभद्ववया उत्तरापोद्दवया रेवती अस्सिणी भरणीपुव्वाफग्गुणी उत्तराफग्गुणी साती तत्थ जेते नक्खत्ता जे णं चंदस्स दाहिणेणविउत्तरेणवि पमद्वंपि जोयं जोएंति ते णं सत्त तं जहा- कत्तिया रोहिणी पुणव्वसू महा चित्ता विसाहा अनुराहा तत्थ जेते नक्खत्ता जे णं चंदस्स दाहिणेणवि पमद्वंपि जोयं जोएंति ताओ णं दो आसाढाओ सव्वबाहिरे मंडले जोयं जोएंसु वा जोएंति वा जोएस्संति वा तत्थ जेसे नक्खत्ते जे णं सया चंदस्सपमद्वं जोयं जोएति सा णं एगा जेद्वा ।

[५५] ता कति ते चंदमंडला पन्नत्ता ता पन्नरस चंदमंडला पन्नत्ता ता एतेसि णं पन्नरसण्हं चंदमंडलाणं अत्थि चंदमंडलाणं अत्थि चंदमंडला जे णं सया नक्खत्तेहिं अविरहिया अत्थि चंदमंडला जे णं सया नक्खत्तेहिंविरहिया अत्थि चंदमंडला जे णं रविससिनक्खत्ताणं सामण्णा भवंति अत्थि चंदमंडला जे णं सया आदिच्चेहिं विरहिया ता एतेसि णं पन्नरसण्हं चंदमंडलाणं कयरे चंदमंडला जे णं सया नक्खत्तेहिं अविरहिया जाव कयरे चंदमंडला जे णं सया आदिच्चेहिं विरहिया ता एतेसि णं पन्नरसण्हं चंदमंडलाणं तत्थ जेते चंदमंडला जे णं सया नक्खत्तेहिं अविरहिया ते णं अद्द तं जहा- पढमे चंदमंडले ततिए चंदमंडले छद्दे चंदमंडले सत्तमे चंदमंडले अद्दमे चंदमंडले दसमे चंदमंडले एक्कारसमे चंदमंडले पन्नरसमे चंदमंडले तत्थ जेते चंदमंडला जे णं सया नक्खत्तेहिं विरहिया ते णं सत्त तं जहा- वितिए

पाहुडं-१०, पाहुडपाहुडं-११

जचंदमंडले चउत्थे चंदमंडले पंचमे चंदमंडले नवमे चंदमंडले बारसमे चंदमंडले तेरसमे चंदमंडले चउदसमे चंदमंडले तत्थ जेते चंदमंडला जे णं रविससिनक्खत्ताणं सामण्णा भवंति ते णं चत्तारि तं जहा- पढमे चंदमंडले बीए चंदमंडले इक्कारसमे चंदमंडले पन्नरसमे चंदमंडले तत्थ जेते चंदमंडला जे णं सया

आदिच्चेहिं विरहिया ते णं पंच तं जहा- छट्टे चंदमंडले सत्तमे चंदमंडले अट्टमे चंदमंडले नवमे चंदमंडले दसमे चंदमंडले ।

◦ दसमे पाहुडे एक्कारसमं पाहुडपाहुडं समत्तं ◦

[] बारसमं पाहुडपाहुडं []

[५६] ता कहं ते देवयाणं अज्झयणा आहिताति वदेज्जा ता एतेसि णं अट्टावीसाए नक्खत्ताणं अभिई नक्खत्ते वम्हदेवयाए पन्नत्ते ता सवणे नक्खत्ते विण्हुदेवयाए पन्नत्ते ता धणिट्ठा नक्खत्ते वसुदेवयाए पन्नत्ते ता सतभिसया नक्खत्ते वरुणदेवयाए पन्नत्ते ता पुव्वापोट्टवया नक्खत्ते अयदेवयाए पन्नत्ते ता उत्तरापोट्टवया नक्खत्ते अभिवड्ढिदेवयाए पन्नत्ते एवं सव्वेवि पुच्छिज्जंति-रेवती-पुस्सदेवया अस्सिणीअस्सदेवयाए भरणीजमदेवयाए कत्तिया अग्गिदेवया रोहिणीपयावड्ढेवयाए संठाणासोमदेवयाए अट्टारुद्धदेवयाए पुणव्वसूअदितिदेवयाए पुस्सोबहस्सइदेवयाए अस्सेसासप्पदेवयाए महापिड्ढेवयाए पुव्वाफग्गुणीभगदेवयाए उत्तराफग्गुणीअज्जमदेवयाए हत्थेसवियादेवयाए चित्तातट्टेवयाए सातीवायुदेवयाए विसाहा इंदग्गिदेवयाए अनुराहामित्तदेवयाए जेड्डाइंददेवयाए मूलेनिरइदेवयाए पुव्वासाढाआउदेवयाए उत्तरासाढाविस्सदेवयाए पन्नत्ते ।

◦ दसमे पाहुडे बारसमं पाहुडपाहुडं समत्तं ◦

[] तेरसमं पाहुडपाहुडं []

[५७] ता कहं ते मुहुत्ताणं नामधेज्जा आहिताति वदेज्जा ता एगमेगस्स णं अहोरत्तस्सतीसं मुहुत्ता पन्नत्ता [तं जहा] ।

[५८] रोद्धे सेते मित्ते वाउ सुपीए तहेव अभिचंदे ।

माहिंद बलव बंभे बहुसच्चे चेव ईसाणे ।

[५९] तट्टे य भावियप्पा वेसमणे वारुणे य आणंदे ।

माहिंद बलव बंभे बहुसच्चे चेव ईसाणे ।

[६०] गंधव्व अग्गिवेसे सयरिसहे आयवं च अममे य ।

अणवं च भोमे रिसहे सव्वट्टे रक्खसे चेव ।

◦ दसमे पाहुडे तेरसमं पाहुडपाहुडं समत्तं ◦

[] चउद्धसमं पाहुडपाहुडं []

[६१] ता कहं ते दिवसे आहिताति वदेज्जा ता एगमेगस्स णं पक्खस्स पन्नरस दिवसा पन्नत्ता तं जहा- पडिवादिवसे बितियादिवसे जाव पन्नरसीदिवसे ता एतेसि णं पन्नरसण्हं दिवसाणं पन्नरस नामधेज्जा पन्नत्ता [तं जहा]-

[६२] पुव्वंगे सिद्धमणोरमे य तत्तो मणोहरे चेव ।

पाहुडं-१०, पाहुडपाहुडं-१४

जसभद्धे य जसोधरे सव्वकामसमिद्धे ।

[६३] इंदमुद्धाभिसित्ते य सोमणस धणंजए य बोद्धव्वे ।

अत्थसिद्धे अभिजाते अच्चसणे य सयंजए ।

[६४] अग्निवेसे उवसमे दिवसाणं नामधेज्जाइं ता कहं ते रातिओ आहिताति वदेज्जा ता एगमेगस्स णं पक्खस्स पन्नरस रातिओ पन्नत्ताओ तं जहा- पडिवाराति बितियाराति जाव पन्नरसीराति ता एतासि णं पन्नरसण्हं रातिणं पन्नरस नामधेज्जा पन्नत्ता [तं जहा]-

[६५] उत्तमा य सुनक्खत्ता एलावच्चा जसोधरा ।

सोमणसा चेव तहा सिरिसंभूया य बोद्धवा ।

[६६] विजया य वेजयंति जयंति अपराजिया य इच्छा य ।

समाहारा चेव तहा तेया य तहा य अतितेया ।

[६७] देवाणंदा राति रयणीणं नामधेज्जाइं

◦ दसमे पाहुडे चउद्दसमं पाहुडपाहुडं समत्तं ◦

◻ **पन्नरसमं पाहुडपाहुडं** ◻

[६८] ता कहं ते तिही आहितेति वदेज्जा तत्थ खलु इमा दुविहा तिही पन्नत्ता तं जहा- दिवसतिही य रातितिही य ता कहं ते दिवसतिही ता एगमेगस्स णं पक्खस्स पन्नरस-पन्नरस दिवसतिही तं जहा- नंदे भद्दे जए तुच्छे पुण्णे पक्खस्सपंचमी पुणरवि णंदे भद्दे जए तुच्छे पुण्णे पक्खस्स दसमी पुणरवि-णंदे भद्दे जए तुच्छे पुण्णे पक्खस्स पन्नरसी एवं ते तिगुणा तिहीओ सव्वेसिं दिवसाणं ता कहं ते रातितिही ता एगमेगस्स णं पक्खस्स पन्नरस-पन्नरस रातितिही तं जहा- उग्गवई भोगवई जसवई सव्वसिद्धा सुहनामा पुणरवि-उग्गवई भोगवई जाव सुहनामा पुणरवि-उग्गवई भोगवई जाव सुहनामा एवं एते तिगुणा तिहीओ सव्वसिं रातिणं ।

◦ दसमे पाहुडे पन्नरसमं पाहुडपाहुडं समत्तं ◦

◻ **सोलसमं पाहुडपाहुडं** ◻

[६९] ता कहं ते गोत्ता आहिताति वदेज्जा ता एतेसि णं अट्ठावीसाए नक्खत्ताणं अभीई नक्खत्ते किंगोत्ते पन्नत्ते ता मोग्गलायणसगोत्ते पन्नत्ते ता सवणे नक्खत्ते संखायणसगोत्ते पन्नत्ते ता धणिट्ठा नक्खत्ते अग्गभावसगोत्ते पन्नत्ते ता सतभिसया नक्खत्ते कण्णिणायणसगोत्तेपन्नत्ते ता पुव्वापोडुवया नक्खत्ते जाउकण्णियसगोत्ते पन्नत्ते ता उत्तरापोडुवया नक्खत्ते धणंजयसगोत्ते पन्नत्ते ता रेवती नक्खत्ते पुस्सायणसगोत्ते पन्नत्ते ता अस्सिणी नक्खत्ते अस्सायणसगोत्ते पन्नत्ते ता भरणी नक्खत्ते भग्गवेससगोत्ते पन्नत्ते ता कत्तिया नक्खत्ते अग्निवेससगोत्ते पन्नत्ते ता रोहिणी नक्खत्ते गोयमस-गोत्ते पन्नत्ते ता संठाणा नक्खत्ते भारद्वायसगोत्ते पन्नत्ते ता अट्ठा नक्खत्ते लोहिच्चायणसगोत्ते पन्नत्ते ता पुणव्वसू नक्खत्ते वासिडुसगोत्ते पन्नत्ते ता पुस्से नक्खत्ते ओमज्जायणसगोत्ते पन्नत्ते ता अस्सेसा नक्खत्ते मंडव्वयणसगोत्ते पन्नत्ते ता महा नक्खत्ते पिंगायणसगोत्ते पन्नत्ते ता पुव्वाफग्गुणी नक्खत्ते गोवल्लायणसगोत्ते पन्नत्ते ता उत्तराफग्गुणी नक्खत्ते कासवसगोत्ते पन्नत्ते ता हत्थे नक्खत्ते कोसियसगोत्ते पन्नत्ते ता चित्ता नक्खत्ते पाहुडं-१०, पाहुडपाहुडं-१६

दब्धियायणसगोत्ते पन्नत्ते ता साती नक्खत्ते चामरच्छायणसगोत्ते पन्नत्ते ता जेढा नक्खत्ते तिगिच्छायण-सगोत्ते पन्नत्ते ता मूले नक्खत्ते कच्चायणसगोत्ते पन्नत्ते ता पुच्चा साढा नक्खत्ते वज्झियायणसगोत्ते पन्नत्ते ता उत्तरासाढा नक्खत्ते वग्घावच्चसगोत्ते पन्नत्ते ।

◦ दसमे पाहुडे सोलसमं पाहुडपाहुडं समत्तं ◦

□ सत्तरसमं पाहुडपाहुडं □

[७०] ता कहं ते भोयणा आहिताहि वदेज्जा ता एतेसि णं अद्वावीसाए नक्खत्ताणं कत्तियाहिं दधिणा भोच्चा कज्जं साधेति रोहिणीहिं वसभमंसं भोच्चा कज्जं साधेति संठाणाहिं मिगमंसं भोच्चा कज्जं साधेति अद्वाहिं नवणीतेण भोच्चा कज्जं साधेति पुणव्वसुणा धतेण भोच्चा कज्जं साधेति पुस्सेण खीरेण भोच्चा कज्जं साधेति अस्सेसाहिं दीवगमंसं भोच्चा कज्जं साधेति महाहिं कसरिं भोच्चा कज्जं साधेति पुच्चाहिं फग्गुणीहिं मेंढकमंसं भोच्चा कज्जं साधेति उत्तराहिं फग्गुणीहिं नखीमंसं भोच्चा कज्जं साधेति हत्थेणं वच्छाणीएण भोच्चा कज्जं साधेति चित्ताहिं मुग्गसूवेणं भोच्चा कज्जं साधेति सादिणा फलाइं भोच्चा कज्जं साधेति विसाहाहिं आसित्ति याओ अगत्थियाओ भोच्चा कज्जं साधेति अनुराहाहिं मिस्साकूरं भोच्चा कज्जं साधेति जेढाहिं कोलट्टिएणं भोच्चा कज्जं साधेति मूलेणं मूलापन्नेणं भोच्चा कज्जं साधेति पुच्चाहिं आसाढाहिं आमलगसारिएणं भोच्चा कज्जं साधेति उत्तराहिं आसाढाहिं बिल्लेहिं भोच्चा कज्जं साधेति अभीइणा पुप्फेहिं भोच्चा कज्जं साधेति सवणेणं खीरेणं भोच्चा कज्जं साधेति धणिद्वाहिं जूसेणं भोच्चा कज्जं साधेति सतभिसयाए तुवरीओ भोच्चा कज्जं साधेति पुच्चाहिं पोडुवयाहिं कारिल्लएहिं भोच्चा कज्जं साधेति उत्तराहिं पोडुवयाहिं वराहमंसं भोच्चा कज्जं साधेति रेवतीहिं जलयरमंसं भोच्चा कज्जं साधेति अस्सिणीहिं तित्तिरमंसं भोच्चा कज्जं साधेति अहवा वट्टगमंसं भरणीहिं तिलतंदुलगं भोच्चा कज्जं साधेति ।

◦ दसमे पाहुडे सत्तरसमं पाहुडपाहुडं समत्तं ◦

□ अद्धारसमं पाहुडपाहुडं □

[७१] ता कहं ते चारा आहिताति वदेज्जा तत्थ खलु इमे दुविहा चारा पन्नत्ता तं जहा-आदिच्चचारा य चंदचारा य ता कहं ते चंदचारा आहिताति वदेज्जा ता पंच संवच्छरिए णं जुगे अभीई नक्खत्ते सत्तसद्धिचारे चंदेणं सद्धिं जोयं जोएति सवणे णं नक्खत्ते सत्तसद्धिचारे चंदेणं सद्धिं जोयं जोएति एवं जाव उत्तरासाढा नक्खत्ते सत्तसद्धिचारे चंदेणं सद्धिं जोयं जोएति ता कहं ते आदिच्चचारा आहिताति वदेज्जा ता पंच संवच्छरिए णं जुगे अभीई नक्खत्ते पंचचारे सूरेण सद्धिं जोयं जोएति एवं जाव उत्तरासाढा नक्खत्ते पंचचारे सूरेण सद्धिं जोयं जोएति ।

◦ दसमे पाहुडे अद्धारसमं पाहुडपाहुडं समत्तं ◦

□ एग्गुणीसइमं पाहुडपाहुडं □

[७२] ता कहं ते मासा आहिताति वदेज्जा ता एग्गुणीसइमं णं संवच्छरस्स बारस मासा तेसिं च दुविहा नामधेज्जा-लोइया लोउत्तरिया य तत्थ लोइया नामा इमे तं जहा- सावणे भद्दवते अस्सोए कत्तिए मग्गसिरे पोसे माहे फग्गुणे चित्ते वइसाहे जेढामूले आसाढे लोउत्तरिया नामा इमे ।

पाहुडं-१०, पाहुडपाहुडं-१९

- [७३] अभिनंदे सुपइहे य विजए पीतिवद्धण ।
सेज्जंसे य सिवे यावि सिंसिरे य स हेमवं ।
- [७४] नवमे वसंतमासे दसमे कुसुमसंभवे ।
एकादसमे निदाहे वणविरोही य बारसे ।

◦ दसमे पाहुडे एगूणवीसइमं पाहुडपाहुडं समत्तं ◦

□ वीसइमं पाहुडपाहुडं □

[७५] ता कति णं संवच्छरा आहिताति वदेज्जा ता पंच संवच्छरा आहिताति वदेज्जा तं जहा- नकखत्तसंवच्छरे जुगसंवच्छरे पमाणसंवच्छरे लकखणसंवच्छरे सणिच्छरसंवच्छरे ।

[७६] ता नकखत्तसंवच्छरे णं दुवालसविहे पन्नत्ते तं जहा- सावणे भद्वए जाव आसाढे जं वा बहस्सतीमहग्गहे दुवालसहिं संवच्छरेहिंसव्वं नकखत्त-मंडलं समाणेति ।

[७७] ता जुगसंवच्छरे णं पंचविहे पन्नत्ते तं जहा- चंदे चंदे अभिवड्ढिए चंदे अभिवड्ढिए चेव ता पढमस्स णं चंदसंवच्छरस्स चउव्वीसं पव्व पन्नत्ता दोचस्स णं चंदसंवच्छरस्स चउव्वीसं पव्वा पन्नत्ता तच्चस्स णं अभिवड्ढियसंच्छरस्स छव्वीसं पव्वा पन्नत्ता चउत्थस्स णं चंदसंवच्छरस्स चउव्वीसं पव्वा पन्नत्ता पंचमस्स णं अभिवड्ढिय संवच्छरस्स छव्वीसं पव्वा पन्नत्ता एवामेव सपुव्वावरेणं पंचसंवच्छरिए जुगे एगे चउवीसे पव्वसते भवतीति मक्खायं ।

[७८] ता पमाणसंवच्छरे णं पंचविहे नकखत्ते चंद उडू आइच्चे अभिवड्ढिते ।

[७९] ता लकखणसंवच्छरे णं पंचविहे पन्नत्ते तं जहा- नकखत्ते चंदे उडू आइच्चे अभिवड्ढिते ता नकखत्तसंवच्छरे पंचविहे पन्नत्ते [तं जहा] ।

[८०] समगं नकखत्ता जोयं जोएंति समगं उडू परिणमंति

।

नच्चुणहं नातिसीते बहूदओ होति नकखत्ते ।

[८१] ससि समग पुन्निमासिं जोएंति विसमचारिणकखत्ता ।

कडुओ बहूदओ य तमाहुं संवच्छरं चंदं ।

[८२] विसमं पवालिणो परिणमंति अनुऊसु दिंति पुप्फफलं ।

वासं न सम्म वासति तमाहुं संवच्छरं कम्मं ।

[८३] पुढविदगाणं चर रसं पुप्फफलाणं च देइ आइच्चे ।

अप्पेणवि वासेणं सम्मं निप्फज्जए सस्सं ।

[८४] आइच्चतेयतविया खणलवदिवसा उडू परिणमंति ।

पूरेति निण्णथलए तमाहु अभिवड्ढिय जाण ।

[८५] ता सणिच्छरसंवच्छरे णं अट्टावीसइविहे पन्नत्ते तं जहा- अभीई सवणे जाव उत्तरासाढा जं वा सणिच्छरे महग्गहे तीसाए संवच्छरेहिं सव्वं नकखत्तमंडलं समाणेइ ।

◦ दसमे पाहुडे वीसइमं पाहुडपाहुडं समत्तं ◦

□ एकवीसइमं पाहुडपाहुडं □

[८६] ता कहं ते जोतिसस्स दारा आहिताति वदेज्जा तत्थ खलु इमाओ पंच पडिवत्तीओ

उत्तराफग्गुणी हत्थो चित्ता सातियादिया णं सत्त नक्खत्ता उत्तरादारिया पन्नत्ता तं जहा- साती विसाहा अनुराहा जेद्वा मूले पुच्चासाढा उत्तरासाढा ।

पाहुडं-१०, पाहुडपाहुडं-२१

◦ दसमे पाहुडे एक्कवीसइमं पाहुडपाहुडं समत्तं ◦

□ **बावीसइमं पाहुडपाहुडं** □

[८७] ता कहं ते नक्खत्तविजए आहितेति वदेज्जा ता अयण्णं जंबुद्धीवे दीवे सव्वदीवसमुद्धानं सव्वब्भंतराए जाव परिकखेवेणं ता जंबुद्धीवे णं दीवे दो चंदा पभासँसु वा पभासँति वा पभासिस्संति वा दो सूरिया तविंसु वा तवँति वा तविस्संति वा छप्पण्णं नक्खत्ता जोयं जोएंसु वा जोएंति वा जोइस्संति वा तं जहा- दो अभीई दो सवणा दो धणिद्वा दो सतभिसया दो पुच्चापोडवया दो उत्तरापोडवया दो रेवती दो अस्सिणी दो भरणी दो कत्तिया दो रोहिणी दो संठाणा दो अद्दा दो पुनव्वसू दो पुस्सा दो अस्सेसाओ दो महा दो पुच्चाफग्गुणी दो उत्तराफग्गुणी दो हत्था दो चित्ता दो साती दो विसाहा दो अनुराधा दो जेद्वा दो मूला दो पुच्चासाढा दो उत्तरासाढा ता एतेसि णं छप्पण्णाए नक्खत्ताणं- अत्थि नक्खत्ता जे णं नव मुहुत्ते सत्तावीसं च सत्तद्विभागे मुहुत्तस्स चंदेण सद्धिं जोयं जोएंति अत्थि नक्खत्ता जे णं पन्नरस मुहुत्ते चंदेणं सद्धिं जोयं जोएंति अत्थि नक्खत्ता जे णं तीसं मुहुत्ते चंदेणं सद्धिं जोयं जोएंति अत्थि नक्खत्ता जे णं पणयालीसं मुहुत्ते चंदेणं सद्धिं जोयं जोएंति ता एतेसि णं छप्पण्णाए नक्खत्ताणं कयरे नक्खत्ताओ जे णं नव मुहुत्ते सत्तावीसं च सत्तद्विभागे मुहुत्तस्स चंदेण सद्धिं जोयं जोएंति कयरे नक्खत्ताजे णं पन्नरस मुहुत्ते चंदेणं सद्धिं जोयं जोएंति कयरे नक्खत्ता जे णं तीसं मुहुत्तेचंदेणं सद्धिं जोयं जोएंति कयरे नक्खत्ता जे णं पणयालीसं मुहुत्ते चंदेणं सद्धिं जोयं जोएंति ता एतेसि णं छप्पण्णाए नक्खत्ताणं तत्थ जेते नक्खत्ताजे णं नव मुहुत्ते सत्तावीसं च सत्तद्विभागे मुहुत्तस्स चंदेणं सद्धिं जोयं जोएंति ते णं दो अभीई तत्थ जेते नक्खत्ता जे णं पन्नरस मुहुत्त चंदेण सद्धिं जोयं जोएंति ते णं बारस तं जहा- दो सतभिसया दो भरणी दो अद्दा दो अस्सेसा दो साती दो जेद्वा तत्थ जेते नक्खत्ता जे णं तीसं मुहुत्ते चंदेणं सद्धिं जोयं जोएंति तेणंतीसं तं जहा- दो सवणा दो धणिद्वा दो पुच्चाभद्वया दो रेवती दो अस्सिणी दो कत्तिया दो संठाणा दो पुस्सा दो महा दो पुच्चाफग्गुणी दो हत्था दो चित्ता दो अनुराहा दो मूला दो पुच्चासाढा तत्थ जेते नक्खत्ता जे णं पणयालीसं मुहुत्ते चंदेणं सद्धिं जोयं जोएंति ते णं बारस तं जहा- दो उत्तरापोडवया दो रोहिणी दो पुनव्वसू दो उत्तराफग्गुणी दो विसाहा दो उत्तरासाढा ता एतेसि णं छप्पण्णाए नक्खत्ताणं-अत्थि नक्खत्ता जे णं चत्तारि अहोरत्ते छच्च मुहुत्ते सूरिणं सद्धिं जोयं जोएंति अत्थि नक्खत्ता जे णं छ अहोरत्ते एक्कवीसं च मुहुत्ते सूरिण सद्धिं जोयं जोएंति अत्थि नक्खत्ता जे णं तेरस अहोरत्ते बारस मुहुत्ते सूरिणं सद्धिं जोयं जोएंति अत्थि नक्खत्ता जे णं वीसं अहोरत्ते तिण्णि य मुहुत्ते सूरिण सद्धिं जोयं जोएंति ता एतेसि णं छप्पण्णाए नक्खत्ताणं कयरे नक्खत्ता जे णं तं चेव उच्चारयव्वं ता एतेसि णं छप्पण्णाए नक्खत्ताणं तत्थ जेते नक्खत्ता जे णं चत्तारि अहोरत्ते छच्च मुहुत्ते सूरिण सद्धिं जोयं जोएंति ते णं दो अभीई तत्थ जेते नक्खत्ता जे णं छ अहोरत्ते एक्कवीसं च मुहुत्ते सूरिण सद्धिं जोयं जोएंति ते णं बारस तं जहा- दो सतभिसया दो भरणी दो अद्दा दो अस्सेसा दो साती दो जेद्वा तत्थ जेते नक्खत्ता जे णं तेरस अहोरत्ते बारस समुहुत्ते सूरिण सद्धिं जोयं जोएंति ते णं तीसं तं जहा- दो सवणा जाव दो पुच्चासाढा तत्थ जेते

नकखत्ताजे णं वसं अहोरत्ते तिण्णि य मुहुत्ते सूरेण सद्धिं जोयं जोएति ते णं बारस तं जहा- दो उत्तरापोडुवया जाव दो उत्तरासाढा ।

[८८] ता कहं ते सीमाविकखंभो आहितेति वदेज्जा ता एतेसि णं छप्पण्णाए नकखत्ताणं- पाहुडं-१०, पाहुडपाहुडं-२२

अत्थि नकखत्ता जेसि णं छ सता तीसा सत्तद्धिभागतीसतिभागणं सीमाविकखंभो अत्थि नकखत्ता जेसि णं सहस्सं पंचोत्तरं सत्तद्धिभागतीसतिभागणं सीमाविकखंभो अत्थि नकखत्ता जेसि णं तिण्णि सहस्सा पन्नरसुत्तरा सत्तद्धिभागतीसतिभागणं सीमाविकखंभो ता एतेसि णं छप्पण्णाए नकखत्ताणं कयरे नकखत्ता जेसि णं छ सत्ता तीसा तं चेव उच्चारेतव्वं कयरे नकखत्ता जेसि णं तिण्णि सहस्सा पन्नरसुत्तरा सत्तद्धि-भागतीसातिभागणं सीमाविकखंभो ता एतेसि णं छप्पण्णाए नकखत्ताणं तत्थ जेते नकखत्ता जेसि णं छ सता तीसा सत्तद्धिभागतीसतिभागणं सीमाविकखंभो ते णं दो अभीई तत्थ जेते नकखत्ता जेसि णं सहससं पंचुत्तरं सत्तद्धिभागतीसतिभागणं सीमाविकखंभो ते णं बारस तं जहा- दो सतभिसया जाव दो जेढा तत्थ जेते नकखत्ता जेसि णं दो सहस्सा दसुत्तरा सत्तद्धिभागतीसतिभागणं सीमाविकखंभो ते णं तीसं तं जहा- दो सवणा जाव दो पुव्वासाढा तत्थ जेते नकखत्ता जेसि णं तिण्णि सहस्सा पन्नरसुत्तरा सत्तद्धिभागती-सतिभागणं सीमाविकखंभो ते णं बारस तं जहा- दो उत्तरापोडुवया जाव दो उत्तरासाढा ।

[८९] ता एतेसि णं छप्पण्णाए नकखत्ताणं-किं सया पातो चंदेण सद्धिं जोयं जोएति किं सया सायं चंदेण सद्धिं जोयं जोएति किं सया दुहओ पविद्धित्ता-पविद्धित्ता चंदेण सद्धिं जोयं जोएति ता एतेसि णं छप्पण्णाए नकखत्ताणं किमपि तं जं सया पातो चंदेणं सद्धिं जोयं जोएति नो सया सायं चंदेणं सद्धिं जोयं जोएति नो सया दुहओ पविद्धित्ता-पविद्धित्ता चंदेणं सद्धिं जोयं जोएति नन्नत्थ दोहिं अभीईहिं ता एतेणं दो अभीई पायंचिय-पायंचिय चोत्तालीसं-चोत्तालीसं अमावासं जोएति नो चेव णं पुन्निमासिणिं ।

[९०] तत्थ खलु इमाओ बावद्धिं पुन्निमासिणीओ बावद्धिं अमावासाओ पन्नत्ताओ ता एतेसि णं पंचण्हं संवच्छराणं पढमं पुण्णिमासिणिं चंदे कंसि देसंसि जोएति ता जंसि णं देसंसि चंदे चरिमं बावद्धि पुन्निमासिणिं जोएति ताओ पुन्निमासिणिद्वाणाओ मंडलं चउव्वीसेणं सएणं छेत्ता दुबत्तीसं भागे उवाइणावेत्ता एत्थ णं से चंदे पढमं पुन्निमासिणिं जोएति ता एतेसि णं पंचण्हं संवच्छराणं दोच्चं पुन्निमासिणिं चंदे कंसि देसंसि जोएति ता जंसि णं देसंसि चंदे पढमं पुन्निमासिणिं जोएति ताओ पुन्निमासिणिद्वाणाओ मंडलं चउवीसेणं सएणं छेत्ता दुबत्तीसं भागे उवाइणावेत्ता एत्थ णं से चंदे दोच्चं पुन्निमासिणिं जोएति ता एतेसि णं पंचण्हं संवच्छराणं तच्च पुन्निमासिणिंचंदे कंसि देसंसि जोएति ता जंसि णं देसंसि चंदे दोच्चं पुन्निमासिणिं जोएति ताओ पुन्निमासिणिद्वाणाओ मंडलं चउव्वीसेणं सएणं छेत्ता दुबत्तीसं भागे उवाइणावेत्ता एत्थ णं से चंदे तच्चपुन्निमासिणिं जोएति, ता एतेसि णं पंचण्हं संवच्छराणं दुवालसमं पुन्निमासिणिं चंदे कंसि देसंसि जोएति ता जंसि ण देसंसि चंदे तच्चं पुन्निमासिणिं जोएति ताओ पुन्निमासिणिद्वाणाओ मंडलं चउव्वीसेणं सएणं छेत्ता दोण्णि अद्वासीए भागसए उवाइणावेत्ता एत्थ णं से चंदे दुवालसमं पुन्निमासिणिं जोएति एवं खलु एतेणुवाएणं ताओ-ताओ पुन्निमासिणिद्वाणाओ मंडलं चउव्वीसेणं सएणं छेत्ता दुबत्तीसं-दुबत्तीसं भागे उवाइणावेत्ता तंसि-तंसि देसंसि तं-तं पुन्निमासिणिं चंदे जोएति, ता एतेसि णं पंचण्हं संवच्छराणं चरिमं बावद्धिं पुन्निमासिणिंचंदे कंसि देसंसि

जोएति ता जंबुद्वीवस्स णं दीवस्स पाईणपडीणायताए उदीणदाहिणायताए जीवाए मंडलं चउव्वीसेणं सएणं छेत्ता दाहिणिल्लंसि चउब्भगमंडलंसि सत्तावीसं भागे उवाइणावेत्ता अट्टावीसइभागे वीसहा छेत्ता अट्टारसभागे उवाइणावेत्ता तिहिं भागेहिं दोहिं य कलाहिं पच्चत्थिमिल्लं चउब्भामंडलं असंपत्ते एत्थ णं से चंदे चरिमं बावट्ठिं पुन्निमासिणिं जोएति ।

[९१] ता एतेसि णं पंचण्हं संवच्छराणं पढमं पुण्णिमासिणिं सूरे कंसि देसंसि जोएति ता पाहुडं-१०, पाहुडपाहुडं-२२

जंसि णं देसंसि सूरे चरिमं बावट्ठिं पुन्निमासिणिं जोएति ताओ पुन्निमासिणिद्वाणाओ मंडलं चउव्वीसेणं सएणं छेत्ता दो चउणवत्तिं भागे उवाइणावेत्ता एत्थ णं सूरे पढमं पुण्णिमासिणी जोएति ता एतेसि णं पंचण्हं संवच्छराणं दोच्चं पुण्णिमासिणीं पुच्छा ता जंसि देसंसि सूरे पढमं पुन्निमासिणिं जोएति ताओ पुन्निमासिणिद्वाणाओ मंडलं चउव्वीसए णं सएणं छेत्ता दो चउणवत्तिं भागे उवाइणावेत्ता एत्थ णं से सूरे० दोच्चंपुन्निमासिणिं जोएति ता एतेसि णं पंचण्हं संवच्छराणं तच्चं पुन्निमासिणिं सूरे कंसि देसंसि जोएति ता जंसि णं देसंसि सूरे दोच्चं पुन्निमासिणिं जोएति ताओ पुन्निमा-सिणिद्वाणाओ मंडलं चउव्वीसेणं सएणं छेत्ता चउणउत्तिं भागे उवाइणावेत्ता एत्थ णं से सूरे तच्चं पुन्निमासिणिं जोएति ता एतेसि णं पंचण्हं संवच्छराणं दुवालसमं पुन्निमासिणिं सूरे कंसि देसंसि जोएति ता जंसि णं देसंसि सूरे तच्चं पुन्निमासिणिं जोएति ताओपुन्निमासिणिद्वाणाओ मंडलं चउव्वीसेणं सएणं छेत्ता अट्टुत्ताले भागसए उवाइणावेत्ता एत्थ णं से सूरेदुवालसमं पुन्निमासिणिं जोएति एवं खलु एतेणुवाएणं ताओ-ताओ पुन्निमा-सिणिद्वाणाओ मंडलं चउव्वीसेणं सएणं छेत्ता चउणउत्तिं-चउणउत्तिं भागे उवाइणावेत्ता तंसि-तंसि देसंसि तं-तं पुन्निमासिणिं सूरे जोएति ता एतेसि णं पंचण्हं संवच्छराणं चरिमं बावट्ठिं पुण्णिमासिणिं सूरे कंसि देसंसि जोएति ता जंबुद्वीवस्स णं दीवस्स पाईणपडीणायताए उदीणदाहिणायताए जीवाए मंडलं चउव्वीसेणं सएणं छेत्ता पुरत्थिमिल्लंसि चउभागमंडलंसि सत्तावीसं भागे उवाइणावेत्ता अट्टावीसइभागे वीसहा छेत्ता अट्टारसभागे उवाइणावेत्ता तिहिं भागेहिं दोहिं य कलाहिं दाहिणिल्लं चउभागमंडलं असंपत्ते एत्थ णं से सूरे चरिमं बावट्ठिं पुनिमासिणिं जोएति ।

[९२] ता एतेसि णं पंचण्हं संवच्छराणं पढमं अमावासं चंदे कंसि देसंसि जोएति ता जंसि णंदेसंसि चंदे चरिमबावट्ठिं अमावासं जोति ताओ अमावासद्वाणाओ मंडलं चउव्वीसेणंसएणं छेत्ता दुबत्तीसं भागे उवाइणावेत्ता एत्थ णं से चंदे पढमं अमावासंजोएति एवं जेणेव अभिलावेणं चंदस्स पुन्निमासिणीओ भणिताओ तेणेव अभिलावेणं अमावासाओवि भणितव्वाओ तं जहा- बिइया तइया दुवालसमी एवं खलु एतेणुवाएणं ताओ-ताओ अमावासद्वाणाओ मंडलं चउव्वीसेणं सएणं छेत्ता दुबत्तीसं-दुबत्तीसं भागे उवाइणावेत्ता तंसि-तंसि देसंसि तं-तं अमावासं चंदे जोएति ता एतेसि णं पंचण्हं संवच्छराणं चरिमं बावट्ठिं अमावासं चंदे कंसि देसंसि जोएति ता जंसि णं देसंसि चंदे चरिमं बावट्ठिं पुन्निमासिणिं जोएति ताओ-ताओ पुन्निमासिणिद्वाणाओ मंडलं चउव्वीसेणं सएणं छेत्ता सोलसभागे ओसक्कइत्ता एत्थ णं से चंदे चरिमं बावट्ठिं अमावासं जोएति ।

[९३] ता एतेसि णं पंचण्हं संवच्छराणं पढमं अमावासं सूरे कंसि देसंसि जोएति ता जंसि णं देसंसि सूरे चरिमं बावट्ठिं अमावासं जोएति ताओ अमावासद्वाणाओ मंडलं चउव्वीसेणं सएणं छेत्ता चउणउत्तिं भागे उवाइणावेत्ता एत्थ णं से सूरे पढमं अमावासं जोएति एवं जेणेव अभिलावेणं सूरस्स पुनिमासिणीओ भणियाओ तेणेव अभिलावेणं अमावासओवि भणितव्वाओ तं जहा- बिइया तइया

दुवालसमी एवं खलु एतेणुवाएणं ताओ अमावासद्वाणाओ मंडलं चउव्वीसेणं सएणं छेत्ता चउणउतिं-चउणउतिं भागे उवाइणावेत्ता तंसि-तंसि देसंसि तं-तं अमावासं सूरे जोएति ता एतेसि णं पंचण्हं संवच्छराणं चरिमं बावड्ढि अमावासं पुच्छा ता जंसि णं देसंसि सूरे चरिमं बावड्ढि पुन्निमासिणिं जोएति ताओ पुन्निमासिणिद्वाणाओ मंडलं चउव्वीसेणं सएणं छेत्ता सत्तालीसं भागे ओसक्कइत्ता एत्थ णं से सूरे चरिमं बावड्ढि अमावासं जोएति ।

पाहुडं-१०, पाहुडपाहुडं-२२

[९४] ता एतेसि णं पंचण्हं संवच्छराणं पढमं पुन्निमासिणिं चंदे केणं नक्खत्तेणं जोएति ता धणिद्वाहिं धणिद्वाहिं तिण्णि मुहुत्ता एगूणवीसं च बावड्ढिभागा मुहुत्तस्स बावड्ढिभागं च सत्तद्विधा छेत्ता पन्नद्विं चुण्णिया भागा सेसा तं समयं च णं सूरे केणं नक्खत्तेणं जोएति ता पुव्वाफग्गुणीहिं पुव्वाफग्गुणीणं अद्वावीसं मुहुत्ता अद्दत्तीसं च बावड्ढिभागा मुहुत्तस्स बावड्ढिभागं च सत्तद्विधा छेत्ता दुबत्तीसं चुण्णिया भागा सेसा ता एतेसि णं पंचण्हं संवच्छराणं दोच्चं पुन्निमासिणिं चंदे केणं नक्खत्तेणं जोएति ता उत्तराहिं पोद्दवयाहिं उत्तराणं पोद्दवयाणं सत्तावीसं मुहुत्ता चोद्दस य बावड्ढिभागे मुहुत्तस्स बावड्ढि-भागं च सत्तद्विधा छेत्ता बावड्ढिं चुण्णिया भागा सेसा तं समयं च णं सूरे केणं नक्खत्तेणं जोएति ता चित्ताहिं चित्ताणं एक्को मुहुत्तो अद्वावीसं च बावड्ढिभागा मुहुत्तस्स बावड्ढिभागं च सत्तद्विधा छेत्ता तीसं चुण्णिया भागा सेसा ता एतेसि णं पंचण्हं संवच्छराणं दुवालसमं पुन्निमासिणिं चंदे केणं नक्खत्तेणं जोएति ता उत्तराहिं आसाढाहिंउत्तराणं आसाढाणं छव्वीसं मुहुत्ता छव्वीसं च बावड्ढि-भागा मुहुत्तस्स बावड्ढिभागं च सत्तद्विधा छेत्ता चउप्पन्नं चुण्णियाभागा सेसा तं समयं च णं सूरे केणं नक्खत्तेणं जोएति ता पुणव्वसुणा पुणव्वसुस्स सोलस मुहुत्ता अद्द य बावड्ढिभागा मुहुत्तस्स बावड्ढिभागं च सत्तद्विधा छेत्ता वीसं चुण्णिया भागा सेसा ता एतेसि णं पंचण्हं संवच्छराणं चरिमं बावड्ढिं पुन्निमासिणिं चंदे केणं नक्खत्तेणं जोएति ता उत्तराहिं आसाढाहिं उत्तराणं आसाढाणं चरमसमए तं समयं च णं सरे केणं नक्खत्तेणं जोएति ता पुस्सेणं पुस्सस्स एगूणवीसं मुहतात तेयालीसं च बावड्ढिभागा मुहुत्तस्स बावड्ढिभागं च सत्तद्विया छेत्ता तेत्तीसं चुण्णिया भागा सेसा ।

[९५] ता एतेसि णं पंचण्हं संवच्छराणं पढमं अमावासं चंदे केणं नक्खत्तेणं जोएति ता अस्ससाहिं अस्सेसाणं एक्के मुहुत्ते चत्तालीसं च बावड्ढिभागा मुहुत्तस्स बावड्ढिभागं च सत्तद्विधा छेत्ता बावड्ढिं चुण्णिया भागा सेसा तं समयं च णं सूरे केणं नक्खत्तेणं जोएति ता अस्सेसाहिं चव अस्सेसाण एक्को मुहुत्तो चत्तालीसं चबावड्ढिभागा मुहुत्तस्स बावड्ढिभागं च सत्तद्विधा छेत्ता बावड्ढि चुण्णिया भागा सेसा ता एतेसि णं पंचण्हं संवच्छराणं दोच्चं अमावासं चंदे केणं नक्खत्तेणं जोएति ता उत्तराहिं फग्गुणीहिं उत्तराणं फग्गुणीणं चत्तलीसं मुहुत्ता पणतीसं बावड्ढिभागा मुहुत्तस्स बावड्ढिभागं च सत्तद्विधा छेत्ता पन्नद्विं चुण्णिया भागा सेसा तं समयं च णं सूरे केणं नक्खत्तेणं जोएति ता उत्तराहिं चव फग्गुणीहिं उत्तराणं फग्गुणीणंजहेव चंदस्स ता एतेसि णं पंचण्हं संवच्छराणं तच्चं अमावासं चंदे केणं नक्खत्तेणं जोएति ता हत्थेणं चव हत्थस्स जहा चंदस्स ता एतेसि णं पंचण्हं संवच्छराणं दुवालसमं अमावासं चंदे केणं नक्खत्तेणं जोएति ता अद्दाहिं अद्दाणं चत्तारि मुहुत्ता दस यबावड्ढिभागा मुहुत्तस्स बावड्ढिभागं च सत्तद्विधा छेत्ता चउप्पन्नं चुण्णिया भागा सेसा तं समयं च णं सूरे केणं नक्खत्तेणं जोएति ता अद्दाहिं चव अद्दाणं जहा चंदस्स ता एतेसि णं पंचण्हं संवच्छराणं चरिमं बावड्ढिं अमावासं चंदे

केणं नक्खत्तेणं जोएति ता पुनव्वसुणा पुणव्वसुस्स बावीसं मुहुत्ता बायालीसं च बासद्धिभागा मुहुत्तस्स सेसा तं समयं च णं सूरे केणं नक्खत्तेणं जोएति ता पुनव्वसुणा चेव पुनव्वसुस्स णं जहा चंदस्स ।

[९६] ता जेणं अज्ज नक्खत्तेणं चंदे जोयं जोएति जंसि देसंसि से णं इमाइं अट्ट एगूण-वीसाइं मुहुत्तसयाइं चउव्वीसं च बावद्धिभागे मुहुत्तस्स बावद्धिभागं च सत्तद्धिधा छेत्ता बावद्धि चुण्णिया भागे उवाइणावेत्ता पुणरवि से चंदे अण्णेणं सरिसएणं चेव नक्खत्तेणं जोयं जोएति अण्णं देसंसि ता जेणं अज्ज नक्खत्तेणं चंदे जोयं जोएति जंसि देसंसि से णं इमाइं सोलस अट्टीसं मुहुत्तसयाइं अउणापन्नं च पाहुडं-१०, पाहुडपाहुडं-२२

बावद्धिभागे मुहुत्तस्स बावद्धिभागं च सत्तद्धिधा छेत्ता पन्नद्धिं चुण्णिया भागे उवाइणावेत्ता पुणरवि से चंदे तेणं चेव नक्खत्तेणं जोयं जोएति अण्णंसि देसंसि ता जेणं अज्ज नक्खत्तेणं चंदे जोयं जोएति जंसे देसंसि से णं इमाइं चउप्पन्नं मुहुत्तसहस्साइं नव य मुहुत्तसयाइं उवाइणावेत्ता पुणरवि से चंदे अण्णेणं तारिसएणं चेव नक्खत्तेणं जोयं जोएति तंसि देसंसि ता जेणं अज्ज नक्खत्तेणं चंदे जोयं जोएति जंसि देसंसि से णं इमं एगं मुहुत्तसयहस्सं अट्टाणउत्तिं च मुहुत्तसताइं उवाइणावेत्ता पुणरवि से चंदे तेणंचेव नक्खत्तेणं जोयं जोएति तंसि देसंसि ता जेण अज्ज नक्खत्तेणं सूरे जोयं जोएति जंसि देसंसि से णं इमाइं तिण्णि छावट्टाइं राइंदियसयाइं उवाइणावेत्ता पुणरवि से सूरे अण्णेणं तारिसएणं चेव नक्खत्तेणं जोयं जोएति तंसि देसंसि ता जेणं अज्ज नक्खत्तेणं सूरे जोयं जोएति तंसि देसंसि से णं इमाइं सत्तदुवतीसं राइंदियसयाइं उवाइणावेत्ता पुणरवि से सूरे तेणं चेव नक्खत्ते जोयं जोएति तंसि देसंसि ता जेणं नक्खत्तेणं सूरे जोयं जोएति जंसि देसंसि से णं इमाइं अट्टारस वीसाइं राइंदियसयाइं उवाइणावेत्ता पुणरवि से सूरे अण्णेणं तारिसएणं चेव नक्खत्तेणंजयं जोएति तंसि देसंसि ता जेणं अज्ज नक्खत्तेणं सूरे जोयं जोएति जंसि देसंसि से णं इमाइं छत्तीसं सट्टाइं राइंदियसाइं उवाइणावेत्ता पुणरवि से सूरे तेणं चेव नक्खत्तेणं जोयं जोएति तंसि देसंसि ।

[९७] ता जया णं इमे चंदे गतिसमावण्णए भवइ तया णं इयरेवि चंदे गतिसमावण्णए भवइ जया णं इयरे चंदे गतिसमावण्णए भवइ तया णं इमेवि चंदे गतिसमावण्णए भवइ ता जया णं इमे सूरिए गतिसमावण्णे भवइ तया णं इयरेवि सूरिए गतिसमावण्णे भवइ जया णं इयरे सूरिए गतिसमावण्णे भवइ तया णं इमेवि सूरिए गतिसमावण्णे भवइ एवं गहेवि नक्खत्तेवि ता जया णं इमे चंदे जुत्तेजोगेणं भवइ तया णं इयरेवि चंदे जुत्ते जोगेणं भवइ जया णं इयरे चंदे जुत्ते जोगेणं भवइ तया णं इमेवि चंदे जुत्ते जोगेणं भवइ एवं सूरेवि गहेवि नक्खत्तेवि, सयावि णं चंदा जुत्ता जोगेहिं सयावि णं सूरा जुत्ता जोगेहिं सयावी णं गहा जुत्ता जोगेहिं सयावि णं नक्खत्ता जुत्ता जोगेहिं दुहतोवि णं चंदा जुत्ता जोगेहिं दुहतोवि णं सूरा जुत्ता जोगेहिं दुहतोविं णं गहा जुत्ता जोगेहिं दुहतोवि णं नक्खत्ताजुत्ता जोगेहिं मंडलं सयसहस्सेणं अट्टाणउयाए सएहिं छेत्ता इच्चेस नक्खत्ते खेतपरिभागे नक्खत्तविजए पाहुडे आहितेत्ति बेमि ।

• मुनि दीपरत्नसागरेण संशोधितः सम्पादित्तश्च दसमं पाहुडं समत्तं •

□ एक्कारसमं पाहुडं □

[९८] ता कहं ते संवच्छराणादी आहितेति वदेज्जा तत्थ खलु इमे पंच संवच्छरा पन्नत्ता तं जहा- चंदे चंदे अभिवड्ढितेचंदे अभिवड्ढिते ता एतेसि णं पंचण्हं संवच्छराणं पढमस्स चंदसंवच्छरस्स

सेआदी आहितेति वदेज्जा ता जे णं पंचमस्स अभिवड्ढितसंवच्छरस्स पज्जवसाणे से णं पढमस्स चंदसं-
वच्छरस्स आदी अनंतरपुरक्खडे समए ता से णं किं पज्जवसिते आहितेति वदेज्जा ता जे णं दोच्चस्स
चंदसंवच्छरस्स आदी से णं पढमस्स चंदसंवच्छरस्स पज्जवसाणे अनंतरपच्छाकडे समए तं समयं च णं
चंदे केणं नक्खत्तेणं जोएति ताउत्तराहिं आसाढाहिं उत्तराणं आसाढाणं छदुवीसं मुहुत्ता छदुवीसं च
बावड्ढि-भागा मुहुत्तस्स बावड्ढिभागा च सत्तड्ढिधा छेत्ता चउप्पन्नं चुण्णिया भागा सेसा तंसमयं च णं सूरे
केणं नक्खत्तेणं जोएति ता पुणव्वसुणा पुणव्वसुस्स सोलसमुहुत्ता अट्ट य बावड्ढिभागा मुहुत्तस्स
बावड्ढिभागं च सत्तड्ढिहा छेत्ता वीसं चुण्णिया भागा सेसा ता एतेसि णं पंचण्हं संवच्छराणं
दोच्चस्सचंदसंवच्छरस्स के

पाहुडं-११

आदी आहितेति वदेज्जा ता जे णं पढमस्स चंदसंवच्छरस्स पज्जवसाणे से णंदोच्चस्स चंदसंवच्छरस्स-
आदी अनंतरपुरक्खडे समए ता से णं किं पज्जवसिते आहितेति वदेज्जा ता जे णं तच्चस्स अभिवड्ढित-
संवच्छरस्स आदी से णं दोच्चस्स चंदसंवच्छरस्सपज्जवसाणे अनंतरपच्छाकडे समएतं समयं च णं चंदे
केणं नक्खत्तेणं जोएति ता पुव्वाहिं आसाढाहिंपुव्वाणं आसाढाणं सत्त मुहुत्ता तेवण्णंच बावड्ढिभागा
मुहुत्तस्स बावड्ढिभागं च सत्तड्ढिधा छेत्ता इगतालीसं चुण्णिया भागा सेसा तं समयं च णं सूरे केणं
नक्खत्तेणं जोएति ता पुणव्वसुणा पुणव्वसुस्स णं बायालीसं मुहुत्ता पणतीसंचबावड्ढिभागा मुहुत्तस्स
बावड्ढिभागं च सत्तड्ढिधा छेत्ता सत्त चुण्णिया भागा सेसा, ता एतेसि णं पंचण्हं संवच्छराणं तच्चस्स
अभिवड्ढितसंवच्छरस्स के आदि आहितेति वदेज्जा ताजे णं दोच्चस्स चंदसंवच्छरस्स पज्जवसाणे से णं
तच्चस्स अभिवड्ढितसंवच्छरस्स आदी अनंतरपुरक्खडे समए ता से णं किं पज्जवसिते आहितेति वदेज्जा
ता जे णं चउत्थस्स चंदसंवच्छरस्स आदी से णं तच्चस्स अभिवड्ढितसंवच्छरस्स पज्जवसाणे अनंतर-
पच्छाकडे समए तं समयं णं चंदे केणं नक्खत्तेणं जोएति ता उत्तराहिं आसाढाहिं उत्तराणं आसाढाणं
तेरस मुहुत्ता तेरस य बावड्ढिभागा मुहुत्तस्स बावड्ढिभागं च सत्तड्ढिधा छेत्ता सत्तावीसं चुण्णिया भागा
सेसा तं समयं च णं सूरे केणं नक्खत्तेणं जोएति ता पुणव्वसुणा पुणव्वसुस्स दोमुहुत्ता छप्पन्नं च
बावड्ढिभागा मुहुत्तस्स बावड्ढिभागं च सत्तड्ढिधा छेत्ता सट्ठी चुण्णिया भागा सेसा ता एतेसि णं पंचण्हं
संवच्छराणं चउत्थस्स चंदसंवच्छरस्स के आदी आहितेति वदेज्जा ता जे णं तच्चस्स अभिवड्ढि-
तसंवच्छरस्स पज्जवसाणे से णं चउत्थस्स चंदसंवच्छरस्स आदी अनंतरपुरक्खडे समए ता से णं किं
पज्जवसिते आहितेति वदेज्जा ता जे णं चरिमस्स अभिवड्ढितसंवच्छरस्स आदी से णं चउत्थस्स
चंदसंवच्छरस्स पज्जवसाणे अनंतरपच्छाकडे समए तं समयं च णं चंदे केणं नक्खत्तेणं जोइते ता
उत्तराहिं आसाढाहिं उत्तराणं आसाढाणं ऊतालीसं मुहुत्ता चत्तालीसं च बावड्ढिभागा मुहुत्तस्स बावड्ढिभागं
च सत्तड्ढिधा छेत्ता चउदस चुण्णिया भागा सेसा तं समयं च णं सूरे केणं नक्खत्तेणं जोएति ता
पुणव्वसुण पुणव्वसुस्स अउणतीसं मुहुत्ता एकवीसं बावड्ढिभागां मुहुत्तस्स बावड्ढिभागं च सत्तड्ढिधा
छेत्ता सीतालीसं चुण्णिया भागा सेसा ता एतेसि णं पंचण्हं संवच्छराणं पंचमस्स अभिवड्ढितसंवच्छरस्स
के आदी आहितेति वदेज्जा ता जे णं चउत्थस्स चंदसंवच्छरस्स पज्जवसाणे से णं पंचमस्स
अभिवड्ढितसंवच्छरस्स आदी अनंतरपुरक्खडे समए ता से णं किं पज्जवसिते आहितेति वदेज्जा ता जे णं
पढमस्स चंदसंवच्छरस्सआदी से णं पंचमस्स अभिवड्ढितसंवच्छरस्स पज्जवसाणे अनंतरपच्छाकडे समए
तं समयंच णं चंदे केणं नक्खत्तेणं जोएति ता उत्तराहिं आसाढाहिं उत्तराणं आसाढाणं चरिमसमए तं

समयं च णं सूरे केणं नक्खत्तेणं जोएति ता पुस्सेणं पुस्सस्स णं एक्कवीसं मुहुत्ता तेतालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता तेत्तीसं चुण्णिया भागा सेसा ।

• मुनि दीपरत्नसागरेण संशोधितः सम्पादित्तश्च एक्कारसमं पाहुडं समत्तं •

□ बारसमं पाहुडं □

[९९] ता कति णं संवच्छरा आहिताति वदेज्जा तत्थ खलु इमे पंच संवच्छरा पन्नत्ता तं जहा- नक्खत्ते चंदे उडू आदिच्चे अभिवड्ढिते ता एतेसि णं पंचण्हं संवच्छराणं पढमस्स नक्खत्तसंवच्छरस्स नक्खत्तमासे तीसइमुहुत्तेणं अहोरत्तेणं मिज्जमाणे केवतए राइंदियग्गेणं आहितेति वएज्जा ता सत्तावीसं पाहुडं-१२

राइंदियाइं एक्कवीसं च सत्तट्ठिभागा राइंदियस्स राइंदियग्गेणं आहितेवि वदेज्जा ता से णं केवतिए मुहुत्तग्गेणं आहितेतिवदेज्जा ता अडुसए एगूणवीसे मुहुत्ताणं सत्तावीसं च सत्तट्ठिभागे मुहुत्तस्स मुहुत्तग्गेणं आहितेति वदेज्जा ता एस णं अद्धा दुवालसक्खुत्तकडा नक्खत्ते संवच्छरे, ता से णं केवतिए राइंदियग्गेणं० ता तिण्णि सत्तावीसे राइंदियसतं एक्कावण्णंचसत्तट्ठिभागे राइंदियस्स राइंदियग्गेण आहितेति वदेज्जा ता से णं केवतिए मुहुत्तग्गेणं० ता नव मुहुत्तसहस्साइं अडु य बत्तीसे मुहुत्तसए छप्पन्नं च सत्तट्ठिभागे मुहुत्तस्स मुहुत्तग्गेणं आहितेति वदेज्जा ता एतेसि णं पंचण्हं संवच्छराणं दोच्चस्स चंदसंवच्छरस्स चंदे मासे तीसतिमुहुत्तेण अहोरत्तेणं गणिज्जमाणे केवतिए राइंदियग्गेणं० ता एगूणतीसं राइंदियाइं बत्तीसं बावट्ठिभागा राइंदियस्स राइंदियग्गेणं आहितेति वदेज्जा ता से णं केवतिए मुहुत्तग्गेणं० ता अडुपंचासते मुहुत्ते तेत्तीसं च छावट्ठिभागे मुहुत्तग्गेणं आहितेति वदेज्जाता एस णं अद्धा दुवालसक्खुत्तकडा चंदे संवच्छरेता से णं केवतिए राइंदियग्गेणं० ता तिण्णि चउप्पन्ने राइंदियसते दुवालस य बावट्ठिभागा राइंदियग्गेणं आहितेति वदेज्जा तासेणं केवतिए मुहुत्तग्गेणं० ता दस मुहुत्तसहस्साइं छच्च पणवीसे मुहुत्तसते पन्नासं च बावट्ठिभागे मुहुत्तग्गेणं आहितेति वदेज्जा ता एतेसि णं पंचण्हं संवच्छराणं तच्चस्स उडुसंवच्छरस्स उडुमासे तीसतिमुहुत्तेणं अहोरत्तेणं गणिज्जमाणे केवतिए राइंदियग्गेणं० ता तीसं राइंदियाणं राइंदियग्गेणं आहितेति वदेज्जा ता से णं केवतिए मुहुत्तग्गेणं ता नव मुहुत्तसताइं मुहुत्तग्गेणं आहितेति वदेज्जा ता एस णं अद्धा दुवालसक्खुत्तकडा उडू संवच्छरे ता से णं केवतिए राइंदियग्गेणं० ता तिण्णि सडे राइंदियसते राइंदियग्गेण आहितेति वदेज् ता से णं केवतिए मुहुत्तग्गेणं० ता दस मुहुत्तसहस्साइं अडु मुहुत्तसताइं मुहुत्तग्गेणं आहितेति वदेज्जा ता एतेसि णं पंचण्हं संवच्छराणं चउत्थस्स आदिच्चसंवच्छरस्स आदिच्चे मासे तीसतिमुहुत्तेणं अहोरत्तेणं गणिज्जमाणे केवतिए राइंदियग्गेणं० ता तीसं राइंदियाइं अवड्ढिभागं च राइंदियस्स राइंदियग्गेणं आहितेति वदेज्जा ता सेणं केवतिए मुहुत्तग्गेणं ता नव पन्नरस मुहुत्तसए मुहुत्तग्गेणं आहितेति वदेज्जा ता एस णं अद्धा दुवालसक्खुत्तकडा आदिच्चे संवच्छरे ता से णं केवतिए राइंदियग्गेणं० ता तिण्णि छावट्ठे राइंदियसए राइंदियग्गेणं आहितेति वदेज्जा ता से णं केवतिए मुहुत्तग्गेणं आहितेति वदेज्जा ता दस मुहुत्तस्स सहस्साइं नव असीते मुहुत्तसते मुहुत्तग्गेणं आहितेति वदेज्जा ता एस णं अद्धा दुवालसक्खुत्तकडा अभिवड्ढितसंवच्छरे ता से णं केवतिए राइंदियग्गेणं ता तिण्णि तेसीते राइंदियसते एक्कवीसं च मुहुत्ता अट्टारस बावट्ठिभागेमुहुत्तस्स राइंदियग्गेणं आहितेति वदेज्जा ता से णं केवतिए मुहुत्तग्गेणं आहितेति

वदेज्जा ता एक्कारस मुहुत्तसहस्साइं पंच य एक्कारस मुहुत्तसते अद्वारस बावट्टिभागे मुहुत्तस्स मुहुत्तग्गेणं आहितेति वदेज्जा ।

[१००]ता केवतियं ते नोजगे राइंदियग्गेणं आहितेति वदेज्जा ता सत्तरस एक्काणउते राइंदियसते एगूणवीसं च मुहुत्ते सत्तावण्णे बावट्टिभागे मुहुत्तस्स बावट्टिभागं च सत्तट्टिधा छेत्ता पणपन्नं चुण्णिया भागा राइंदियग्गेणं आहितेति वदेज्जा ता से णं केवतिए मुहुत्तग्गेणं आहितेति वदेज्जा ता तेपण्णमुहुत्तसहस्साइं सत्तय अउणापन्ने मुहुत्तसते सत्तावण्णं बावट्टिभागे मुहुत्तस्स बावट्टिभागं च सत्तट्टिधा छेत्ता पणपन्नं चुण्णिया भागा मुहुत्तेणं आहितेति वदेज्जा ता केवतिए णं ते जुगप्पत्ते राइंदियग्गेणं आहितेति वदेज्जा ता अट्टतीसं राइंदियइं दस य मुहुत्ता चत्तारि य बावट्टिभागे मुहुत्तस्स बावट्टिभागं च सत्तट्टिधा छेत्ता दुवालस चुण्णिया भागा राइंदियग्गेणं आहितेति वदेज्जा ता से णं केवतिए मुहुत्तग्गेणं आहितेति वदेज्जाता एक्कारस पन्नासे मुहुत्तसते चत्तारि य बावट्टिभागे बावट्टिभागं पाहुडं-१२

च सत्तट्टिधा छेत्ता दुवालसचुण्णिया भागा मुहुत्तग्गेणं आहितेति वदेज्जा ता केवतियं जुगे राइंदियग्गेणं आहितेति वदेज्जा ता अद्वारसतीसे राइंदियसते राइंदियग्गेणं आहितेति वदेज्जा ता से णं केवतिए मुहुत्तग्गेणं आहितेति वदेज्जा ता चउप्पन्नं मुहुत्तसहस्साइं नव य मुहुत्तसताइं मुहुत्तग्गेणं आहितेति वदेज्जाता से णं केवतिए बावट्टिभागमुहुत्तग्गेणं आहितेति वदेज्जा ता चउत्तीसं सयसहस्साइं अट्टतीसं च बावट्टिभागमुहुत्तसते बावट्टिभागमुहुत्तग्गेणं आहितेति वदेज्जा ।

[१०१]ता कया णं एते आदिच्चचंदा संवच्छरा समादीया समपज्जवसिया आहितेति वदेज्जा ता सट्ठिं एते आदिच्चमासा बावट्टिं एते चंदमासा एस णं अद्दा छक्खुत्तकडा दुवासभइत्ता तीसं एते आदिच्चसंवच्छरा एक्कतीसं एते चंदसंवच्छरा तथा णं एते आदिच्चचंदसंवच्छरा समादीया समपज्जवसिया आहिताति वदेज्जा ता कया णं एते आदिच्चउडुचंदनक्खत्ता संवच्छरा समादीया समपज्जवसिया आहिताति वदेज्जा ता सट्ठिं एते आदिच्चा मासा एगट्ठिं एते उडू मासा बावट्टि एते चंदा मासा सत्तट्टिं एते नक्खत्ता मासा एस णं अद्दा दुवालसक्खुत्तकडा दुवालसभइता सट्ठिं एते आदिच्चा संवच्छरा एगट्ठिं एते उडू संवच्छरा बावट्टि एते चंदा संवच्छरा सत्तट्टि एते नक्खत्ता संवच्छरा तथा णं एते आदिच्चउडु-चंदनक्खत्ता संवच्छरा समादीया समपज्जवसिया आहिताति वदेज्जा ता कया णं एते अभिवड्ढित-आदिच्चउडुचंदणक्खत्ता संवच्छरा समादीया समपज्जवसिया आहितातिवदेज्जा ता सत्ता-वण्णं मासा सत्त य अहोरत्ता एक्कारस य मुहुत्ता तेवीसं बावट्टिभागा मुहुत्तस्स एते अभिवड्ढित्ता मासा सट्ठिं एते आदिच्चा मासा एगट्ठिं एते उडू मासा बावट्टिं एते चंदमासा सत्तट्टिं एते नक्खत्तमासा एस णं अद्दा छप्पन्न-सतक्खुत्तकडा दुवालसभइता सत्त सता चोताला एते णं अभिवड्ढिता संवच्छरा सत्त सता असीता एते णं आदिच्चा संवच्छरा सत्त सता तेणउता एते णं उडू संवच्छरा अट्ट सता छलुत्तरा एते णं चंदा संवच्छरा अट्ट सता एगसत्तरा एते णं नक्खत्ता संवच्छरा तथा णं एते अभिवड्ढित्ता आदिच्चउडुचंदनक्खत्ता संवच्छरा समादीया समपज्जवसिया आहिताति वदेज्जा ता नयड्डयाए णं चंदे संवच्छरे तिण्णि चउप्पन्ने राइंदियसते दुवालस य बावट्टिभागे राइंदियस्स आहितेति वदेज्जा ता अधात्तच्चेणं चंदे संवच्छरे तिण्णि चउप्पन्ने रायंदियसते पंच य मुहुत्ते च बावट्टिभागे मुहुत्तस्स आहितेति वदेच्चा ।

[१०१] ता कया णं एते आदिच्चचंदा संवच्छरा समादीया समपज्जवसिया आहितेति वदेज्जा ता सद्धिं एते आदिच्चमासा बावद्धिं एत चंदमासा एस णं अद्वा छक्खुत्तकडा दुवासभइत्ता तीसं एते आदिच्चसंवच्छरा एककीसं एते चंदसंवच्छरा तथा णं एते आदिच्चचंदसंवच्छरा समादीयासमपज्जवसिया आहिताति वदेज्जा ता कया णं एते आदिच्चउडुचंदनक्खत्ता संवच्छरा समादीया समपज्जवसिया आहिताति वदेज्जाताकया णं एते आदिच्चउडुचंदनक्खत्ता संवच्छरा समादीयासमपज्जवसिया आहिताति वदेज्जा तासद्धिं एते आदिच्चामसाएगद्धिं एतेउडू मासाबावद्धि एतेचंदा मासा सत्तद्धिं एते नक्खत्ता मासा एस णंअद्वा दुवालसक्खुत्तकडा दुवलसभइता सद्धिं एते आदिच्चा संवच्छरा एगद्धिं एते उडू संवच्छरा बावद्धि एते चंदा संवच्छरा सत्तद्धि एते नक्खत्ता संवच्छरा ताया णं एते आदिच्चउडुचंदनक्खत्ता संवच्छरा समादीया समपज्जवसिया आहिताति वदेज्जा ता कया णं एते अभिवड्ढितआदिच्चउडुचंदणनक्खत्ता संवच्छरा समादीया समपज्जवसिया आहितातिवदेज्जा ता सत्ता-वण्णं मासा सत्तय अहोरत्ता एक्कारस य मुहुत्ता तेवीसं बावद्धिभागा मुहुत्तस्स एते अभिवड्ढित्ता मासा सद्धिं एते आदिच्चा मासा एगद्धिं एते उडू मासा बावद्धिं एते चंदमासा सत्तद्धिं एते नक्खत्तमासा एस णं अदधा छप्पन्नसतक्खुत्तकडा दुवालसभइता पाहुडं-१२

सत्त सता चोताला एते णं अभिवड्ढिता संवच्छरा सत्त सता असीता एते णं आदिच्चा संवच्छरा सत्त सता तेणउता एते णं उडू संवच्छरा अद्द सता छलुत्तरा एते णं चंदा संवच्छरा अद्द सता एगसत्तरा एते णं नक्खत्ता संवच्छरा तथा णं एते अभिवड्ढित्ता आदिच्चउडुचंदनक्खत्ता संवच्छरा समादीया समपज्जवसिया आहिताति वदेज्जा ता नयड्डयाए णं चंदे संवच्छरे तिण्णि चउप्पन्ने राइंदियसतेदुवालस य बावद्धिभागे राइंदियस्स आहितेति वदेज्जा ताअधातच्चेणं चंदे संवच्छरे तिण्णि चउप्पन्ने रायंदियसते पंच य मुहुत्ते च बावद्धिभागे मुहुत्तस्स आहितेति वदेच्चा ।

[१०२] तत्थ खलु इमे छ उडू पन्नत्ता तं जहा- पाउसे वरिसारत्ते सरदे हेमंते वसंते गिम्हे ता सव्वेवि णं एते चंदउडू दुवे-दुवे मासाति चउप्पण्णेणं-चउप्पण्णेणं आदाणेणं गणिज्जमाणा सातिरेगाइं एगूणसद्धिं-एगूणसद्धिं राइंदियाइं राइंदियग्गेणं आहितेति वदेज्जा तत्थ खलु इमे छ ओमरत्ता पन्नत्ता तं जहा- ततिएपव्वे सत्तमेपव्वे एक्कारसमेपव्वे पन्नरसमेपव्वे एगूणवीसतिमेपव्वे तेवीसतिमेपव्वे तत्थ खलु इमे छ अइरत्ता तं जहा- चउत्थेपव्वे अद्दमेपव्वे बारसमेपव्वे सोलसमेपव्वे वीसतिमेपव्वे चउवीसतिमेपव्वे।

[१०३] छच्चेव य अइरत्ता आदिच्चाओ हवंति माणाहिं

।

छच्चेव ओमरत्ता चंदाओ हवंति माणाहिं ।

[१०४] तत्थ खलु इमाओ पंच वासिकीओ पंच हेमंतीओ आउट्टीओ पन्नत्ताओ ता एतेसि णं पंचण्हं संवच्छराणं पढमं वासिकिं आउट्टिं चंदे केणं नक्खत्तेणं जोएति ता अभीइणा अभीइस्स पढमसमए तं समयं च णं सूरे केणं नक्खत्तेणं जोएति ता पूसेणं पूसस्सएगूणवीसंमुहुत्ता तेत्तालीसं च बावद्धिभागा मुहुत्तस्स बावद्धिभागं च सत्तद्धिधा छेत्ता तेत्तीसं चुण्णिया भागा सेसा ता एतेसि णं पंचण्हं संवच्छराणं दोच्चं वासिकिं आउट्टिं चंदे केणं नक्खत्तेणं जोएति ता संठाणाहिं संठाणाणं एक्कारस मुहुत्ता ऊतालीसं च बावद्धिभागा च सत्तद्धिधा छेत्ता तेपन्नं चुण्णिया भागा सेसा तं समयं च णं सूरे केणं नक्खत्तेणंजोएति ता पूसेणं पूसस्स णं तं चेव जं पढमाए ता एतेसि णं पंचण्हं संवच्छराणं तच्चं वासिकिं आउट्टिं चंदे केणं नक्खत्तेणं जोएति ता विसाहाहिं विसाहाणं तेरस मुहुत्ता चउप्पन्नं च बावद्धिभागा मुहुत्तस्स बावद्धिभागं

च सत्तद्विधा छेत्ता चत्तालीसं चुण्णिया भागा सेसा तं समयं च णं सूरे केणं नक्खत्तेणं जोएति ता पूसेणं पूसस्स तं चेव ता एतेसि णं पंचण्हं संवच्छराणं चउत्थिं वासिकिं आउट्ठिं चंदे केणं नक्खत्तेणं जोएति ता रेवतीहिं रेवतीणं पणवीसं मुहुत्ता दुबत्तीसं चबावट्ठिभागा सेसा मुहुत्तस्स बावट्ठिभागं च सत्तद्विधा छेत्ता छव्वीसं चुण्णिया भागा सेसा तं समयं च णं सूरे केणं नक्खत्तेणं जोएति ता पूसेणं पूसस्स तं चेव ता एतेसि णं पंचण्हं संवच्छराणं पंचमं वासिकिंआउट्ठिं चंदे केणं नक्खत्तेणं जोएति ता पुव्वाहिं फग्गुणीहिं पुव्वाणं फग्गुणीणं बारस मुहुत्ता सत्तालीसं चबावट्ठिभागा मुहुत्तस्स बावट्ठिभागं च सत्तद्विधा छेत्ता तेरस चुण्णिया भागा सेसा तं समयं च णं सूरे केणं नक्खत्तेणं जोएति ता पूसेणं पूसस्स तं चेव ।

[१०५] ता एतेसि णं पंचण्हं संवच्छराणं पढमं हेमंति आउट्ठिं चंदे केणं नक्खत्तेणं जोएति ता हत्थेणं हत्थस्स णं पंच मुहुत्ता पन्नासं च बावट्ठिभागा मुहुत्तस्स बावट्ठिभागं सत्तद्विधा छेत्ता सट्ठिं चुण्णिया भागा सेसा तं समयं च णं सूरे केणं नक्खत्तेणं जोएति ता उत्तराहिं आसाढाहिं उत्तराणं आसाढाणं चरिमसमए ता एतेसि णं पंचण्हं संवच्छराणं दोच्चं हेमंति आउट्ठिं चंदे केणं नक्खत्तेणं जोएति ता सतभिसयाहिं सतभिसयाणं दुण्णि मुहुत्ता अट्ठावीसं च बावट्ठिभागा मुहुत्तस्स बावट्ठिभागं च सत्तद्विधा छेत्ता छत्तालीसं चुण्णिया भागा सेसा तं समयं च णं सूरे केणं नक्खत्तेणं जोएति ता उत्तराहिं आसाढाहिं

पाहुडं-१२

उत्तराणं आसाढाणं चरिमसमए ता एतेसि णं पंचण्हं संवच्छराणं तच्चं हेमंति आउट्ठिं चंदे केणं नक्खत्तेणं जोएति ता पूसेणं पूसस्स एगूणवीसं मुहुत्ता तेतालीसं च बावट्ठिभागा मुहुत्तस्स बावट्ठिभागं च सत्तद्विधा छेत्ता तेत्तीसं चुण्णिया भागा सेसा तं समयं च णं सूरे केणं नक्खत्तेणं जोएति ता उत्तराहिं आसाढाहिं उत्तराणं आसाढाणं चरिमसमए ता एतेसि णं पंचण्हं संवच्छराणं चउत्थिं हेमंति आउट्ठिं चंदे केणं नक्खत्तेणं जोएति ता मूलेणं मूलस्सछमुहुत्ता अट्ठावण्णं च बावट्ठिभागा मुहुत्तस्स बावट्ठिभागं च सत्तद्विधा छेत्ता वीसं चुण्णिया भागा सेसा तं समयं च णं सूरे केणं नक्खत्तेणं जोएति ता उत्तराहिं आसाढाहिं उत्तराणं आसाढाणं चरिमसमए ता एतेसि णं पंचण्हं संवच्छराणं पंचमिं हेमंति जाव जोएति पुच्छा ता कत्तियाहिं कत्तियाणं अट्ठारस मुहुत्ता छत्तीसं च बावट्ठिभागा मुहुत्तस्स बावट्ठिभागं च सत्तद्विधा छेत्ता छ चुण्णिया भागा, सेसा तं समयं च णं सूरे जाव जोएति ता उत्तराहिं आसाढाहिं उत्तराणं आसाढाणं चरिमसमए ।

[१०६] तत्थ खलु इमे दसविधे जोए० वसभाणुजाते वेणुयाणुजाते मंचे मंचातिमंचे छत्ते छत्तातिछत्ते जुयणद्धे घणसंमद्धे पीणिते मंडूकप्पुत्ते नामं दसमे ता एतेसि णं पंचण्हं संवच्छराणं छत्तातिछत्तं जोयं चंदे कंसि देसंसि जोएति ता जंबुद्वीवस्सदीवस्स पाईणपडीणायताए उदीणदाहिणायताए जीवाए मंडलं चउव्वीसेणं सतेणं छेत्ता दाहिणपुरत्थिमिल्लंसि चउभागमंडलंसि सत्तावीसं भागे उवाइणावेत्ता अट्ठावीसतिभागं वीसधा छेत्ता अट्ठारसभागे उवाइणावेत्ता तिहिं भागेहिं दोहिं कलाहिं दाहिणपुरत्थिमिल्लं चउभागमंडलं असंपत्ते एत्थ णं से चंदे छत्तातिछत्तं जोयं जोएति तं जहा- उप्पिं चंदे मज्झे नक्खत्ते हेट्ठा आदिच्चे तं समयं च णं चंदे चित्ताहिं चित्ताणं चमिसमए ।

• मुनि दीपरत्नसागरेण संशोधितः सम्पादित्तश्च बारसमं पाहुडं समत्तं •

॥ तेरसमं पाहुडं ॥

[१०७] ता कंहं ते चंदमासो वड्डोवड्डी० ता अड्ड पंचासीते मुहुत्तसते तीसं च बावड्ढिभागे मुहुत्तस्स ता दोसिणापक्खाओ अंधकारपक्खमयमाणे चंदे चत्तारि बातालसते छत्तालीसं च बावड्ढिभागे मुहुत्तस्स जाइं चंदे रज्जति तं जहा- पढमाए पढमं भागं बितियाए बितियं भागं जाव पन्नरसीए पन्नरसमं भागं चरिमसमए चंदे रत्ते भवति अवसेसे समए चंदे रत्ते य विरत्ते य भवति इयण्णंअमावासाएत्थ णंपढमे पव्वे अमावासा ता अंधकारपक्खो तो णं दोसिणापक्खं अयमाणे चंदे चत्तारे बाताले मुहुत्तेत्तस छत्तालीसं च बावड्ढिभागा मुहुत्तस्स जाइं चंदे विरज्जति पढमाए पढमं भागं बितियाए बितियं भागं जाव पन्नरसीए पन्नरसमं भागं चरिमे समए चंदे विरत्ते भवति अवसेसमए चंदे रत्ते य विरते य भवति इयण्णं पुन्निमासिणी एत्थ णं दोच्चे पव्वे पुन्निमासिणी ।

[१०८] तत्थ खलु इमाओ बावड्ढिं पुन्निमासिणीओ बावड्ढिं अमावासाओ पन्नत्ताओ बावड्ढिं एते कसिणा रागा बावड्ढिं एते कसिणा विरागा एते चउव्वीसे पव्वसते एते चउव्वीसे कसिणारागविरागसते जावतिया णं पंचण्हं संवच्छराणं समया एगेणं चउव्वीसेणं समयसतेणूणका एवतिया परित्ता असंखेज्जा देसारागविरागसता भवंतीति मक्खाता, ता अमावासाओ णं पुन्निमासिणी चत्तारि बाताले मुहुत्तसते छत्तलीसं च बावड्ढिभागे मुहुत्तस्स आहितेति वदेज्जा ता पुन्निमासिणीओ अमावासा चत्तारि बाताले मुहुत्तसते छत्तालीसं च बावड्ढिभागे मुहुत्तस्स आहितेति वदेज्जा ता अमावासाओ णं अमावासा अड्डपंचासीते मुहुत्त-

पाहुडं-१३

सते तीसं च बावड्ढिभागे मुहुत्तस्स आहितेति वदेज्जा ता पुन्निमासिणीओ णं पुन्निमासिणी अड्डपंचासीते मुहुत्तसते तीसं च बावड्ढिभागे मुहुत्तस्स आहितेति वदेज्जा एस णं एवतिए चंदे मासे एस णं एवतिए सगले जुगे ।

[१०९] ता चंदेणं अद्धमासेणं चंदे कति मंडलाइं चरति ताचोद्दस चउव्वीससयभागं मंडलस्स ता आदिच्चेणं अद्धमासेणं चंदे कति मंडलाइं चरति ता सोलस मंडलाइं चरति सोलसमंडलचारी तदा अवराइं खलु दुवे अड्डकाइं जाइं चंदे केणइ असामण्णकाइं सयमेव पविट्ठित्ता-पविट्ठित्ता चारं चरति कतराइं खलु ताइं दुवे अड्डकाइं जाइं चंदे केणइ असामण्णकाइं सयमेव पविट्ठित्ता-पविट्ठित्ता चारं चरति ता इमाइं खलु ते बे अड्डकाइं जाइं चंदे केणइ असामण्णकाइं सयमेव पविट्ठित्ता-पविट्ठित्ता चारं चरति तं जहा- निक्खममाणे चेव अमावासंतेणं पविसमाणे चेव पुन्निमासिंतेणं एताइं खलु दुवे अड्डकाइं जाइं चंदे केणइ असामण्णकाइं सयमेव पविट्ठित्ता-पविट्ठित्ता चारं चरति ता पढमायणगते चंदे दाहिणाते भागाते पविसमाणे सत्त अद्धमंडलाइं जाइं चंदे दाहिणाते भागाते पविसमाणे चारं चरति ता पढमायणगते चंदे दाहिणाते भागाते पविसमाणे सत्त अद्धमंडलाइं जाइं चंदे दाहिणाते भागाते पविसमाणे चारं चरति कतराइं खलु ताइं सत्त अद्धमंडलाइं जाइं चंदे दाहिणाते भागाते पविसमाणे चारं चरति इमाइं खलु ताइं सत्त अद्धमंडलाइं जाइं चंदे दाहिणाते भागाते पविसमाणे चारं चरति तं जहा- बितिए अद्धमंडले चउत्थे अद्धमंडले छट्ठे अद्धमंडले अड्डमे अद्धमंडले दसमे अद्धमंडले बारसमे अद्धमंडले चउदसमे अद्धमंडले एताइं खलु ताइं सत्त अद्धमंडलाइं जाइं चंदे दाहिणाते भागाते पविसमाणे चारं चरति ता पढमायणगते चंदे उत्तराते भागाते पविसमाणे छ अद्धमंडलाइं तेरस य सत्तड्ढिभागाइं अद्धमंडलस्स जाइं चंदे उत्तराते भागाते पविसमाणे चारं चरति कतराइं खलु ताइं छ अद्धमंडलाइं तेरस य सत्तड्ढिभागाइं अद्धमंडलस्स जाइं चंदे उत्तराते भागाते पविसमाणे चारं चरति इमाइं खलु ताइं छ अद्धमंडलाइं तेरस य सत्तड्ढिभागाइं

अद्धमंडलस्स जाइं चंदे उत्तराते भागाते पविसमाणे चारं चरति इमाइं खलु ताइं छ अद्धमंडलाइं तेरसयसत्तद्विभागाइं अद्धमंडलस्स जाइं चंदे उत्तराते भागाते पविसमाणे चारं चरति तं जहा- ततिए अद्धमंडले पंचमे अद्धमंडले सत्तमे अद्धमंडले नवमे अद्धमंडले एक्कारसमे अद्धमंडले तेरसमे अद्धमंडले पन्नरसमस्स अद्धमंडलस्स तेरस सत्तद्विभागाइं एताइंखलु ताइंछ अद्धमंडलाइं तेरस य सत्तद्विभागाइं अद्धमंडलस्स जाइं चंदे उत्तराते भागाते पविसमाणेचारं चरति एतावता च पढमे चंदायणे समत्ते भवति ता नक्खत्ते अद्धमासे नो चंदे अद्धमासेचंदे अद्धमासे नो नक्खत्ते अद्धमासे ता नक्खत्ताओ अद्धमासाओ ते चंदे चंदेणं अद्धमासेणं किमधियं चरति ता एगं अद्धमंडलं चरति चत्तारि य सत्तद्विभागाइं अद्धमंडलस्स सत्तद्विभागं एगतीसाएछेत्ता नव भागाइं ता दोच्चायणगते चंदे पुरत्थिमाते भागाते निक्खममाणे सत्त चउप्पन्नाइं जाइं चंदे परस्स चिण्णं पडिचरति सत्त तेरसकाइं जाइं चंदे अप्पणो चिण्णं पडिचरति ता दोच्चायणगते चंदे पच्चत्थिमाते भागातेनिक्खममाणेछ चउप्पण्णाइं जाइं चंदे परस्स चिण्णं पडिचरतचि छ तेरसकाइं जाइं चंदे अप्पणो चिण्णं पडिचरति अवरकाइं खलु दुवे तेरसकाइं जाइं चंदे केणइ असामण्णकाइं सयमेव पविद्वित्ता-पविद्वित्ता चारं चरति कतराइं खलु ताइं दुवे तेरसकाइं जाइं चंदे केणइ असामण्णकाइं सयमेव पविद्वित्ता-पविद्वित्ता चारं चरति इमाइं खलु ताइंदुवेतेरसकाइं जाइं चंदे केणइ असामण्णकाइं सयमेव पविद्वित्ता-पविद्वित्ता चारं चरति तं जहा- सव्वब्भंतरे चेव मंडले सव्वबाहिरे चेव मंडले एताणि खलु ताणि दुवे तेरसकाइं जाइं चंदे केणइ असामण्णकाइं सयमेव पविद्वित्ता-पविद्वित्ता चारं चरति एता- पाहुंडं-१३

वता च दोच्चे चंदायणे समत्ते भवति ता नक्खत्ते मासे नो चंदे मासे चंदे मासे नो नक्खत्ते मासे ता नक्खत्ताओ मासाओ चंदे चंदेणं मासेणं किमधियं चरति ता दो अद्धमंडलाइं चरति अद्द य सत्तद्विभागाइं अद्धमंडलस्स सत्तद्विभागं च एक्कतीसधा छेत्ता अद्वारस भागाइं ता तच्चायणगते चंदे पच्चत्थिमाते भागाते पविसमाणे बाहिराणंतरस्स पच्चत्थिमिलस्स अद्धमंडलस्स ईतालीसं सत्तद्विभागाइं जाइं चंदे अप्पणो परस्स य चिण्णं पडिचरति तेरस सत्तद्विभागाइं जाइं चंदे परस्स चिण्णं पडिचरति तेरस सत्तद्विभागाइं जाइं चंदे अप्पणो परस्स य चिण्णं पडिचरति एतावता व बाहिराणंतरे पच्चत्थिमिल्ले अद्धमंडले समत्ते भवति ता तच्चायणगते चंदेपुरत्थिमातेभागाते पविसमाणे बाहिरतच्चस्सपुरत्थिमिल्लस्स अद्धमंडलस्स ईतालीसं सत्तद्विभागाइं जाइं चंदे अप्पणो परस्स य चिण्णं पडिचरति तेरससत्तद्विभागाइं जाइं चंदे परस्स चिण्णं पडिचरति तेरस सत्तद्विभागाइं जाइं चंदे अप्पणो परस्स य चिण्णं पडिचरति एतावता च बाहिरतच्चे पुरत्थिमिल्ले अद्धमंडले समत्ते भवति तातच्चायणगते चंदे पच्चत्थिमाते भागाते पविसमाणे बाहिरचउत्थस्स पच्चत्थिमिल्लस्स अद्धमंडलस्स अद्द सत्तद्विभागाइं सत्तद्विभागं च एक्कतीसधा छेत्ता अद्वारस भागाइं जाइं चंदे अप्पणो परस्स य चिण्णं पडिचरति एतावता च बाहिरचउत्थे पच्चत्थिमिल्ले अद्धमंडले समत्ते भवति एवं खलु चंदेणं मासेणं चंदे तेरस चउप्पन्नगाइं दुवे तेरसकाइं जाइं चंदे परस्स चिण्णं पडिचरति तेरस तेरसकाइं जाइं चंदे अप्पणो चिण्णं पडिचरति दुवे ईतालीसकाइं दुवेतेरसकाइंअद्द सत्तद्विभागाइं सत्तद्विभागं च एक्कतीसधा छेत्ता अद्वारसभागाइं जाइं चंदे अप्पणो परस्स य चिण्णं पडिचरति इच्चेसा चंदमसोऽभिगमण-निक्खमण-वुड्ढि-निवुड्ढि-अणवद्वितसंठाणसंठिती विउव्वणगिड्ढिपत्ते रूवी चंदे देवे आहितेति वदेज्जा ।

◦ मुनि दीपरत्नसागरेण संशोधितः सम्पादित्तश्च तेरसमं पाहुंडं समत्तं ◦

॥ चउद्दसमं पाहुडं ॥

[११०] ता कया ते दोसिणा बहू आहितेति वदेज्जा ता दोसिणापक्खे णं दोसिणा बहू आहितेति वदेज्जा ता कहं ते दोसिणापक्खे दोसिणा बहू आहितेति वदेज्जा ता अंधकारपक्खातो णं दोसिणापक्खे० ता कहं ते अंधकारपक्खातो दोसिणापक्खे दोसिणा बहू आहिताति वदेज्जा ता अंधकारपक्खाओ णं दोसिणापक्खं अयमाणे चंदे चत्तारि बाताले मुहुत्तसए छत्तालीसं च बावड्ढिभागे मुहुत्तस्स जाइं चंदे विरज्जति तं जहा- पढमाए पढमं भागं बितियाए बितियं भागं जाव पन्नरसीए पन्नरसमं भागं एवं खलु अंधकारपक्खताओदोसिणापक्खे दोसिणा बहू आहिताति वदेज्जा, ता केवतिया णं दोसिणापक्खे दोसिणा बहू आहिताति वदेज्जा ता परित्ता असंखेज्जा भागा, ता कया ते अंधकारे बहू आहितेति वदेज्जा ता अंधकारपक्खे णं अंधकारे बहू आहितेति वदेज्जा ता कहं ते अंधकारपक्खे अंधकारे बहू आहितेति वदेज्जा ता दोसिणापक्खातो णं अंधकारपक्खे अंधकारे बहू आहितेति वदेज्जा ता कहं ते दोसिणापक्खातो अंधकारपक्खे अंधकारे बहू आहितेति वदेज्जा ता दोसिणापक्खातो णं अंधकारपक्खं अयमाणे चंदे चत्तारि बाताले मुहुत्तसते छायालीसं च बावड्ढिभागे मुहुत्तस्स जाइं चंदे रज्जति तं जहा- पढमाए पढमं भागं बितियाए बितियं भागं जाव पन्नरसीए पन्नरसमं भागं एवं खलु दोसिणापक्खातो अंधकारपक्खे० अंधकारे ता केवतिए णं अंधकारपक्खे अंधकारे बहू आहितेति वदेज्जा ता परित्ता असंखेज्जा भागा ।

० मुनि दीपरत्नसागरेण संशोधितः सम्पादितश्च चउद्दसमं पाहुडं समत्तं ०

पाहुडं-१५

॥ पन्नरसमं पाहुडं ॥

[१११] ता कहं ते सिग्घगती वत्थू आहितेति वदेज्जा ता एतेसि णंचदिम-सूरिय-गहन-कखत्त-तारारूवाणं चंदेहिंतो सूरु सिग्घगती सूरुहिंतो गहा सिग्घगती गहेहिंतो नकखत्ता सिग्घगती नकखत्तेहिंतो तारा सिग्घगती सव्वप्पगती चंदा सव्वसिग्घगती तारा, ता एगमेगेणं मुहुत्तेणं चंदे केवतियाइं भागसताइं गच्छति ता जं-जं मंडलं उवसंकमित्ता चारं चरति तस्स-तस्स मंडलपरिक्खेवस्स सत्तरसम अडसद्धिं भागसते गच्छति मंडलं सतसहस्सेणं अट्ठाणउतीए सतेहिं छेत्ता ता एगमेगेणं मुहुत्तेणं सूरिए जं-जं मंडलं उवसंकमित्ताचारं चरति तस्स-तस्स मंडलपरिक्खेवस्स अट्ठारस तीसे भागसते गच्छति मंडलं सतसहस्सेणं अट्ठाणउतीए सतेहिं छेत्ता ता एगमेगेणं मुहुत्तेमं नकखत्ते जं-जं मंडलं उवसंकमित्ता चारं चरति तस्स-तस्स मंडलपरिक्खेवस्स अट्ठारस पणतीसे भागसते गच्छति मंडलं सतसहस्सेण अट्ठाणउतीए सतेहिं छेत्ता ।

[११२] ता जया णं चंदं गतिसमावण्णं सूरु गतिसमावण्णे भवति से णं गतिमाताए केवतियं विसेसेति ता बावड्ढिभागे विसेसेति ता जया णं चंदं गतिसमावण्णं नकखत्ते गतिसमावण्णे भवति से णं गतिमाताए केवतियं विसेसति ता सत्तड्ढिभागे विसेसेति ता जया णं सूरुं गतिसमावण्णं नकखत्ते गतिसमावण्णे भवति से णं गतिमाताएकेवतियं विसेसेति ता पंच भागे विसेसेति ता जया णं चंदं गतिसमावण्णं अभीई नकखत्ते गतिसमावण्णे पुरत्थिमाते भागाते समासादेति समासादेत्ता नव मुहुत्ते सत्तीवासं च सत्तड्ढिभागे मुहुत्तस्स चंदेणं सद्धिं जोयं जोएति जोएत्ता जोयं अनुपरियट्ठति अनुपरियाट्ठित्ता विजहतिविप्पजहतिविगतजोई याविभवति ताजयाणं चंदं गतिसमावण्णं सवणे नकखत्तेगतिसमावण्णे

पुरत्थिमाते भागाते समासादेति समासादेत्ता तीसंमुहुत्ते चंदेणं सद्धिं जोयं जोएति जोएत्ता जोयंअनुपरियद्वृति अनुपरियद्वृत्ता विजहति विप्पजहति विगतजोई यावि भवति एवं एतेणं अभिलावेणं नेतव्वं-पन्नरसमुहुत्ताइं तीसइमुहुत्ताइं पणयालीसमुहुत्ताइं भणितव्वाइं जाव उत्तरासाढा ता जया णं चंदं गतिसमावण्णं गहे गतिसमावण्णे पुरत्थिमाते भागाते समासादेति समासादेत्ता चंदेणं सद्धिं अधाजोगं जुंजति जुंजित्ता अधाजोगं अनुपरियद्वृति जाव विगतजोई यावि भवति ता जया णं सूरं गतिसमावण्णं अभीई नक्खत्ते गतिसमावण्णे पुरत्थिमाते भागाते समासादेति समासादेत्ता चत्तारि अहोरत्ते छच्च मुहुत्ते सूरेणं सद्धिं जोयं जोएति जोएत्ता जोयं अनुपरियद्वृति जाव विगतजोई यावि भवति एवं छ अहोरत्ता एककवीसं मुहुत्ता य तेरस अहोरत्ता बारस मुहुत्ता य वीसं अहोरत्ता तिण्णि मुहुत्ता य सव्वे भाणितव्वा जाव-जया णं सूरं गतिसमावण्णं उत्तरासाढा नक्खत्ते गतिसमावण्णे पुरत्थिमाते भागाते समासादेति समासादेत्ता वीसं अहोरत्ते तिण्णि य मुहुत्ते सूरेण सद्धिं जोयं जोएति जोएत्ता जोयं अनुपरियद्वृति जाव यावि भवति ता जया णं सूरे गतिसमावण्णं गहे गतिसमावण्णे पुरत्थिमाते भागाते समासादेति समासादेत्ता सूरेण सद्धिंअधाजोयं जुंजति जुंजित्ता जोयं अनुपरियद्वृति जाव विगतजोई यावि भवति ।

[११३] ता नक्खत्तेणं मासेणं चंदे कति मंडलाइं चरति ता तेरस मंडलाइं चरति तेरस य सत्तद्विभागे मंडलस्स ता नक्खत्तेणं मासेणं सूरे कति मंडलाइं चरति ता तेरस मंडलाइं चरति चोत्तालीसं च सत्तद्विभागे मंडलस्स ता नक्खत्तेणं मासेणं नक्खत्ते कति मंडलाइं चरति ता तेरस मंडलाइं चरति अद्धसीतालीसं च सत्तद्विभागे मंडलस्स ता चंदेणं मासेणं चंदे कति मंडलाइं चरति ता चोद्धस सचउभागाइंमंडलाइं चरति एगं च चउव्वीससतभागं मंडलस्स ता चंदेणं मासेणं सूरे कति मंडलाइं चरति पाहुडं-१५

ता पन्नरस चउभागूणाइं मंडलाइं चरति एगं चचउवीससतभागं मंडलस्स ताचंदेणं मासेणं नक्खत्ते कतिमंडलाइं चरति ता पन्नरस चउभागूणाइं मंडलाइं चरति छच्च चउवीससतभागे मंडलस्स ता उडुणा मासेणं चंदे कति मंडलाइं चरति ता चोद्धस मंडलाइं चरति तीसं च एगद्विभागं मंडलस्स ता उडुणा मासेण सूरे कति मंडलाइं चरति ता पन्नरस मंडलाइं चरति ता उडुणा मासेणं नक्खत्ते कति मंडलाइं चरति ता पन्नरस मंडलाइं चरति पंच य बावीससतभागे मंडलस्स ता आदिच्चेणं मासेणं चंदे चोद्धस मंडलाइं चरति एक्कारस यपन्नरसभागे मंडलस्स ता आदिच्चेणं मासेणं सूरे पन्नरस चउभागाहिगाइं मंडलाइं चरति ता आदिच्चेणं मासेणं नक्खत्ते पन्नरस चउभागाहिगाइं मंडलाइं चरति पंचतीसं च वीससतभागे मंडलस्स चरति ता अभिवड्ढितेणं मासेणं चंदे पन्नरस मंडलाइं चरति तेसीति य छलसीयसतभागे मंडलस्स ता अभिवड्ढितेणं मासेणं सूरे कति मंडलाइं चरति ता सोलस मंडलाइं चरति तिहिं भागेहिं ऊणगाइं दोहिं अडयालेसिं सतेहिं मंडलं छेत्ता ता अभिवड्ढितेण मासेणं नक्खत्ते कति मंडलाइं चरति ता सोलस मंडलाइं चरति सीतालीसएहिं भागेहिं आहियाइं चोद्धसहिं अद्धासीएहिं सतेहिं मंडलं छेत्ता ।

[११४] ता एगमेगेणं अहोरत्तेणं चंदे कति मंडलाइं चरति ता एगं अद्धमंडलं चरति एकक-तीसाए भागेहिं ऊणं नवहिं पन्नरसेहिं सतेहिं अद्धमंडलं छेत्ता ता एगमेगेणं अहोरत्तेणं सूरे कति मंडलाइं चरति ता एगं अद्धमंडलं चरति ता एगमेगेणं अहोरत्तेणं नक्खत्ते कति मंडलाइं चरति ता एगं अद्धमंडलं चरति दोहिं भागेहिं अहियं सत्तहिं दुवत्तीसेहिं सतेहिं अद्धमंडलं छेत्ता ता एगमेगं मंडलं चंदे कतिहिं अहोरत्तेहिं चरति ता दोहिं

अहोरत्तेहिं चरति एककतीसाए भागेहिं अहिएहिं चउहिं बातालेहिं सतेहिं राइंदियं छेत्ता ता एगमेगं मंडलं सूरे दोहिं अहोरत्तेहिं चरति ता एगमेगं मंडलं नकखत्त दोहिं अहोरत्तेहिं चरति दोहिं भागेहिं ऊणेहिं तिहिं सत्तसट्टेहिं सतेहिं राइंदियं छेत्ता ता जुगेणं चंदे अट्ट चुलसीते मंडलसते चरति ता जुगेणं सूरे नव पन्नरसमंडलसते चरत ता जुगेणं नकखत्ते कति मंडलाइं चरति ता अट्टारस पणतीसे दुभागमंडलसते चरति इच्चेसा मुहुत्तगती रिक्खातिमास-राइंदिय-जुग-मंडलपविभत्ती सिग्धगती वत्थू आहितेति बेमि ।

◦ मुनि दीपरत्नसागरेण संशोधितः सम्पादित्तश्च पन्नरसमं पाहुडं समत्तं ◦

□ सोलसमं पाहुडं □

[११५] ता कहं ते दोसिणालकखणे आहितेति वदेज्जा ता चंदलेस्सा इ य दोसिणा इ य दोसिणा इ य चंदलेस्सा इ य के अट्टि किं लकखणे ता एगट्टे एगलकखणे ता सूरेलेस्सा इ य आतवे इ य आतवे इ य सूरेलेस्सा इ य के अट्टे किं लकखणे ता एगट्टे एगलकखणे ता अंधकारे इ य छाया इ य छाया य अंधकारे इ य के अट्टे किं लकखणे ता एगट्टे एगलकखणे ।

◦ मुनि दीपरत्नसागरेण संशोधितः सम्पादित्तश्च सोलसमं पाहुडं समत्तं ◦

□ सत्तरसमं पाहुडं □

[११६] ता कहं ते चयणोववाता आहिताति वदेज्जा तत्थ खलु इमाओ पणवीसं पडिवत्तीओ पन्नत्ताओ तत्थ एगे एवमाहंसु-ता अनुसमयमेव चंदिमसूरिया अन्ने चयंति अण्णे उववज्जंति-एगे पुण एवमाहंसु-ता अनुमुहुत्तमेव चंदिमसूरिया अण्णे चयंति अण्णे उववज्जंति एवं जहेव हेट्टा तहेव जाव ता पाहुडं-१७

एगे पुण एवमाहंसुता अणुओसप्पिणिउस्सप्पिणिमेव चंदिमसूरिया अण्णे चयंति उववज्जंति-वयं पुण एवं वदामो-ता चंदिमसूरिया णं देवा महिइडिया महाजुतीया महाबला महाजसा महाणुभावा महासोक्खा वर-वत्थधरा वरमल्लधरा वरगंधधरा वराभरणधरा अक्कोच्छित्तिणयट्टयाए काले अण्णे चयंति अण्णे उववज्जंति आहिताति वदेज्जा ।

◦ मुनि दीपरत्नसागरेण संशोधितः सम्पादित्तश्च सत्तरसमं पाहुडं समत्तं ◦

□ अट्टारसमं पाहुडं □

[११७] ता कहं ते उच्चते आहितेति वदेज्जा तत्थ खलु इमाओ पणवीसं पडिवत्तीओ पन्नत्ताओ तत्थेगे एवमाहंसु-ता एगं जोयणसहस्सं सूरे उड्ढं उच्चत्तेणं दिवड्ढं चंदे-गे पुणं एवमाहंसु-ता दो जोयणसहस्साइं सूरे उड्ढं उच्चत्तेणं अड्ढाइज्जाइं चंदे-एगे पुण एवमाहंसु-ता तिण्णि जोयणसहस्साइं सूरे उड्ढं उच्चत्तेणं अट्टट्टाइं चंदे-एगे पुणं एवमाहंसु-ता चत्तारि जोयणसहस्साइं सूरे उड्ढं उच्चत्तेणं अट्टपंचमाइं चंदे-एगे पुण एवमाहंसु-ता पंच जोयणसहस्साइं सूरे उड्ढं उच्चत्तेणं अट्टछट्टाइं चंदे-एगे पुण एवमाहंसु-ता छ जोयणसहस्साइं सूरे उड्ढं उच्चत्तेणं अट्टसत्तमाइं चंदे-एगे पुण एवमाहंसु-ता सत्त जोयणसहस्साइं सूरे उड्ढं उच्चत्तेणं अट्टट्टाइं चंदे-एगे पुणं एवमाहंसु-ता अट्ट जोयणसहस्साइं सूरे उड्ढं उच्चत्तेणं अट्टवणमाइं चंदे-एगे पुण एवमाहंसु-ता नव जोयणसहस्साइं सूरे उड्ढं उच्चत्तेणं अट्टएक्कारस चंद-एगेपुण एवमाहंसु-ता एक्कारस जोयणसहस्साइं सूरे उड्ढे उच्चत्तेणं अट्टबारस चंदे चोदस सूरे अट्टपन्नरस चंदे पन्नरस सूरे अट्टसोलस चंदे सोलस सूरे अट्टसत्तरस चंदे सत्तरस सूरे अट्टट्टारस चंदे

अद्वारस सूरे अद्वएकोणवीसं चंदे ओएकोणवीसं सूरे अद्ववीसं चंदे वीसं सूरे अद्वएक्कवीसं चंदे एक्कवीसं सूरे अद्वबावीसं चंद बावीसं सूरे अद्वतेवीसं चंदे तेवीसं सूरे अद्वचउवीसं चंदे चउवीसं सूरे अद्वपणवीसं चंदे एगे पुण एवमाहंसु-ता पणवीसं जोयमसहस्साइं सूरे उड्ढं उच्चत्तेणं अद्वछुव्वीसं चंदे-वयं पुण एवं वदामो-ता इमीसे रयणप्पभाए पुढवीए बहुसमरमणिज्जाओ भूमिभागओ [सत्तणउते जोयणसते अबाहाए हिट्टिल्ले तारारूवे चारं चरति अद्वजोयणसए अबाहाए सूरविमाणे चारं चरति अद्वअसीते जोयणसते अबाहाए चंदविमाणे चारं चरति नवजोयणसएअबाहाए उवरिल्ले तारारूवे चारं चरति ता हेट्टिलातो णं तारारूवाओ दस जोयणे अबाहाए सूरविमाणे चारं चरति तता णं असीतेजोयणे अबाहाए चंदविमाणे चारं चरति एवं जहेव जीवाभिगमे तहेव नेयव्वं-सव्वब्भंतरिल्लं चारं संठाणं पमाणं वहति सिंहगति इड्ढि तारंतरं अग्गमहिशी ठिति अप्पाबहुयं जाव तारातो संखेज्जगुणातो पा०] सत्तणउतिजोयणसतेउड्ढं उप्पइत्ता हेट्टिल्ले ताराविमाणे चारं चरति अद्वजोयणसते उड्ढं उप्पइत्ता सूरविमाणे चारं चरति अद्वअसीए जोयणसए उड्ढं उप्पइत्ता चंदविमाणे चारं चरति नव जोयणसयाइं उड्ढं उप्पइत्ता उवरिल्ले ताराविमाणे चारं चरति हेट्टिल्लाओ ताराविमाणाओ दसजोयणाइं उड्ढं उप्पइत्ता सूरविमाणे चारं चरति नउतिं जोयणाइं उड्ढं उप्पइत्ता चंदविमाणे चारं चरति दसोत्तरं जोयणसयं उड्ढं उप्पइत्ता उवरिल्ले तारारूवे चारं चरति ता सूरविमाणाओ असीतिं जोयणाइं उड्ढं उप्पइत्ता चंदविमाणे चारं चरति जोयणसयं उड्ढं उप्पइत्ता उवरिल्ले तारारूवे चारं चरति ता चंदविमाणाओ णं वीसं जोयणाइं उड्ढं उप्पइत्ता उवरिल्ले तारारूवे चारं चरति एवामेव सपुव्वावरेणं दसुत्तरजोयणसयं बाहल्ले तिरियमसंखेज्जे जोतिसविसए जोतिसं चारं चरति आहितेति वदेज्जा ।

[११८]ता अत्थि णं चंदिमसूरियाणं देवाणं हिट्ठंपि तारारूवा अणुंपि तुल्लावि समंपि तार-
पाहुडं-१८

रूवा अणुंपि तुल्लावि उप्पिंपि तारारूवा अणुंपि तुल्लावि ता अत्थि ता कहं ते चंदिमसूरियाणं देवाणं हिट्ठंपितारारूवा अणुंपि तुल्लावि समंपि तारारूवा अणुंपि तुल्लावि उप्पिंपि तारारूवा अणुंपि तुल्लावि ता जहा- जहा णं तेसि णं देवाणं तव-नियम-बंधेराइं उस्सियाइं भवंति तहा-तहा णं तेसि देवाणं एवं भवति तं जहा- अनुत्ते वा तुल्लत्ते वा ता एवं खलु चंदिमसूरियाणं देवाणं हिट्ठंपि तारारूवा अणुंपि तुल्लावि तहेव।

[११९]ता एगमेगस्स णं चंदस्स देवस्स केवतिया गहा परिवारो पन्नत्तो केवतिया नक्खत्ता परिवारो पन्नत्तो केवतिया तारा परिवारो पन्नत्तो ता एगमेगस्स णं चंदस्स देवस्स अट्ठासीतिं गहा परिवारो पन्नत्तो अट्ठावीसं नक्खत्ता परिवारो पन्नत्तो ।

[१२०] छावट्ठिं सहस्साइं नव चेव सताइं पंचसत्तराइं ।

एगससी परिवारो तारागणकोडिकोडीण [परिवरो पन्नत्तो] ।

[१२१]ता मंदरस्स णं पव्वयस्सकेवतियं अबाहाए जोतिसेचारं चरति ता एक्कारस एक्कवीसेजोयणसते अंबाहाए जोतिसे चारं चरति ता लोयंताओ णं केवतियं अबाहाए जोतिसे पन्नत्ते ता एक्कारस एक्कारे जोयणसते अबाहाए जोतिसे पन्नत्ते ।

[१२२]ता जंबुद्दीवे णं दीवे कतरे नक्खत्ते सव्वब्भंतरिल्लं चारं चरति कतरे नक्खत्ते सव्वबाहिरिल्लं चारं चरति कतरे नक्खत्ते सव्वुपरिल्लं चारं चरति कतरे नक्खत्ते सव्वहिट्टिल्लं चारं चरति

ता अभीई नकखत्तो सव्वब्भंतरिल्लं चारं चरति मूले नकखत्ते सव्वबाहिरिल्लं चारं चरइ साती नकखत्ते सव्वुपरिल्लं चारं चरति भरणी नकखत्ते सव्वहेट्ठिल्लं चारं चरति ।

[१२३] ता चंदविमाणे णं किसंठिते पन्नत्ते ता अद्धकविट्ठगसंठाणसंठिते सव्वफलिहामए अब्भुग्गयमूसियपहसिए विविहमणिरयणभत्तिचित्ते जाव पडिरूवे एवं सूरविमाणे ताराविमाणे ता चंदविमाणे णं केवतियं आयाम-विकखंभेणं केवतियं परिकखेवेणं केवतियं बाहल्लेणं पन्नत्ते ता छप्पन्नं एगट्ठिभागे जोयणस्स आयाम-विकखंभेणं तं तिगुणं सविसेसं परिररणं अट्ठवीसं एगट्ठिभागे जोयणस्स बाहल्लेणं पन्नत्ते ता सूरविमाणे णं केवतियं आयाम-विकखंभेणं पुच्छा ता अडयालीसं एगट्ठिभागे जोयणस्स आयाम-विकखंभेणं तं तिगुणं सविसेसं परिररणं चउव्वीसं एगट्ठिभागे जोयणस्स बाहल्लेणं पन्नत्ते ता गहविमाणेणं पच्छा ता अद्धजोयणं आयाम-विकखंभेणं तं तिगुणं सविसेसं परिररणं कोसं बाहल्लेणं पन्नत्ते ता नकखत्तविमाणे णं केवतियं पुच्छा ता कोसं आयाम-विकखंभेणं तं तिगुणं सविसेसं परिररणं अद्धकोसं बाहल्लेणं पन्नत्ते ता ताराविमाणे णं केवतियं पुच्छा ता अद्धकोसं आयाम-विकखंभेणं तं तिगुणं सविसेसं परिररणं पंच धणुसयाइं बाहल्लेणं पन्नत्ते ता चंदविमाणं कति देवसाहस्सीओ परिवहंति ता सोलस देवसाहस्सीओ परिवहंति तं जहा- पुरत्थिमेणं सीहरूवधारीणं चत्तारि देवसाहस्सीओ दाहिणेणं गयरूवधारीणं चत्तारि देवसाहस्सीओ पच्चत्थिमेणं वसहरूवधारीणं चत्तारि देवसाहस्सीओ उत्तरेणं तुरगरूवधारीणं चत्तारि देवसाहस्सीओ परिवहंति एवं सूरविमाणंपि ता गहविमाणं अट्ठ देवसाहस्सीओ परिवहंति तं जहा- पुरत्थिमेणं सीहरूवधारीणं देवाणं दो देवसाहस्सीओ परिवहंति एवं जाव उत्तरेणं तुरगरूवधारीणं ता नकखत्तविमाणं चत्तारि देवसाहस्सीओ परिवहंति तं जहा- पुरत्थिमेणं सीहरूवधारीणं देवाणं एक्का देवसाहस्सी परिवहति एवं जाव उत्तरेणं तुरगरूवधारीणं देवाणं ता ताराविमाणं दो देवसाहस्सीओ परिवहंति तं जहा- पुरत्थिमेणं सीहरूवधारीणं देवाणं पंच देवसता परिवहंति एवं जाव उत्तरेणं तुरगरूवधारीणं ।

पाहुडं-१८

[१२४] एतेसि णं चंदिम-सूरिय-गहगण-नकखत्त-तारारूवाणं कयरे कयरेहिंतो सिग्घगती वा मंदगती वा ता चंदेहिंतो सूरा सिग्घगती सूरैहिंतो गहा सिग्घगती गहेहिंतो नकखत्ता सिग्घगती नकखत्तेहिंतो तारा सिग्घगती सव्वप्पगती चंदा सव्वसिग्घगती तारा ता एतेसि णं चंदिम-सूरिय-गहगण-नकखत्ता-तारारूवाणं कयरे कयरेहिंतो अप्पिड्ढिया वा महिड्ढिया वा ता ताराहिंतो नकखत्ता महिड्ढिया नकखत्तेहिंतो गहा महिड्ढिया गहेहिंतो सूरा महिड्ढिया सूरैहिंतो चंदा महिड्ढिया सव्वप्पिड्ढिया तारा सव्वमहिड्ढिया चंदा ।

[१२५] ता जंबुद्धीवे णं दीवे तारारूवस्स य तारारूवस्स य एस णं केवतिए अबाधाए अंतरे पन्नत्ते ता दुविहे अंतरे पन्नत्ते तं जहा- वाघातिमे य निव्वाघातिमे य तत्थ णं जेसे वाघातिमे से णं जहण्णेणं दोण्णि छावट्ठे जोयणसते उक्कोसेणं बारस जोयणसहस्साइं दोण्णि बाताले जोयणसते तारारूवस्स य अबाधाए अंतरे पन्नत्ते तत्थ णं जेसे निव्वाघातिमे से णं जहण्णेणं पंच धणुतसताइं उक्कोसेणं अद्धजोयणं तारारूवस्स य तारारूवस्स य अबाधाए अंतरे पन्नत्ते ।

[१२६] ता चंदस्स णं जोतिसिंदस्स जोतिसरण्णो कति अग्गमहिसीओ ता चत्तारि अग्गमहिसीओ पन्नत्ताओ तं जहा- चंदप्पभा दोसिणाभा अच्चिमाती पभंकरा तत्थ णं एगमेगाए देवीए चत्तारि-चत्तारि देवीसाहस्सी परिवारो पन्नत्तो पभू णं ताओ एगमेगा देवी अण्णाइं चत्तारि-चत्तारि

देवीसहस्साइं परिवारं विउव्वित्तए एवामेव सपुव्वावरेणं सोलस देवीसहस्सा सेत्तं तुडिए ता पभू णं चंदे जोतिसिंदे जोतिसराया चंदवडिंसए विमाणे सभाए सुहम्माए तुडएणं सद्धिं दिव्वाइं भोगभोगाइं भुंजमाणे विहरित्तए नो इण्ढे सम्ढे ता कहं ते पुच्छा चंदस्स णं जोतिसिंदस्स जोतिसरण्णो चंदवडिंसए विमाणे सभाए सुधम्माए माणवए चेतियखंभे वइरामएसु गोलवट्टसमुग्गएसु बहवे जिणसकधा सण्णिक्खित्ता चिद्धंति ताओ णं चंदस्स जोतिसिंदस्स जोतिसरण्णो अण्णेसिं च बहूणं जोतिसियाणं देवाण य देवीण य अच्चणिज्जाओ वंदणिज्जाओ पूयणिज्जाओ सक्कारणिज्जाओ सम्माणणिज्जाओ कल्लाणं मंगलं देवयं चेइयं पज्जुवासणिज्जाओ एवं खलु नो पभू चंदे जोतिसिंदे जोतिसराया चंदवडिंसए विमाणे सभाए सुधम्माए तुडिएणं सद्धिं दिव्वाइं भोगभोगाइं भुंजमाणे विहरित्तए, पभू णं चंदे जोतिसिंदे जोतिसराया-चंदवडिंसए विमाणे सभाए सुहम्माए चंदसि सीहासणंसि चउहिं सामाणियसाहस्सीहिं चउहिं अग्गमहिसीहिं सपरिवाराहिं तिहिं परिसाहिं सत्तहिं अणिएहिं सत्तहिं अणियाहिवईहिं सोलसहिं आयरक्खदेवसाहस्सीहिं अण्णेहिं य बहूहिं जोतिसिएहिंदेवेहिं देवीहि य सद्धिं महयाहयनट्ट-गीय-वाइय-तंती-तल-ताल-तुडिय-धण-मुडंग-पडुप्पवाइयरेवणं दिव्वाइं भोगभोगाइं भुंजमाणे विहरित्तए केवलं परियारणिड्डीए नो चव णं मेहुणवत्तियं ता सूरस्स णं जोतिसिंदस्स जोतिसरण्णो चत्तारि अग्गमहिसीओ पन्नत्ताओ तं जहा-सूरप्पभा आतवा अच्चिमाली पभंकरा सेसं जहा चंदस्स नवरं-सूरवडंसए विमाणे जावनो चव णं मेहुणवत्तियाए ।

[१२७] जोतिसिया णं देवाणं केवतियं कालं ठिती पन्नत्ता ता जहण्णेणं अट्टभागपलिओवमं उक्कोसेणं पलिओवमं वाससतसहस्समब्भहियं ता जोतिसिणीणं देवीणं केवतियं कालं ठिती पन्नत्ता ता जहण्णेणं अट्टभागपलिओवमं उक्कोसेणं अट्टपलिओवमं पन्नासाए वाससहस्सेहिं अब्भहियं ता चंदविमाणे णं देवाणं केवतियं कालं ठिती पन्नत्ता ता जहण्णेणं चउब्भागपलिओवमं उक्कोसेणं पलिओवमं वाससय-सहस्समब्भहियं ता चंदविमाणे णं देवीणं केवतियं कालं ठिती पन्नत्ता ता जहण्णेणं चउब्भागपलिओवमं उक्कोसेणं अट्टपलिओवमं पन्नासाए वाससहस्सेहिं अब्भहियं ता सूरविमाणे णं देवाणं केवतियं कालं ठिती पाहुडं-१८

पन्नत्ता ता जहण्णेणं चउब्भागपलिओवमं उक्कोसेणं पलिओवमं वाससहस्समब्भहियं ता सूरविमाणे णं देवीणं केवतियं कालं ठिती पन्नत्ता ता जहण्णेणं चउब्भागपलिओवमं उक्कोसेणं अट्टपलिओवमं पंचहिं वाससएहिं अब्भहियं ता गहविमाणे णं देवाणं केवतियं कालं ठिती पन्नत्ता ता जहण्णेणं चउब्भागपलिओवमं उक्कोसेणं पलिओवमं ता गहविमाणे णं देवीणं केवतियं कालं ठिती पन्नत्ता ता जहण्णेणं चउब्भागपलिओवमं उक्कोसेणं अट्टपलिओवमं ता नक्खत्तविमाणे णं देवाणं केवतियं कालं ठिती पन्नत्ता ता जहण्णेणं चउब्भागपलिओवमं उक्कोसेणं अट्टपलिओवमं ता नक्खत्तविमाणे णं देवीणं केवतियं कालं ठिती पन्नत्ता ता जहण्णेणं अट्टभागपलिओवमं उक्कोसेणं चउब्भागपलिओवमं ता ताराविमाणे णं देवाणं पुच्छा ता जहण्णेणं अट्टभागपलिओवमं उक्कोसेणं चउब्भागपलिओवमं ता ताराविमाणे णं देवीणं पुच्छा ता जहण्णेणं अट्टभागपलिओवमं उक्कोसेणं साइरेगअट्टभागपलिओवमं ।

[१२८] ता एएसि णं चंदिम-सूरिय-गह-नक्खत्त-ताराणं कतरे कतरेहिंतो अप्पा वा बहुया वा तुल्ला वा विसेसाहिया वा ता चंदा य सूरा य -एते णं दोवि तुल्ला सव्वत्थोवा नक्खत्ता संखेज्जगुणा गहा संखेज्जगुणा तारा संखेज्जगुणा ।

• मुनि दीपरत्नसागरेण संशोधितः सम्पादितश्च अट्टारसमं पाहुडं समत्तं •

॥ एगूणवीसइमं पाहुडं ॥

[१२९] ता कति णं चंदिमसूरिया सव्वलोयं ओभासंति उज्जोएंति तवेति पभासेति आहितेति वएज्जा तत्थ खलु इमाओ दुवालस पडिवत्तीओ पन्नत्ताओ तत्थेगे एवमाहंसु-ता एगे चंदे एगे सूर सव्वलोयं ओभासति जाव पभासेति-एगे पुण एवमाहंसु-ता तिण्णि चंदा तिण्णि सूरा सव्वलोयं ओभासंति जाव पभासेति-एगे पुण एवमाहंसु-ता आहुट्ठि चंदा आहुट्ठिं सूरा सव्वलोयं ओभासंति जाव पभासेति-एगे पुण एवमाहंसु-एतेणं अभिलावेण नेतव्वं-सत्तं चंदा सत्त सूरा दस चंदा दस सूरा बारस चंदा बारस सूरा बातालीसं चंदा बातालीसं सूरा बावत्तरिं चंदा बावत्तरिं सूरा बातालीसं चंदसतं बातालीसं सूरसतं बावत्तरं चंदसतं बावत्तरं सूरसतं बातालीसं चंदसहस्सं बातालीसं सूरसहस्सं बावत्तरं चंदसहस्सं बावत्तरं सूरसहस्सं सव्वलोयं ओभासंति जाव पभासेति-वयं पुण एवं वदामो-ता अयण्णं जंबुद्धीवे दीवे सव्वदीवसमुद्धानं सव्वब्भंतराए जाव परिक्खेवेणं पन्नत्ते ता जंबुद्धीवे दीवे दो चंदा पभासेंसु वा पभासेति वा पभासिस्संति वा दो सूरिया तवइंसु वा तवइंति वा तवइस्संति वा छप्पन्नं नक्खत्ता जोयं जोएंसु वा जोएंति वा जोइस्संति वा छावत्तरिं गहसत्तं चारं चरिंसु वा चरंति वा चरिस्संति वा एगं सयसहस्सं तेत्तीसंच सहस्सा नव यसया पन्नासा तारागणकोडिकोडीणं सोभं सोभेसुं वा सोभेति वा सोभिस्संति वा ।

[१३०] दो चंदा दो सूरा नक्खत्ता खलु हवंति छप्पण्णा ।

छावत्तरं गहसतं जंबुद्धीवे विचारी णं ।

[१३१] एगं च सयसहस्सं तेत्तीसं खलु भवे सहस्साइं ।

नव य सया पन्नासा तारागणकोडिकोडीणं ।

[१३२] ता जंबुद्धीवं णं दीवं लवणे नामं समुद्धे वट्टे वलयागारसंठाणसंठिते सव्वतोसमंता संपरिक्खित्ताणं चिट्ठति ता लवणे णं समुद्धे किं समचक्कवालसंठिते विसमचक्कवालसंठिते ता लवणसमुद्धे समचक्कवालसंठिते नो विसमचक्कवालसंठिते ता लवणसमुद्धे केवतियं चक्कवालविकखंभेणं केवतियं पाहुडं-१९

परिक्खेवेणं आहितेति वदेज्जा ता दो जोयणसतसहस्साइं चक्कवालविकखंभेणं पन्नरसजोयणसयसहस्साइं एक्कासीइं च सहस्साइं सतं च ऊतालं किंचिविसेसूणं परिक्खेवेणं आहितेति वदेज्जा ता लवणसमुद्धे केवतिया चंदा पभासेंसु वा एवं पुच्छा जाव केवतियाओ तारागणकोडिकोडीओ सोभेसुं वा सोभेति वा सोभिस्संति वा ता लवणे णं समुद्धे चत्तारि चंदा पभासेंसु वा पभासेति वा पभासिस्संति वा चत्तारि सूरिया तवइंसु वा तवइंति वा तवइस्संति वा बारस नक्खत्तसतं जोयं जोएंसु वा जोएंति वा जोइस्संति वा तिण्णि बावण्णा महग्गहसता चारं चरिंसुं वा चरंति वा चरिस्संति वा दो सतसहस्सा सतट्ठिं च सहसा नव य सता तारागणकोडिकोडीणं सोभं सोभेसुं वा सोभेति वा सोभिस्संति वा ।

[१३३] पन्नरस सतसहस्सा एक्कासीतं सतं च ऊतालं ।

किंचिविसेसेणुणो लवणो-दधिणो परिक्खेवो ।

[१३४] चत्तारि चेव चंदा चत्तारि य सूरिया लवणतोए ।

बारस नक्खत्तसयं गहाण तिण्णेव बावण्णा ।

[१३५] दो चेव सतसहस्सा सत्तट्ठिं खलु भवे सहस्साइं ।

नव य सता लवणजले तारागणकोडिकोडीणं ।

[१३६] ता लवणसमुद्धं धायईसंडे नामं दीवे वट्टे वलयागारसंठाणसंठिते तहेव जाव नो विसमचक्कवालसंठिते धायईसंडे णं दीवे केवतियं चक्कवालविकखंभेणं केवतियं परिक्खेवेणं आहितेति वदेज्जा ता चत्तारि जोयणसतसहस्साइं चक्कवालविकखंभेणं ईतालीसं जोयणसतसहस्साइं दस य सहस्साइं नव यएगट्टे जोयणसते किंचिविसेसूणे परिक्खेवेणं आहितेति वदेज्जा धायईसंडे दीवे केवतिया चंदा पभासैसु वा पुच्छा तहेव ता धायइ संडे णं दीवे बारस चंदा पभासैसु वा पभासैति वा पभासिस्संति वा बारस सूरिया तवैसु वा तवैति वा तविस्संति वा तिण्णि छत्तीसा नक्खत्तसया जोयं जोएसुं वा जोएंति वा जोइस्संति वा एगं छप्पणं महग्गहसहस्सं चारं चरिंसु वा चरंति वा चरिस्संति वा ।

[१३७] अट्टेव सयसहस्सा तिण्णि सहस्साइं सत्तयसयाइं ।

एगससी परिवारो तारागणकोडिकोडीणं ।

[सोभं सोभैसु वा सोभैति वा सोभिस्संति वा]

[१३८] धायईसंडपरिरओ ईताल दसुत्तरा सतसहस्सा ।

नव सया य एगट्टा किंचिविसेसेण परिहीणा ।

[१३९] चउवीसं ससिरविणो नक्खत्तसया य तिण्णि छत्तीसा

।

एग च गहसहस्सं छप्पणं धायईसंडे ।

[१४०] अट्टेव सतसहस्सा तिण्णि सहस्साइं सत्त य सताइं ।

धायईसंडे दीवे तारागणकोडिकोडीणं ।

[१४१] ता धायईसंडं णं दीवे कालोए नामं समुद्धे वट्टे वलयागारसंठाणसंठिते जाव नो

विसमचक्कवालसंठाणसंठिते ता कालोए णं समुद्धे केवतियं चक्कवालविकखंभेणं केवतियं परिक्खेवेणं आहितेति वदेज्जा ता कालोए णं समुद्धे अट्टे जोयणसतसहस्साइं चक्कवालविकखंभेणं पन्नत्ते एक्काणउतिं जोयणसतसहस्साइं सत्तरिं चसहस्साइं छच्च पंचुत्तरे जोयणसते किंचिविसेसाहिए परिक्खेवेणं आहितेति वदेज्जा ता कालोए णं समुद्धे० बातालीसं चंदा पभासैसु वा पभासैति वा पभासिस्संति वा बातालीसं सूरिया पाहुडं-१९

तवैसु वा तवैति वा तविस्संति वा एक्कारस बावत्तरा नक्खत्तसया जोयं जोइंसु वा जोएंति वा जोइस्संति वा तिण्णि सहस्सा छच्च छण्णउया महग्गहसया चारं चरिंसु वा चरंति वा चरिस्संति वा अट्टावीसं सयसहस्साइं बारसयसहस्साइं नवयसताइं पन्नासा तारागणकोडिकोडीओ सोभं सोभैसु वा सोभंति वा सोभिस्संति वा ।

[१४२] एक्काणउतिं सतराइं सहस्साइं परिरओ तस्स ।

अहियाइं छच्च पंचुत्तराइं कालोदधिवरस्स ।

[१४३] बातालीसं चंदा बातालीसं च दिणकरा दित्ता ।

कालोदहिंमि एते चरंति संबद्धलेसागा ।

[१४४] नक्खत्तसहस्सं एगमेव छावत्तरं च सयमण्णं ।

छच्च सयाछण्णउया महग्गहा तिण्णि य सहस्सा ।

[१४५] अट्टावीसं कालोदहिंमि बारस य सहस्साइं ।

नव य सता पन्नासा तारागणकोडिकोडीणं ।

[१४६] ता कालोयं णं ससुद्धं पुक्खरवरे नामं दीवे वट्टे वलयागारसंठाणसंठिते सव्वतो समंता संपरिक्खित्ताणं चिट्ठंति पुक्खरवरे णं दीवे किं समचक्कवालसंठिते विसमचक्कवालसंठिते ता समचक्कवालसंठिते नो विसमचक्कवालसंठिते ता पुक्खरवरे णं दीवे केवतियं चक्कवालविक्खंभेणं केवतियं परिक्खेवेणं ता सोलस जोयणसयसहस्साइं चक्कवालविक्खंभेणं एगा जोयणकोडी बाणउतिं च सतसहस्साइं अउणाणउतिं च सहस्साइं अडुचउणउते जोयणसते परिक्खेवेणं आहितेति वदेज्जा ता पुक्खरवरे णं दीवे केवतिया चंदा पभासंसु वा पुच्छा तहेव ता चोतालं चंदसतं पभासंसु वा पभासंति वा पभासिस्संति वा चोतालं सूरियाणं सतं तवइंसु वा तवइंति वा तवइस्संति वाचत्तारि सहस्साइं बत्तीसं च नक्खत्ता जोयं जोएसु वा जोएंति वा जोइस्संति वा बारस सहस्साइं छच्च बावत्तरा महग्गहसया चारं चरिंसु वा चरंति वा चरिस्संति वा छण्णउतिं सयसहस्साइं चोयालीसं सहस्साइं चत्तारि य सयाइं तारागणकोडिकोडीणं सोभं सोभिंसु वा सोभंति वा सोभिस्संति वा ।

[१४७] कोडी बाणउती खलु अउणाणउतिं भवे सहस्साइं ।

अट्टसता चउणउता य परिरओ पोक्खरवरस्स ।

[१४८] चोतालं चंदसतं चोतालं चैव सूरियाण सतं ।

पोक्करवरदीवम्मि चरंति एते पभासंता ।

[१४९] चत्तारि सहस्साइं बत्तीसं चैव हुंति नक्खत्ता ।

छच्च सता बावत्तर महग्गहा बारह सहस्सा ।

[१५०] छण्णउति सयसहस्सा चोत्तालीसं खलु भवे सहस्साइं

।

चत्तारि य सता खलु तारागणकोडिकोडीणं ।

[१५१] ता पुक्खरवरस्स णं दीवस्स बहुमज्झदेसभाए माणुसुत्तरे नामं पव्वते पन्नत्ते-वट्टे वलयागारसंठाणसंठिते जे णं पुक्खरवरं दीवं दुधा विभयमाणे-विभयमाणे चिट्ठंति तं जहा- अब्भिंतर-पुक्खरद्धं च बाहिरपुक्खरद्धं च ता अब्भिंतरपुक्खरद्धे णं किं समचक्कवालसंठिते विसमचक्कवालसंठिते ता समचक्कवालसंठिते नो विसमचक्कवालसंठिते ता अब्भिंतरपुक्खरद्धे णं केवतियं चक्कवालविक्खंभेणं पाहुडं-१९

केवतियं परिक्खेवेणं आहितेति वदेज्जा ता अट्ट जोयणसयसहस्साइं चक्कवालविक्खंभेणं एक्का जोयण-कोडी बायालीसं च सयसहस्साइं तीसं च सहस्साइं दो अउणापन्ने जोयणसते परिक्खेवेणं आहितेति वदेज्जा ता अब्भिंतरपुक्खरद्धे णं केवतिया चंदा पभासंसु वा पभासंति वा पभासिस्संति वा केवतिया सूरा तविंसु वा पुच्छा ता बावत्तरिं चंदा पभासिंसु वा पभासंति वा पभासिस्संति वा बावत्तरिं सूरिया तवइंसु वा तवइंति वा तवइस्संति वा दोण्णि सोला नक्खत्तसहस्सा जोयं जोएसु वा जोएंति वा जोइस्संति वा छ महग्गहसहस्सा तिण्णि य सया छत्तीसा चारं चरेसुं वा चरंति वा चरिस्संति वा अडतालीससतसहस्सा बावीसं च सहस्सा दोण्णि य सता तारागणकोडीकोडीणं सोभं सोभिंसु वा सोभंति वा सोभिस्संति वा ता समयक्खेत्ते णं केवतियं आयाम-विक्खंभेणं केवतियं परिक्खेवेणं आहितेति वदेज्जा ता पणतालीसं जोयणसयसहस्साइं आयाम-विक्खंभेणं एगा जोयणकोडी बायालीसं च सतसहस्साइं तीसं च सहस्सा-इंदोण्णि यअउणापन्ने जोयणसते परिक्खेवेणं आहितेति वदेज्जा ता समयक्खेत्ते णं केवतिया चंदा

पभासेंसु वा पुच्छा तहेव ता बत्तीसं चंदसतं पभासेंसु वा पभासेंति वा पभासिस्संति वा बत्तीसं सूरियाणं सतं तवइंसुवा तवइंति वातवइस्सति वातिणिण सहस्सा छच्च छण्णउत्ता नक्खत्तसता जोयं जोएंसु वा जोएंति वा जोइस्संति वा एक्कारस सहस्सा छच्च सोलस महग्गहसता चारं चरिंसु वा चरेंति वा चरिस्संति वा अट्ठासीतिं सतसहस्साइं चत्तालीसं च सहस्सा सत्त य सया तारागणकोडिकोडीणं सोभं सोभिंसु वा सोभेंति वा सोभिस्संति वा ।

- [१५२] अट्ठेव सतसहस्सा अब्भिंतरपुक्खरस्स विक्खंभो ।
पणयालसयसहस्सा माणुसखेत्तस्स विक्खंभो ।
- [१५३] कोडी बातालीसं सहससा दो सता अउणपन्नासा ।
माणुसखेत्तपरिरओ एमेव य पुक्खरद्धस्स ।
- [१५४] बावत्तरिं च चंदा बावत्तरिमेव दिणकरा दित्ता ।
पुक्खरवरदीवइंढे चरंति एते पभासेंता ।
- [१५५] तिणिण सता छत्तीसा छच्च सहस्सा महग्गगाणं तु
।
नक्खत्ताणं तु भवे सोलाइं दुवे सहस्साइं ।
- [१५६] अडयालसयसहस्सा बावीसं खलु भवे सहस्साइं ।
दो य सय पुक्खरद्धे तारागणकोडिकोडीणं ।
- [१५७] बत्तीसं चंदसतं बत्तीसं चेव सूरियाण सतं ।
सयलं माणुसलोयं चरंति एते पभासेंता ।
- [१५८] एक्कारस य सहस्सा छप्पि य सोला महग्गहाणं तु ।
छच्च सत्ता छण्णउया नक्खत्ता तिणिण य सहस्सा
।
- [१५९] अट्ठासीतिं चत्ताइं सयसहस्साइं मणुयलोगंमि ।
सत्त य सया अणूणा तारागणकोडीकोडीणं ।
- [१६०] एसो तारापिंडो सव्वसमासेण मणुयलयंमि ।
बहिया पुण ताराओ जिणेहिं भणिया असंखेज्जा ।
- [१६१] एवतियं तारगं जं भणियं माणुसंमि लोगंमि ।

पाहुडं-१९

- चारं कलंबुयापुप्फसंठितं जोइसं चरति ।
- [१६२] रविससिगहणक्खत्ता एवतिया आहिता मणुयलोए ।
जेसिं नामागोत्तं न पागता पन्नवेहिंति ।
- [१६३] छावट्ठिं पिडगाइं चंदादिच्चाण मणुयलयम्मि ।
दो चंदा दो सूरा हुंति एक्केक्कए पिडए ।
- [१६४] छावट्ठिं पिडगाइं नक्खत्ताणं तु मणुयलयम्मि ।
छप्पन्नं नक्खत्ता हुंति एक्केक्कए पिडए ।
- [१६५] छावट्ठिं पिडगाइं महग्गहाणं तु मणुयलयंमि ।

- छावत्तरं गहसयं होइ एक्केक्कए पिडए ।
 [१६६] चत्तारि य पंतीओ चंदादिच्चाण मणुयलोयम्मि ।
 छावट्ठिं छावट्ठिं च होंति एक्किक्किया पंती ।
 [१६७] छप्पन्नं पंतीओ नक्खत्ताणं तु मणुयलोयम्मि ।
 छावट्ठिं छावट्ठिं हवंति एक्केक्किया पंती ।
 [१६८] छावत्तरं गहाणं पंतिसयं हवइ मणुयलोयंमि ।
 छावट्ठिं छावट्ठिं हवंति य एक्केक्किया पंती ।
 [१६९] ते मेरुमणुचरंता पदाहिणावत्तमंडला सव्वे ।
 अणवट्ठित्तैहिं जोगेहिं चंदा सूरा गहगणा य ।
 [१७०] नक्खत्ततारगाणं अवट्ठिता मंडला मुणेयव्वा ।
 तेवि य पदाहिणावत्तमेव मेरुं अनुचरंति ।
 [१७१] रयणिकरदिणकराणं उड्ढं च अहे य संकमो नत्थि ।
 मंडलसंकमणं पुणं सभ्भंतरबाहिरं तिरिए ।
 [१७२] रयणिकरदिणकराणं नक्खत्ताणं महग्गहाणं च ।
 चारविसेसेणं भवे सुहदुक्खविही मणुस्साणं ।
 [१७३] तेसिं पविसंताणं तावक्खेत्तं तु वड्ढते निययं ।
 तेणेव कमेणं पुणो परिहायति निक्खमंताणं ।
 [१७४] तेसिं कलंबुयापुप्फसंठिता हुंति तावखेत्तपहा ।
 अंतो य संकुडा बाहिं वित्थडा चंदसूराणं ।
 [१७५] केणं वड्ढति चंदो परिहाणी केण होति चंदस्स ।
 कालो वा जोण्हो वा केणणुभावेणं चंदस्स ।
 [१७६] किण्हं राहुविमाणं निच्चं चंदेण होइ अविरहियं ।
 चउरंगुलमप्पत्तं हिट्ठा चंदस्स तं चरति ।
 [१७७] बावट्ठिं-बावट्ठिं दिवसे-दिवसे तु सुक्कपक्खस्स ।
 जं परिवड्ढति चंदो खवेइ तं चेव कालेणं ।
 [१७८] पन्नरसइभागेण य चंदं पन्नरसमेव तं वरति ।

पाहुडं-१९

- पन्नरसइभागेण य पुणोवि तं चेव वक्कमति ।
 [१७९] एवं वड्ढति चंदो परिहाणी एव होइ चंदस्स ।
 कालो वा जोण्हो वा एयणुभावेणं चंदस्स ।
 [१८०] अंतो मणुस्सखेत्ते हवंति चारोवगा तु उववण्णा ।
 पंचविहा जोतिसिया चंदा सूरा गहगणा य ।
 [१८१] तेण परं जे सेसा चंदादिच्चगहतारनक्खत्ता ।
 नत्थि गई नवि चारो उवट्ठित्ता ते मुणेयव्वा ।
 [१८२] एवं जंबुद्धीवे दुगुणा लवणे चउग्गुणा हुंति ।

- लावणगा य तिगुणिता ससिसूरा घायईसंडे ।
 [१८३] दो चंदा इह दीवे चत्तारि य सायरे लवणतोए ।
 घायइसंडे दीवे बारस चंदा य सूरा य ।
 [१८४] घायइसंडप्पभिति उद्धिद्धा तिगुणिता भवे चंदा ।
 आदिल्लचंदसहिता अनंतराणंतरे खेत्ते ।
 [१८५] रिक्खग्गहतरग्गं दीवसमुद्धे जतिच्छसी नाउं ।
 तस्स ससीहिं गुणितं रिक्खग्गहतारग्गं तु ।
 [१८६] बहिता तु माणुसणगस्स चंदसूराणवद्धिता जोआ ।
 चंदा अभीइजुत्ता सूरा पुण हुंति पुस्सेहिं ।
 [१८७] चंदातो सूरस्स य सूरा चंदस्स अंतरं होइ ।
 पन्नाससहस्साइं तु जोयणाणं अण्णाइं ।
 [१८८] सूरस्स य सूरस्स य ससिणो ससिणो य अंतरं होइ ।
 बाहिं तु माणुसणगस्स जोयणाणं सतसहस्सं ।
 [१८९] सूरंतरिया चंदा चंदंतरिया य दिणयरा दित्ता ।
 चित्तंतरलेसागा सुहलेसा मंदलेसा य ।
 [१९०] अट्ठासीतिं च गहा अट्ठावीसं च हुंति नक्खत्ता ।
 एगससीपरिवारो एत्तो ताराणं वोच्छामि ।
 [१९१] छावद्धिसहस्साइं नव चेव सताइं पंचसतराइं ।
 एगससीपरिवारो तारागणकोडिकोडीणं ।

[१९२] अंतो मणुस्सखेत्ते जे चंदिम-सूरिय-गह जाव तारारूवा ते णं देवा किं उड्ढोववण्णगा कप्पोववण्णगा विमाणोववण्णगा चारोववण्णगा चारद्वितिया गतिरतिया गतिसमवण्णगा ता ते णं देवा नो उड्ढोववण्णगा नो कप्पोववण्णगा विमाणोववण्णगा चारोववण्णगा नो चारद्वितिया गतिरतिया गतिस-मावण्णगा उड्ढीमुहकलंबुयापुप्फसंठाणसंठितेहिं जोयणसाहस्सिएहिं तावक्खेत्तेहिं साहस्सियाहिं बाहिराहिं वेउव्वियाहिं परिसाहिं महताहसहस्सिएहिं-वाहय-तंती-तल-ताल-तुडिय-घण-मुड्ढंग-पडुप्पवाइयरवेणं महता उक्कुट्टिसीहनाद-बोलकलकलरवेणं अच्छं पव्वतरायं पदाहिणावत्तमंडलचारं मेरुं अनुपरियट्ठंति ता तेसि णं देवाणं जाधे इंदे चयति से कधमियाणिं पकरंति वा चत्तारि पंच सामाणियदेवा तं ठाणं उवसंपज्जित्ताणं पाहुडं-१२

विहरंति जावण्णे तत्थ इंदे उववण्णे भवति ता इंदद्व्याणे णं केवतिएणं कालेणं विरहिते पन्नत्ते ता जहण्णेणं इक्कं समयं उक्कोसेणं छम्मासे ता बहिता णं माणुस्सक्खेत्तस्स जे चंदिम-सूरिय-गह गण-नक्खत-तारारूवा ते णं देवा किं उड्ढोववण्णगा कप्पो ववण्णगा विमाणोववण्णगा चारद्वितिया गतिरतिया गतिस-मावण्णगा ता ते णं देवा नो उड्ढोववण्णगा नो जाव गतिरतिया नो गतिसमावण्णगा पक्किट्टगसंठाणसंठितेहिं जोयणसयसहस्सिएहिं तावक्खेत्तेहिं सयसाहस्सियाहिं बाहिराहिं वेउव्वियाहिं जाव रवेणं दिव्वाइं भोगभोगाइं भुंजमाणा विहरंति सुहलेसा मंदलेसा मंदायवलेसा चित्तंतरलेसा अण्णोण्णसमोगाढाहिं लेसाहिं कूडा इव ठाणठिता ते पदेसे सव्वतो समंता ओभासंति उज्जोवेंति तवेंति

पभासेति ता तेसि णं देवाणं जाहे इंदे चयति से कहमियाणि पकरेति ता चत्तारि पंच सामाणियदेवा तं ठाणं तहेव जाव छम्मासे ।

[१९३] ता पुक्खरवरं णं दीवं पुक्खरोदे नामं समुद्धे वट्टे वलयागारसंठाणसंठिते सव्वतो जाव चिट्ठति ता पुक्खरदे णं समुद्धे किं समचक्कवालसंठिते नो विसमचक्कवालसंठिते ता पुक्खरोदे णं समुद्धे केवतियं चक्कवालविकखंभेणं केवतियं परिकखेवेणं आहितेति वदेज्जा ता संखेज्जाइं जोयणसहस्साइं आयाम-विकखंभेणं संखेज्जाइं जोयणसहस्साइं परिकखेवेणं आहितेति वदेज्जा ता पुक्खरवरोदे णं समुद्धे केवतिया चंदा पभासेसु वा पुच्छा तहेव ता पुक्खरोदे णं समुद्धे संखेज्जा चंदा पभासेसु वा जाव संखेज्जाओ तारागणकोडिकोडीओ सोभं सोभेसु वा सोभेति वा सोभिस्संति वा एतेणं आभिलावेणं-वरुणवरेदीवे वरुणोदेसमुद्धे खीरवरेदीवे खीरवरेसमुद्धे घतवरेदीवे घतोदेसमुद्धे खोदवरेदीवे खोदोदेसमुद्धे नंदिस्सरवरे दीवे नंदिस्सरवरे समुद्धे अरुणोदेदीवे अरुणोदेसमुद्धे अरुणवरेदीवे अरुणवरेसमुद्धे अरुणवरोभासेदीवे अरुणवरोभासेसमुद्धे कुंडलेदीवे कुंडलोदेसमुद्धे कुंडलवरेदीवे कुंडलवरोदेसमुद्धे कुंडलवरोभासेदीवे कुंडलवरोभासेसमुद्धे सव्वेसिं विकखंभपरिकखवो जोतिसाइं पुक्खरोदसागरसरिसाइं ता कुंडवरोभासणं समुद्धं रुपए दीवे वट्टे वलयागार-संठाणसंठिते सव्वतो जाव चिट्ठति ता रुयए णं दीवे समचक्कवालसंठिते नो विसमचक्कवालसंठिते ता रुयए णं दीवे केवतियं चक्कवालविकखंभेणं केवतियं परिकखेवेणं आहितेति वदेज्जा ता असंखेज्जाइं जोयणसहस्साइं चक्कवालविकखंभेणं असंखेज्जाइं जोयणसहस्साइं परिकखेवेणं आहितेति वदेज्जा ता रुयगे णं दीवे केवतिया चंदा पभासेसु वा पुच्छा ता रुयगे णं दीवे असंखेज्जा चंदा पभासेसु वा जाव असंखेज्जाओ तारागणकोडिकोडीओ सोभं सोभेसु वा सोभेति वा सोभिस्संति वा एवं रुयगे समुद्धे रुयग-वरेदीवे रुयगवरोदे समुद्धे रुयगवरोभासेदीवे रुयगवरोभासेसमुद्धे एवं तिपडोयारा नेतव्वा जाव सूरेदीवे सूरोदे-समुद्धे सूरवरेदीवे सूरवरेसमुद्धे सूरवरोभासेदीवे सूरवरोभासेसमुद्धे सव्वेसिं विकखंभपरिकखेव-जोतिसाइं रुयग-वरदीवसरिसाइं ता सूरवरोभासोदणं समुद्धं देवे नामं दीवे वट्टे वलयागारसंठाणसंठिते सव्वतो समंता संप-रिक्खित्ताणं चिट्ठति जाव नो विसमचक्कवालसंठिते ता देवे णं दीवे केवतियं चक्क-वालविकखंभेणं केवतियं परिकखेवेणं आहितेति वदेज्जा ता असंखेज्जाइं जोयणसहस्साइं चक्कवाल-विकखंभेणं असंखेज्जाइं जोयणसहस्साइं परिकखेवेणं आहितेति वदेज्जा ता देवे णं दीवे केवतिया चंदा पभासेसु वा पुच्छा तहेव तादेवे णं दीवे असंखेज्जा चंदा पभासेसु वा जाव असंखेज्जाओ तारागण-कोडिकोडीओ सोभं सोभेसु वा सोभेति वा सोभेस्संति वा एवं देवोदे समुद्धे नागेदीवे नागोदेसमुद्धे जक्खेदीवे जक्खोदेसमुद्धे भूतेदीवे भूतोदेसमुद्धे सयंभुरमणेदीवे सयंभुरमणेसमुद्धे सव्वे देवदीवसरिसा ।

• मुनि दीपरत्नसागरेण संशोधितः सम्पादित्तश्च एगूणवीसइमं पाहुडं समत्तं •

पाहुडं-२०

□ वीसइमं पाहुडं □

[१९४] ता कहं ते अनुभावे आहितेति वदेज्जा तत्थ खलु इमाओ दो पडिवत्तीओ पन्नत्ताओ तत्थगे एवमाहंसु-ता चंदिमसूरिया णं नो जीवा अजीवा नो घणा झुसिरा नो वरबोदिधरा कलेवरा नत्थि मं तेसिं उट्ठाणेति वा कम्मेति वा वलेति वा वीरिएति वा पुरिसक्कारपरक्कमेति वा ते नोविज्जुलवंति नो असणिं लवंति नो थणितं लवंति अहे णं बादरे वाउकाए संमुच्छति संमुच्छित्ता विज्जुपि लवंति असणिंपि लवंति थणितंपि लवंति-एगे पुण एवमाहंसु-ता चंदिमसूरिया णं जीवा नो अजीवा धणा नो झुसिरा

वरबोदिंधरा नो कलेवरा अत्थि णं तेसि उट्ठाणेतिवा कम्ममेति वा बलेति वा वीरिएति वा पुरिसक्कार-
परक्कमेति वा ते विज्जुं पि लवंति असणिं पि लवंति थणितं पि लवंति-वयं पुण एवं वदामो-ता चंदिमसूरिया
णं देवा महिड्ढिया० जाव महाणुभावा वरत्थधरा वरमल्लधरा वरामभरणधारी अवोच्छित्ति-णयद्वयाए अण्णे
चयंति अण्णे उववज्जंति ।

[१९५] ता कहं ते राहुकम्ममे आहितेति वदेज्जा तत्थ खलु इमाओ दो पडिवत्तीओ पन्नत्ताओ
तत्थेगे एवमाहंसु-ता अत्थि णं से राहू देवे जे णं चंदं वा सूरं वा गेण्हति-एगे पुण एवमाहंसु-ता नत्थि णं
से राहू देवे जे णं चंदं वा सूरं वा गेण्हति-तत्थ जेते एवमाहंसु-ता अत्थि णं से राहू देवे जे णं चंदं वा सूरं
वा गेण्हति ते एवमाहंसु-ता राहू णं देवे चंदं वा सूरं वा गेण्हमाणे बुद्धंतेणं गिण्हित्ता बुद्धंतेणं मुयति
बुद्धंतेणं गिण्हित्ता मुद्धंतेण मुयति मुद्धंतेण गिण्हित्ता बुद्धंतेणं मुयति मुद्धंतेणं गिण्हित्ता मुद्धंतेणं मुयति
वामभुयंतेणं गिण्हित्ता वामभुयंतेणं मुयति वामभुयंतेणं गिण्हित्ता दाहिणभुयंतेणं मुयति दाहिणभुयंतेणं
गिण्हित्ता वामभुयंतेणं मुयति दाहिणभुयंतेणं गिण्हित्ता दाहिणभुयंतेणं मुयति तत्थ जेते एवमाहंसु-ता
नत्थि णं से राहू देवे जे णं चंदं वा सूरं वा गेण्हति ते एवमाहंसु तत्थ णं इमे पन्नरस कसिणपोग्गला०
सिंघाडए जडिलए खरए खतए अंजणे खंजणे सीतले हिमसीतले केलासे अरुणाभे परिज्जए नभसूरए
कविलए पिंगलए राहू, ता जया णं एते पन्नरस कसिणा पोग्गला सया चंदस्स वा सूरस्स वा
लेसाणुबद्धचारिणो भवंति तया णं माणुसलोयंसि माणुसा एवं वदंति-एवं खलु राहू चंदं वा सूरं वा गेण्हति
ता जया णं एते पन्नरस कसिणा पोग्गला नो सया चंदस्स वा सूरस्स वा लेसाणुबद्धचारिणो भवंति नो
खलु तया णं माणुसलोयम्मि मणुस्सा एवं वदंति-एवं खलु राहू चंदं वा सूरं वा गेण्हति-वयं पुण एवं
वदामो ता राहू णं देवे महिड्ढिए महाजुतीए महाबले महाजसे महाणुभावे वरत्थधरे वरमल्लधरे
वराभणधारी राहुस्स णं देवस्स नव नाधेज्जा पन्नत्ता तं जहा- सिंधडए जडिलए खतए खरए दद्वरे मगरे
मच्छे कच्छभे कण्हसप्पे ता राहुस्स णं देवस्स विमाणा पंचवण्णा पन्नत्ता तं जहा- किण्हा नीला लोहिता
हालिद्धा सुक्किला अत्थि कालए राहुविमाणे खंजणवण्णाभे पन्नत्ते अत्थि नीलए राहुविमाणे लाउयवण्णाभे
पन्नत्ते अत्थि लोहिए राहुविमाणे मंजिद्धावण्णाभे पन्नत्ते अत्थि पीतए राहुविमाणेहालिद्धवण्णाभे पन्नत्ते
अत्थि सुक्किलए राहुविमाणे भासरासिवण्णाभे पन्नत्ते ता जया णं राहुदेवे आगच्छमाणे वा गच्छमाणे वा
विउव्वमाणे वापरियारेमाणे वा चंदस्स वासूरस्स वा लेस्संपुरत्थिमेणं आवरित्ता पच्चत्थिमेणं वीतीवयति
तया णं पुरत्थिमेणं चंदे वा सूरं वा उवदंसेति पच्चत्थिमेणं राहू जया णं राहुदेवे आगच्छमाणे वा
गच्छमाणे वा विउव्वमाणे वा परियारेमाणे वा चंदस्स वा सूरस्स वा लेसं दाहिणेणं आवरित्ता उत्तरेणं
वीतीवयति तया णं दाहिणेणं चंदे वा सूरं वा उवदंसेति उत्तरेणं राहू एतेणं अभिलावेणं पच्चत्थिमेणं
आवरित्ता पुरत्थिमेणं
पाहुडं-२०

वीतीवयति उत्तरेणं आवरित्ता दाहिणेणं वीतीवयति जया णं राहू देवे आगच्छमाणे वा जाव परियारेमाणे
वाचंदस्स वा सूरस्स वा लेसं दाहिणपुरत्थिमेणं वरित्ताउत्तरपच्चत्थिमेणं वीतीवयति तया णं
दाहिणपुरत्थिमेणं चंदे वा सूरं वा उवदंसेति उत्तरपच्चत्थिमेणं राहू जया णं राहू देवे आगच्छमाणे वा जाव
परियारेमाणे वा चंदस्स वा सूरस्स वा लेसं दाहिणपच्चत्थिमेणं आवरित्ता उत्तरपुरत्थिमेणं वीतीवयति
तया णं दाहिणपच्चत्थिमेणं चंदे वा सूरं वा उवदंसेति उत्तरपुत्थिमेणं राहू एतेणं अभिलावेणं
उत्तरपच्चत्थिमेणं आवरेत्ता दाहिणपुरत्थिमेणं वीतीवयति उत्तरपुरत्थिमेणं आवरेत्ता दाहिणपच्चत्थिमेणं

वीतीवयति ता जया णं राहू देवे आगच्छमाणे वा जाव परियारेमाणे वा चंदस्स वा सूरस्स वा लेसं आवरेत्ता वीतीवयति तया णं मणुस्सलोए मणुस्सा वदंति-एवं खलु राहुणा चंदे वा सूरै वा गहिते-एवं खलु राहुणा चंदे वा सूरै वा गहिते ता जया णं राहू देवे आगच्छमाणे वा जाव परियारेमाणे वा चंदस्स वा सूरस्स वा लेसं आवरेत्ता पासेणं वीतीवयति तया णं मणुस्सलोयंमि मणुस्सा वदंति-एवं खलु चंदेण वा सूरैण वा राहुस्स कुच्छी भिण्णा-एवं खलु चंदेण वा सूरैण वा राहुस्स कुच्छी भिण्णा ता जया णं राहुदेवे आगच्छमाणे वा जाव परियारेमाणे वा चंदस्स वा सूरस्स वा लेसं आवरेत्ता पचोसक्कति तया णं मणुस्सलोए मणुस्सा वदंति-एवं खलु राहुणा चंदे वा सूरै वा वंते-एवं खलु राहुणा चंदे वा सूरै वा वंते ता जया णं राहू देवे आगच्छमाणे वा जाव परियारेमाणे वा चंदस्स वा सूरस्स वा लेसं आवरेत्ता मज्झंमज्झेणं वीतीवयति तया णं मणुस्सलोए मणुस्सा वदंति-एवं खलु राहुणा चंदे वा सूरै वा वइयरि-एवं खलु राहुणा चंदे वा सूरै वा वइयरि ता जया णं राहू देवे आगच्छमाणे वा जाव परियारेमाणे वा चंदस्स वा सूरस्स वा लेसं आवरेत्ताणं अहे सपक्खिं सपडिदिसिं चिद्धति तया णं मणुस्सलोयंसि मणुस्सा वदंति-एवं खलु राहुणा चंदे वा सूरै वा धत्थे-एवं खलु राहुणा चंदे वा सूरै वा धत्थे ता कतिविहे णं राहू पन्नत्ते ता दुविहे पन्नत्ते तं जहा- धूवराहू य पव्वराहू य तत्थ णं जेसे धुवराहू से णं बहुलपक्खस्स पाडिवए पन्नरसतिभागेणं पन्नरसतिभागं चंदस्स लेसं आवरेमाणे-आवरेमाणे चिद्धति तं जहा- पढमाए पढमं भागं जाव पन्नरसीए पन्नरसमं भागं चरमे समए चंदे रत्ते भवइ अवसेसे समए चंदे रत्ते य विरत्ते य भवति तमेव सुक्कपक्खे उवदंसेमाणे उवदंसेमाणे चिद्धति तं जहा- पढमे पढमं भागं जाव पन्नरसीए पन्नरसमं भागं चरिमे समए चंदे विरत्ते भवति अवसेसे समए चंदे रत्ते य विरत्ते य भवइ तत्थ णं जेसे पव्वराहू से जहण्णेणं छण्हं मासाणं उक्कोसेणं बायालोसाए मासाणं चंदस्स अडतालीसाए संवच्छराणं सूरस्स ।

[१९६] ता कहं ते चंदे ससी-चंदे ससी आहितेति वदेज् ता चंदस्स णंजोतिसिंदस्स जोतिसरण्णो मियंके विमाणे कंता देवा कंताओ देवीओ कंताइं आसण-सयण-खंभंभंडमत्तोवगरणाइं अप्पणावि य णं चंदे देवे जोतिसिंदे जोतिसराया सोमेकंते सुभगे पियदंसणे सुरूवे ता एवं खलु चंदे ससी-चंदे ससी आहितेति वदेज्जा ता कहं ते सूरै आदिच्चे-सूरै आदिच्चे आहितेति वदेज्जा ता सूरैदिया णं समयाति वा आवलियाति वा आणापाणूति वा थोवेति वा जाव ओसप्पिणि-उस्सप्पिणीति वा एवं खलु सूरै आदिच्चे-सूरै आदिच्चे आहितेति वदेज्जा ।

[१९७] ता चंदस्स णं जोतिसिंदस्स जोतिसरण्णो कति अग्गमहिसीओ पन्नत्ताओ ता चत्तारि अग्गमहिसीओ पन्नत्ताओ तं जहा- चंदप्पभा दोसिणाभा अच्चिमाली पभंकरा जहा हेड्डा तं चेव जाव नो चेव णं मेहुणवत्तियं एवं सूरस्सवि भाणितव्वं ता चंदिमसूरिया णं जोतिसिंदा जोतिसरायाणो केरिस कामभोगे पच्चणुभवमाणा विहरंति ता से जहानामए-केइ पुरिसे पढमजोव्वणुट्टाणबलसमत्थे पढम-जोव्व-

पाहुडं-२०

णुट्टाणबल-समत्थाए भारियाए सद्धिं अचिरवत्तविवाहे अत्थत्थी अत्थगवेसणयाए सोलसवास-विप्पवसिते से णं ततो लद्धे कयकज्जे अणहसमग्गे पुणरवि नियगधरं हव्वमागए णहाते कतबलिकम्मं कतकोतुक-मंगल-पायच्छित्ते सुद्धप्पावेसाइं मंगलाइं वत्थाइं पवर परिहिते अप्पमहग्घाभरणालंकितसरीरे मणुण्णं थाली-पागसुद्धं अट्टारसवंजणाउलं भोयणं भुत्ते समाणे तंसि तारिसगंसि वासघरंसि अंतो सचित्तकम्मं बाहीरओ दूमिय-धट्ट-मट्टे विचित्तउल्लोय-चिल्लियतले बहुसमसुविभत्तभूमिभाए मणिरयण-पणासितंधयारे कालागुरु-

पवरकुंदुरुक्क-तुरुक्क-धूव-मघ-मघेत-गंधुद्युयाभिरामे सुगंधवरगंधिते गंधवद्विभूते तंसि तारिसगंसि सयणिज्जंसि दुहओ उण्णए मज्झे नत-गंभीरे सालिंगणवद्विए उभओ विब्बोयणे सुरम्मे गंगापुलिण-वालुयाउद्दालसालिसए सुविरइयरयत्ताणे ओयवियखोमियखोमदुगूलपट्टपडिच्छयाणे रत्तंसुयसंवुडे सुरम्मे आईणगरूतबूरणवणीततूलफासे सुगंधवरकुसुमचुण्णसयणोवयारकलिए ताए तारिसाए भारियाए सद्धिं सिंगा-रागारचारुवेसाए संगतगतहसितभणितचिद्धतसंलावविलासणउणजुत्तोवयारकुसलाए अनुरत्ताए अविरत्ताए मणोमुकूलाए एगंतरतिपसत्ते अन्नत्थ कत्थइ मणं अकुच्चमाणे इट्टे सद्धफरिसरसरूवगंधं पंचविधे माणुस्सए कामभोगे पच्चणुभवमाणे विहरेज्जा ता से णं पुरिसे विउसमणकालसमयंसि केरिसयं साता-सोकखं पच्चणुभवमाणे विहरति ओरालं समणाउसो ता तस्स णं पुरिसस्स कामभोगेहिंतो एते अनंत-गुणविसिद्धतरा चेव वाणमंतराणं देवाणं कामभोगा वाणमंतराणं देवाणं कामभोगेहिंतो अनंतगुण-विसिद्धतरा चेव असुरिंदवज्जियाणं भवणवासीणं देवाणं कामभोगा असुरिंदवज्जियाणं भवणवासीणं देवाणं कामभोगेहिंतो अनंतगुणविसिद्धतरा चेव असुरकुमाराणं इंदभूयाणं देवाणं कामभोगा असुरकुमाराणं इंदभू-याणं देवाणं कामभोगेहिंतो अनंतगुणविसिद्धतरा चेव गहगणनक्खत्ततारारूवाणं कामभोगा गहगण-णक्खत्त-तारारूवाणं कामभोगेहिंतो अनंतगुणविसिद्धतरा चेव चंदिमसूरियाणं देवाणं कामभोगा ता एरिसए णं चंदिमसूरिया जोतिसिंदा जोतिसरायाणो कामभोगे पच्चणुभवमाणा विहरंति ।

[१९८] तत्थ खलु इमे अट्ठासीतिं महग्गहा पन्नत्ता तं जहा- इंगालए वियालए लोहितक्खे सणिच्छरे आहुणिए पाहुणइए कणे कणए कणकणए कणविताए कणसंताणए सोमे सहिते आससणे कज्जोवए कब्बडए अयकरए दुंदुभए संखे संखणाभे संखवण्णाभे कंसे कंसणाभे कंसवण्णाभे नीले नीलोभासे रूप्पे रूप्पोभासे भासे भासरासी तिले तिलुप्फवण्णे दगे दगवण्णे काए काकंधे इंदग्गी धुमकेतु हरी पिंगलए बुधे सुक्के बहस्सई राहू अगत्थी माणवगे कासे फासे धुरे पमुहे वियडे विसंधीकप्पे नियल्ले पयल्ले जडियायलए अरुणे अग्गिल्लए काले महाकाले सोत्थिए सोवत्थिए वद्धमाणगे पलंबे निच्चालोए निच्चुज्जोते सयंपभे ओभासे सेयंकरे खेमंकरे आभंकरे पभंकरे अरए विरए असोगे वीतसोगे विमले वितत्ते विवत्थे विसाले साले सुव्ते अणियट्ठी एगजडी दुजडी करकरिए रायग्गले पुप्फकेतू भावकेतू ।

[१९९] इंगालए वियालए लोहितंके सणिच्छरे चेव ।

आहुणिए पाहुणिए कणाकसणामावि णं चेव ।

[२००] सोमे सहिते अस्सासणे य कज्जोवए य कब्बरए ।

अयकरए दुंदुभए संखसणामावि तिण्णेव ।

[२०१] तिण्णेव कंसणामा नीले रूप्पी य हुंति चत्तारि ।

भास तिल पुप्फवण्णे दगवण्णे काय बंधे य ।

[२०२] इंदग्गि धूमकेतू य हरि पिंगलए बुधे य सुक्के य ।

पाहुडं-२०

बहसति राहु अगत्थी माणवए कामफासे य ।

[२०३] धुरए पमुहे वियडे विसंधिकप्पे पयल्ले ।

जडियाइल्लए अरुणे अग्गिल काले महाकाले ।

[२०४] सोत्थिय सोवत्थिय वद्धमाणग तथा पलंबे य ।

निच्चालोए निच्चुज्जोए सयंपभे चेव ओभासे ।

- [२०५] सोयंकरे खेमंकर आभंकर पंभकरे य बोधव्वे ।
अरणे विरणे य तथा असोगे तह वीतसोगे य ।
- [२०६] विमल वितत्त विवत्थे विसाल तह साल सुव्वते
चेव
अणियट्ठि एगजडि य होई बिजडी य बोधव्वे ।
- [२०७] कर करिणं रायग्गल बोधव्वे पुप्फ भावकेतू य ।
अट्ठासीति खलु गहा नेतव्वा आणुपुव्वीए ।

◦ वीसइमं पाहुडं समत्तं ◦

- [२०८] इह एस पाहुडत्था अभव्वजणहिययदुल्लहा इणमो ।
उविकत्तिता भगवती जोतिसरायस्स पन्नत्ती ।
- [२०९] एस गहितावि संति थद्धे गारविय-माणि-पडीणीए ।
अबहुस्सुए णं देया तव्विवरीते भवे देया ।
- [२१०] सद्धा-धिति-उट्ठाणुच्छाह-कम्म-बल-वीरिय-पुरिसकारेहिं ।
जो सिक्खिओवि संतो अभायणे पक्खिवेज्जाहि ।
- [२११] सो पयवण-कुल-गण-संधबाहिरो नाणविणयपरिहीणो ।
अरहंतथेरगणहरमरं किर होति वोलीणो ।
- [२१२] तम्हा धिति-उट्ठाणुच्छाह-कम्म-बल-वीरियसिक्खियं नाणं ।
धारेयव्वं नियमा ण य अविणीएसु दायव्वं ।
- [२१३] वीरवरस्स भगवतो जरमरणकिलेसदोसरहियस्स ।
वंदामि विणयपणतो सोक्खुप्पाए सदा पाए ।

[२१४] इइ संगहणी गाहा ।

◦ मुनि दीपरत्नसागरेण संशोधितः सम्पादित्तश्च सूरपन्नत्ति उवंगं समत्तं ◦

१

सूरपन्नत्ती - पंचमं उवंगं समत्तं

Proof correction is not done